

Liahona

**Te rahi noa'tu ra
te feia apî e haere
nei i te hiero :
A tauturu ia ratou
ia faaineine, api 18**

**E hi'o i ta'u misioni na roto
i te mata apî, api 42**

**Nahea te episekopo ia tauturu
ia outou ia tatarahapa, api 58**

**Ua parau Iesu ia here i te mau
taata atoa—tae noa'tu i te feia
faari'ari'a, api 68**



*« Noa'tu e, aita
tatou e taa faahou
ra e, nahea tatou i
roto i to tatou nei
oararaa, ua fafau
mai te Atua e
horo'a mai Oia i te
ti'aturiraa o To'na
maramarama—ua
fafau mai Oia e, e
turama oia i te e'a
i mua ia tatou, e
e faaite mai Oia
i te e'a e matara
ai tatou i rapae
i te pouri ».*

Peresideni Dieter F. Uchtdorf,
Tauturu Piti i roto i te Pereside-
niraa Matamua, « Te ti'aturiraa
i te maramarama o te Atua », *Liahona*, Me 2013, 70.



TE MAU PARAU PORO'I

4 Parau poro'i a te Peresideniraa Matamua : Ta tatou hopoi'a ia faaora
 Na te peresideni Thomas S. Monson

7 Parau poro'i na te mau tuahine hahaere Te misioni hanahana a Iesu Mesia : E Hamani

TE MAU TUHAA TAA Ê

12 A rave maitai i ta oe tuhaa
 Na Elder Quentin L. Cook
I teie nei, e mea ohie roa ia vai ite-ore-noa-hia, tera râ, te vai ra te tahi mau parau tumu faufaa o te titau i te taata eiaha e tamau i te tapo'i mata, e ia haapa'o maitai i to'na faaroo.

I NI'A I TE TAPO'I
 I mua : Hoho'a faahoho'araa na Cody Bell.
 I muri : Hoho'a faahoho'araa na Cody Bell.
 I roto, tapo'i no mua : Hoho'a faahoho'araa na iStockphoto/Thinkstock.

18 Te feia api e te mau fafauraa o te hiero
 Na Gary e Susan Carter
E taime teie no te haamata i te faaineine i ta outou mau tamarii ia tomo i roto i te hiero.

20 Ta tatou faufaa ai'a rahi misionare
 Na LaRene Porter Gaunt e o Linda Dekker Lopez
E tavini te mau misionare taatoa, to tei tahito ra e to teie anotau, ma te ti'aturi ia faatupu i te hoê oraraa maitai a'e no te tahi atu mau taata.

26 Faaineinehia no te mahana aroraa
 Na Elder Eduardo Gavarret
E nehenehe i te mau parau tumu ohie roa a'e e faaoti i to tatou parau i roto i te mau aroraa o te oraraa nei.

30 Haapeepē i te ohipa no te faaoraraa
Te riroraa ei melo i roto i te Ekalesia a te Fatu, maori râ, o te piiraahia ia ia tatou ia fafau ia tatou iho i roto i Ta'na ohipa no te faaoraraa.

34 Te riroraa ei taata no te hau
 Na Matthew D. Flitton
Ua tau i te evanelia i te aau o te hoê taata—e ua faatahoê i to'na utuafare.

TE MAU TUHAA MÂTAU

8 Buka tapa'opa'oraa no te amuiraa no atopa : mana'o no te amuiraa rahi
 Na Tina Spencer

9 Te haapiiraa No te Puai o te Feia Api : Te ora maitai o te tino e o te feruriraa

10 Te mau parau api o te Ekalesia

38 Te reo o te feia mo'a i te mau mahana hopea nei

80 E tae atu i te taime e farerei faahou ai tatou : Ua parau... vau
 Na R. Val Johnson

42



42 Nahea vau e riro ai ei misonare manuia ?
 Na Lauren Bangerter Wilde
Ua farerei matou i te pato'iraa i te mau vahi atoa, e ua paruparu to'u mana'o. Ua imi au i te hoê tatararaa api no te parau ra, manuia.



A hi'o na e itehia anei ia outou i te Liahona i hunahia i roto i teie ve'a. Tauturu : Horo'a i te hotu.

46 Te riroraa ei misionare la Poro Haere i Ta'u nei Evanelia
 Na Elder David A. Bednar
Na teie na titauroa e pae e tauturu ia outou ia riro mai ei misionare maitai a'e.

51 A ataata noa e a parau e, aita
 Na Hazel Marie Tibule
Nahea e ti'a ai ia'u ia parau e, aita, i te peresideni o te taitete ?


52 No te Puai o te Feia ApĪ la puai, ia tino maitai, ia maramarama
 Na Elder Adrián Ochoa
A oomo i to oe tiaa tu'aro e a haere !

54 A pee i To'na taahiraa avae
 Na Melissa Zenteno
Te riroraa mai ia Iesu Mesia te huru, e au rii te reira mai te tuatapaparaa hohonu i te ihi puai (sciences physiques), tera râ, e haamata taua ohipa nei na roto i to outou taahiraa matamua.

56 Uiraa e pahonora
Eaha ta'u e parau atu i te mau melo ore e ani mai nei e, no te aha aita te tahi o te mau melo o te Ekalesia e ora nei i ta tatou mau faaturerara ?

58 No te aha e eaha te titauhia ia'u ia fa'i to'u episekopo ?
 Na Elder C. Scott Grow
Te tatarahapa, o te hoê ia ohipa i rotopu i te Fatu e o vau. No te aha e titau-atoa-hia ia'u ia paraparau i to'u episekopo ?

52



61

61 Ani manihini i te Faora ia tomo mai
 Na Elder O. Vincent Haleck
Te tia'i nei te Faaora ia ani-manihini-hia oia ia tomo mai i roto i to outou oraraa !

62 Diakono apĪ roa
 Na Jane McBride Choate
E mäta'u rii to Benji no ni'a i te opereraa i te oro'a mo'a. E ti'a mau anei ia'na ia rave i te reira ?

64 I ni'a i te Tere : Te tia'iraa i Winter Quarters
 Na Jennifer Maddy

66 Ua tape'a te Feia Mo'a i Winter Quarters
 Na Arie Van De Graaff

67 Ite taa ê : E mea nahea Iesu Mesia e paraparau i te mau peropheta ?
 Na Elder D. Todd Christofferson

68 Tauturu ia Violette
 Na Charlotte Mae Sheppard
E mea rave ino noa Violette ia Emma. No te aha ia e mea titauhia ia Emma ia faaitte i te maitai i ni'a ia'na ?

70 Te afa'iraa mai te Paraimere i te fare : E faaitte au i te evanelia i te mau tamarii atoa a te Atua

72 Camille no te Oire no New York

74 Ta tatou api

76 Na te mau tamarii apĪ

81 Hoho'a no te peropheta : David O. McKay

ATOPA 2013 BUKA 15 NO. 3

LIAHONA 10790 895

Ve'a haamanahia na te ao taatoa nei a te Ekalesia a Iesu Mesia i te Feia Mo'a i te mau Mahana Hopea nei

Te Peresideniraa Matamua : Thomas S. Monson, Henry B. Eyring, Dieter F. Uchtdorf

Te Pūpū no te Tino Ahuru ma Piti Aposetolo :

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Papa'i ve'a faatere : Craig A. Cardon

Feia tauturu e haamaramarama : Shayne M. Bowen, Bradley D. Foster, Christoffel Golden Jr., Anthony D. Perkins

Faatere no te mau ve'a : David T. Warner

Ti'a faatere no te tururaa utuafare e te melo :

Vincent A. Vaughn

Ti'a faatere no te mau ve'a a te Ekalesia :

Allan R. Loyborg

Faatere ohipa : Garff Cannon

Faatere no te mau papa'iraa : R. Val Johnson

Tauturu papa'i ve'a faatere rahi : Ryan Carr, LaRene Porter Gaunt

Tauturu no te mau haapurararaa : Melissa Zenteno

Pūpū papa'i ve'a : Susan Barrett, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, Jennifer Grace Jones, Michael R. Morris, Richard M. Romney, Paul VanDenBerghe

Faatere no te mau hoho'a : J. Scott Knudsen

Faatere i te mau Ohipa Peniraa : Tadd R. Peterson

Pūpū ihi tauihaa nihi : Jeanette Andrews, Fay P. Andrus, C. Kimball Bott, Thomas Child, Nate Gines, Kerry Lynn C. Herrin, Colleen Hincley, Eric P. Johnsen, Susan Lofgren, Scott M. Mooy, Brad Teare

Taata faaau i te faturaa mana'o : Collette Nebeker Aune

Faatere no te hamaniraa : Jane Ann Peters

Pūpū ohipa hamaniraa : Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Auraa e te mau ve'a : Jeff L. Martin

Faatere no te nene'iraa : Craig K. Sedgwick

Faatere no te opereraa : Stephen R. Christiansen

No te mau tapa'oraa e te mau moni hoo i rapae au i te Fenua Marite e Canada, a farerei i te faatere no ta outou Pū hooraa buka aore rā te faatere no te paroiata aore rā amaa.

A hapono i te mau api parau e te mau aniraa na ni'a i te itenati i te liahona.lds.org ; na roto i te imere i te liahona@ldschurch.org ; e aore rā, na roto i te rata i te Liahona, Rm. 2420, 50 E. North Temple St., Salt Lake City, UT 84150-0024, USA.

Ua nenehina te Liahona (te hoē parau no te Buka a Moromonia, oia hoi, « aveia » aore rā « arata'i ») na roto i te mau reo Albania, Armenia, Bislama, Bulgaria, Cambodia, Cebuano, Tinito, Croatia, Czech, Danemata, Holane, Paratane, Estonia, Fiji, Finnilane, Farani, Purutia, Heleni, Hindi, Hungarian, Icelani, Indonesia, Italia, Tapone, Kiribati, Korea, Latvia, Lithuania, Malagasy, Marshallese, Mongolia, Norwetia, Polane, Potiti, Romania, Russia, Samoa, Slovenia, Swahili, Paniorea, Tuete, Tagalog, Tahiti, Thai, Tonga, Ukraina, Urdu, e Anami. (Te rahiraa taime e nenehia ai tei te huru ia o te reo)

© 2013 na Intellectual Reserve, Inc. Faturaa paruruhia. Nene'ihia i te Mau Hau Amui no Marite.

E nehenehe te mau papa'iraa e te mau hoho'a i roto i te Liahona ia tapithia no te faaohiparaa i roto i te Ekalesia aore rā i te utuafare eiaha rā no te hoo. Eita te mau hoho'a e nehenehe e tapithia mai te mea te vai nei te mau haaviraa i roto i te reni faaiteraa no te hoho'a. E tia i te mau aniraa no te parau faturaa ia faataehia i te Intellectual Property Office, 50 E. North Temple St., Salt Lake City, UT 84150, USA ; e-mail: cor-intellectualproperty@ldschurch.org.

For Readers in the United States and Canada

October 2013 Vol. 15 No. 3. LIAHONA (USPS 311-480) Tahitian (ISSN 1521 4761) is published four times a year (April, May, October and November) by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$4.00 per year; Canada, \$4.80 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Te mau mana'o no te pureraa pō utuafare

I roto i teie ve'a te vai nei te mau parau papa'i e te mau ohiparaa o te nehenehe e faaohipahia no te pureraa pō utuafare. Teie e piti mana'o.



HOHO'A FAAHOHO'ARAA NA CRAIG DIMOND

« Te riroraa ei misionare la Poro Haere i Ta'u nei Evanelia », api 46 :

A ferui ia aparau i roto i te utuafare i na titauraa e pae o te mau misionare *la Poro Haere i Ta'u nei Evanelia*. I muri iho a tamata ia faaohipa i na parau tumu. E nehenehe ta outou e hi'o amui vitiviti noa i te hoē tuhaa o te *la Poro Haere i Ta'u nei Evanelia* e e horo'a i te taime i te tahi mau melo o te utuafare ia haapiipii i te tahi mau tuhaa haapiiraa o te mau haapiiraa misionare, e a faairiro ai te tahi atu mau melo o te utuafare ia ratou ei mau hoa no te Ekalesia. E nehenehe ta outou e aparau i ni'a i te mau titauraa o te ohipa misionare e ia tuatapapa i te mau rave'a no te faananea i te mau titauraa i tatarahia mai e Elder David A. Bednar.

« la puai, ia tino maitai, ia maramarama », api 52 :

Ia oti outou i te ta'i o te papa'iraa a Elder Adrián Ochoa, a faanaho i te hoē ohipa ha'utiraa ia ti'a i te mau melo o to outou utuafare ia rave amui i te ohipa faa'ha'uti i te tino. E nehenehe ta outou e ha'uti i te hoē tu'aro e aore rā, e haere e orihaere. A faaau i ta outou ohipa ha'utiraa i ni'a i te matahiti e i te aravihi o te mau melo o te utuafare (ei hi'oraa, e nehenehe ta outou e ani i ta outou mau tamarii paari ia tauturu i te mau tamarii na'ina'i ia faaoti i te ohipa ha'utiraa). Ia oti ta outou ohipa ha'utiraa, a aparau e te utuafare taatoa i te mau maitai o te hoē oraraa e faaha'uti tamau i te tino. E nehenehe atoa ta outou e faanaho i te mau rave'a ia pee tamau noa te utuafare i te a'oraa a te mau peropheta ora no ni'a i te atuaturaa i te tatou tino.

NA ROTO I TO OUTOU REO

Te vai nei te Liahona e te tahi atu mau materia a te Ekalesia na roto i te mau reo e rave rahi i ni'a ia languages.lds.org.

TE MAU TUMU PARAU I ROTO I TEIE VE'A

Te faaite ra te mau numera i te api matamua no te parau papa'i.

- Aamu o te Ekalesia,** 64, 66
- Aroha,** 4, 20, 34, 68
- Ati,** 42, 64, 68
- Auhoaraa,** 39, 40, 72
- Autahu'araa,** 62, 76
- Ea,** 9, 52
- Episekopo,** 58
- Faahemaraa,** 51, 80
- Faaineineraa,** 26
- Faaitoitorea,** 4, 30, 38
- Faaoeraraa hapa,** 58, 68
- Faatureraraa (te mau),** 56, 80

- Fa'iraa,** 58
- Haavâraa,** 56
- Hau,** 34
- Heheuraa,** 67
- Hiero,** 18, 34
- Hi'oraa,** 12, 56
- Ia Poro Haere i Ta'u Nei Evanelia,** 42, 46, 54
- Iesu Mesia,** 7, 76
- McKay, David O.,** 81
- Ohipa misionare,** 20, 30, 40, 42, 46, 61, 70, 72
- Opuaraa, fâ,** 12, 54

- Parau ino,** 80
- Parau Paari,** 9, 51, 52
- Parau-ti'a,** 12, 51
- Peropheta (te mau),** 67
- Pionie (te mau),** 64
- Poieteraa,** 7
- Reo,** 80
- Tamarii (te mau),** 76
- Tatarahapa,** 58
- Te mau ateriputi huru Mesia,** 54
- Varua Maitai,** 41, 46



Na Peresideni
Thomas S. Monson

TA TATOU HOPOI'A IA faaora

No te Feia Mo'a i te mau Mahana Hopea nei, e ohipa faufaa mure ore te faaoraraa i to tatou mau taea'e e to tatou mau tuahine tei faaru'e i te e'a o te Ekalesia no tera e tera tumu. Ua ite anei tatou i te reira huru taata tei farii na i te evanelia? Mai te mea e, e, eaha ta tatou hopoi'a no te faaora ia ratou?

A feruri i tei mo'e i rotopu i tei ruhiruhia, tei ivi e tei ma'ihia. E mea pinepine ratou i te itehia i roto i te me-debara mārō e te mo'emo'e tei parauhia te vai-otahi-raa. Ia reva ana'e te tau apīraa, ia fifi ana'e te ea, ia paruparu ana'e te tino, ia morohi ana'e te maramarama o te ti'aturiraa, e nehenehe te reira e monohia e e paturuhia na te rima tauturu e te aau aroha.

Te vai ra vetahi ê atu o te hinaaro nei ia faaorahia. Te taffi nei te tahi pae i roto i te hara, are'a te tahi pae rā, te overe haere ra ia i roto i te mātā'u e aore rā, te tātū'a ore e aore rā, i te ite ore. Noa'tu eaha te tumu, ua faataa ê ratou ia ratou iho i te ohiparaa i roto i te Ekalesia. E e mea papū roa e, e vai mo'e noa ratou, maori rā, e ara mai i roto ia tatou—te mau melo haapa'o o te Ekalesia—te hoê hinaaro e haere e rave mai e e faaora.

Te hoê taata no te faaite i te haerea

I te hoê taimē i ma'iri a'enei, ua farii au i te hoê rata tei papa'ihia e te hoê taata tei faaatea i te Ekalesia. Te hoho'a mau tera o to tatou mau melo e rave rahi. I muri a'e i to'na faataaraa e mea nahea oia i ore ai e haapa'o faahou, ua papa'i oia :

« Ua rahi ho'i tei roaa ia'u e i teie nei, ua iti roa. Aita vau e oaoa nei e mai te huru ra e, aita vau e manu'ia ra i roto i te mau mea atoa. Aore roa te evanelia i faaru'e i to'u aau, noa'tu e, ua faaru'e oia i to'u oraraa. Te ani atu nei au ia pure no'u.

« Eiaha e haamo'e ia matou i ô nei—te Feia Mo'a i te Mau Mahana Hopea Nei tei mo'e. Ua ite au e, tei hea te Ekalesia, tera rā, i te tahi taimē te feruri nei au e, ua hinaaro vau i te tahi taata no te faaite mai ia'u i te e'a, no te faaitoito ia'u, no te iriti i to'u mātā'u, e no te faaite mai ia'u i te iteraa papū ».

A tai'o noa ai au i teie rata, ua haamana'o a'era vau i to'u haereraa e mata'ita'i i te hoê fare tuiroo no te mau hoho'a peni—te fare manaha Victoria and Albert i Lonedona, Peretane. Te vai ra i reira te hoê hoho'a nehenehe tei penihia i te matahiti 1831 na Joseph Mallord William Turner. I ni'a i taua hoho'a peni ra, e itehia te mau ata ereere e te miti puai, tapa'o faaite no te ati e te pohe. Te ama ra i te atea te mori o te hoê pahī tei iri. I mua roa nei, te hoê ia poti faaora taata tei tirihia e te are miti uouo ma te hu'a miti. Te huti ra te taata i te mau hoe ma te puai, i te taimē e patia te poti faaora i roto i te vero. I te pae tahatai te ti'a ra te hoê vahine e e piti tamarii, ua rari i te ua e ua pupuhia e te mata'i. Te tutonu noa ra ratou i tua ma te mātā'u. I roto i to'u feruriraa ua haapoto noa vau i te i'oa o te hoho'a peni. No'u nei, teie ia te i'oa *Haere e faaora*.¹

I roto i te vero o te oraraa nei, te ôere noa ra te ati. E ua iri te tane e te vahine, te tamaiti e te tamahine, e tei mua ia ratou te haamouraa. Na vai e arata'i i te poti faaora, ma te faaru'e i te hau o te nohoraa e te utuafare, e ia haere e faaora?

E ere ta tatou ohipa i te ohipa eita e maraa ia rave. Tei roto tatou i te ohipa a te Fatu ; ua ti'a tatou no te farii i Ta'na tauturu.

I te tau a tavini ai te Fatu, ua pii Oia i te feia ravaai i Galilea ia faaru'e i ta ratou upea e ia pee Ia'na, ma te parau atu e, « e faaairo vau ia outou ei ravaai taata ».² Ia



O ta'u nei pure ia roaa ia tatou te hinaaro ia faaora i tei paruparu e ia faaho'i mai ia ratou i roto i te oaoa o te evanelia a Iesu Mesia, ia ti'a ho'i ia ratou ia rave e o tatou nei i te mau mea atoa ta te ti'araa melo ti'amâ e horo'a mai.

Ia haere ana'e tatou e faaora i tei mo'e e ati a'e ia tatou nei : te ruhi-ruhia, te ivi, tei ma'ihia, te mau huma, te feia paruparu e o ratou o te ore e haapa'o nei i te mau faaueraa. Ia faatoro atu tatou ia ratou ra i te rima tauturu e i te aau aroha. A na reira ai tatou, e hopoi atu ia tatou i te oaoa i roto i to ratou aau, e e ite atu tatou i te oaoa e tae mai a tauturu ai tatou i te tahi atu taata i ni'a i te e'a e tae atu ai i te ora mure ore. ■

TE MAU NOTA

1. Teie te i'oa mau o te hoho'a peni *Life-Boat and Manby Apparatus Going Off to a Stranded Vessel Making Signal (Blue Lights) of Distress*.
2. Mataio 4:19.
3. Ephesia 2:19.
4. Hi'o Mataio 22:39.

amui ana'e mai tatou i te feia ravaai tane e te vahine, ia ti'a ia tatou ia tauturu mai te au i te nehenehe ia tatou.

E ohipa na tatou ia haere e faaora i te feia tei faaru'e i te vahi hau o te ohipa, ia ti'a ia ratou ia faaho'ihia mai i te amuraa a te Fatu no te fana'o i Ta'na parau, no te oaoa i te faahoa-raa o To'na Varua, e e ere atura « i te taata feia êê e te purutia, hoê atoa râ oire e te feia mo'a, e no te fetii o te Atua ».³

Te parau tumu o te here

Ua itehia ia'u e piti tumu rarahi no te ho'i faahou mai te taata i roto i te ohipa, e no te tau i te huru, te peu e te mau ohipa. A tahi, e ho'i mai te taata no te mea ua faaite te hoê taata ia ratou i to ratou mau rave'a mure ore ma te tauturu ia ratou ia faaoti i te mana'o ia rave i te reira. Eita te feia paruparu e nehenehe e oaoa maoro i roto i te faufaa ore ia ite ana'e ratou e, e roaa ia ratou te huru maitai roa.

A piti, e ho'i mai te tahi pae no te mea ua haapa'o te feia herehia e ratou, e aore râ, tei « hoê... [te] oire e te feia mo'a » i te a'oraa a te Faaora, e ua here i to ratou mau taata tupu

mai ia ratou iho ra,⁴ e ua tauturu ia vetahi ê ia faatupu i to ratou moemoea e to ratou mau hinaaro.

Te tao'a haapuai i roto i teie ohipa, o te parau tumu ia no te here—e e tamau noa te reira.

Te auraa mau, teie mau taata tei iri i ni'a i te miti arepurepu o te hoho'a peni a Turner, e au ia mai to tatou mau melo paruparu e rave rahi o te tia'i nei ia faaorahia na te feia e arata'i nei i te mau poti faaora. Te ti'aoro nei to ratou aau i te tauturu. Te pure nei te mau metua vahine e te mau metua tane no ta ratou mau tamaiti e ta ratou mau tamahine. Te taparu nei te mau vahine faaipoipo i to te ra'i ia roahia ta ratou tane faaipoipo. I te tahi taima te pure nei te tamarii no to ratou mau metua.

HAAPIIRAA NO ROTO MAI I TEIE PARAU PORO'I

Aferuri i te ani i te taata ta outou e hahaere e, ua mâtau anei ratou i te hoê taata o te fifi ra no te haere mai i te pureraa. E nehenehe ta outou e ma'iti i te hoê taata e ia aparau i te mau rave'a no te faaite i te here, mai te ani-manihini-raa ia'na ia haere mai i te pureraa pô utuafare e aore râ, ia haere mai e tamaa.

Te horo'a a Jen

Na Josi S. Kilpack

Ua rave au i te tahi mau ma'itiraa hape i ta'u matahiti piti i te haapiiraa tuarua. Ua arata'i te reira mau ma'itiraa i roto i te mau hopearaa fifi roa e te oaoa ore, e ua faoti a'era vau ia faahinga i ta'u tau faafaearaa no te haamata i te tau. Ia haamata faahou a'era te haapiiraa, ua tamaa vau i te avatea i roto i te hoê piha hopuraa pape, e aore râ, i roto i te hoê aroa taata ore ia ore ia tupu mai te mau aroa iino o te tia'i noa ra ia'u ia na reira faahou.

Aita â vau i mana'o otahi a'enei mai teie te huru.

E ua horo'a mai ra te Atua i te hoê horo'a ia'u : ua tono mai oia ia Jen. Aita roa'tu oia i faahapa ia'u i ta'u mau hapa,

ua faaitoito mai râ oia ia'u ia tamau noa i te haere i roto i te avei'a ti'a. Na to'u ite e, e haere mai oia i te haapiiraa, i tauturu ia'u ia tamau noa i te tai'o i ta'u mau papa'iraa mo'a e ia aupuru i to'u iteraa papû. Ia tae a'era i te taime no te haafetiaraa, ua parau vau ia'u iho e, ua fafau roa vau e tau.

Te uiui nei te mana'o i te tahi taime e, tei hea ia vau i teie mahana ahani e, aita o Jen i haere mai e farerei ia'u. E haapa'o anei au i ta'u mau parau tumu ahiri e, aita oia ? Aua'e râ, e ore roa vau e ite, no te mea, tei reira oia e to'na aau atoa, ua ineine e ua hinaaro mau e tauturu ia'u.


Te ora nei te taata papa'i i Utah, te mau Hau Amui no Marite.

TE MAU TAMARII

Te mau rave'a no te faaora

Te haapii nei te peresideni Thomas S. Monson e, e ti'a ia tatou ia haere e farerei ia vetahi ê, te feia ruhiruhia, te ivi, tei ma'ihia, tei paruparu, e o ratou

e titau nei i te tahi atu huru tauturu. A hi'o i te mau hoho'a i raro nei e a haamenemene i te mau hoho'a e faaite ra i te hoê mea e ti'a ia outou ia rave no te tauturu ia vetahi ê.



I ni'a i te mau reni i raro a'e, a papa'i i te tahi mau rave'a e nehenehe ia outou e tauturu ia vetahi ê. E nehenehe ta outou e faahinga i te mau hoho'a ei mana'o tauturu.

A tai'o i teie haapiiraa na roto i te pure, e a imi eaha te mea ta outou e faaite i te mau tuahine ta outou e hahaeere atu. Nahea te haroaroaraa i te oraraa e te misioni a te Faaora i te faarahi i to outou faaroo Ia'na e i te haamaitai i te feia ta outou e tia'i nei? No te mau haamaramaramaraa hau atu, a haere i ni'a ia reliefociety.lds.org.

Te misioni hanahana a Iesu Mesia : E Hamani

Teie te matamua o te mau parau poro'i no te hahaeereraa utuafare a te mau tuahine o te faaite nei i te mau huru o te misioni a te Faaora.


« Ua hamani Iesu Mesia i te mau ra'i e te fenua » (3 Nephi 9:15). Ua rave Oia i te reira na roto i te mana o te autahu'araa, i raro a'e i te arata'iraa a to tatou Metua i te Ao ra (hi'o Mose 1:33).

« E ti'a ia tatou ia mauruuru i te mea e, ua hamani mai te hoê Hamani paari i te hoê ao e ua tuu ia tatou i ô nei », te na reira ra te Peresideni Thomas S. Monson, « ... [ia] ite tatou i te taima tamataraa, te hoê rave'a no te haamaitai ia tatou iho ia ti'a ia tatou ia farii i te mau mea atoa ta te Atua i faaineine no tatou ». ¹ Ia faaohipa ana'e tatou i to tatou ti'amâraa no te haapa'o i te mau faaueraa a te Atua e no te tatarahapa, e riro mai tatou ei mea ti'amâ no te ho'i e ora i piha'i iho Ia'na.

No ni'a i te poieteraa, ua parau te peresideni Dieter F. Uchtdorf, tauturu piti i roto i te Peresideniraa Matamua :

« O tatou te tumu i hamani ai Oia i te ao nui !... »

« Teie te hoê haataupupuraa mana'o na te taata : ia faaauhia i te Atua, e mea faufaa ore te taata ; noa'tu râ, e mea



faufaa roa tatou no te Atua ». ² No te iteraa tatou e, ua hamani Iesu Mesia i te fenua nei no tatou no te mea o tatou te mea faufaa rahi no te Metua i te Ao ra, e nehenehe i te reira e faarahi i to tatou here no Raua.

No roto mai i te mau papa'iraa mo'a

Ioane 1:3 ; Hebera 1:1-2 ; Mosia 3:8 ; Mose 1:30-33, 35-39 ; Aberahama 3:24-25

TE MAU NOTA

1. Thomas S. Monson, « Te hororaa o te oraraa », *Liahona*, Me 2012, 91.
2. Dieter F. Uchtdorf, « E mea faufaa outou No'na », *Liahona*, Novema 2011, 20.
3. Iosepha Semita, i roto *E Mau Tamarii Tamahine i roto i To'u Basileia : Te Aamu e te Ohipa a te Sotaiete Tauturu* (2011), 191.
4. *E Mau Tamarii Tamahine i roto i To'u Basileia*, 191.
5. Iosepha Semita, i roto *E Mau Tamarii Tamahine i roto i To'u Basileia*, 189.



Te Faaroo,
Te Utuafare,
Te Totauturu

No roto mai i to tatou aamu

Ua hamanihia tatou ia au i te hoho'a o te Atua (hi'o Mose 2:26-27), e e faito puai hanahana to tatou. Ua a'o te peropheta Iosepha Semita i te mau tuahine i roto i te Sotaiete Tauturu ia « A Ora mai te au i to [ratou] haamaitairaa ». ³ Mai taua faaitoitoraa ei niu, ua haapiihia ia te mau tuahine i roto i Te Ekalesia a Iesu Mesia i te Feia Mo'a i te Mau Mahana Hopea Nei ia ora mai te au i to ratou faito puai hanahana na roto i te faatupuraa i te mau opuaraa a te Atua no ratou. « Ia noaa ana'e ia ratou te iteraa e o vai mau râ ratou—e mau tamarii tamahine na te Atua, e te hoê aravihi i roto ia ratou no te here e te aupuru—ua rae'ahia ia ia ratou to ratou hopearaa ei mau vahine mo'a ». ⁴

« Ua tuuhia outou i teie nei i roto i te hoê ti'araa i reira e nehenehe ai ia outou ia rave mai te au i taua mau hinaaro ra ta te Atua i tanu i roto i to outou mau ouma », te na reira ra te peropheta Iosepha Semita. « Mai te mea e ora outou mai te au i teie mau parau haapiiraa auê ia te faahiahia e te hanahana e !—mai te mea e ora outou mai te au i to outou haamaitairaa, eita ia te mau melahi e tape'ahia ia riro ei mau hoa ohipa no outou ». ⁵

EAHA TA'U E NEHENEHE E RAVE ?

1. Nahea te imiraa ia haro'aro'a tatou i to tatou huru hanahana i te faarahi i to tatou here i te Faaoara ?

2. Nahea e nehenehe ai ia tatou ia faaite i to tatou mauruuru i te mau poieteraa a te Atua ?

MANA'O NO TE AMUIRAA RAHI

Na Tina Spencer



« A feruri na, o vai te haere mai e tamaa i teie pô ? »

Ahuru ma pae mahana hou te haamataraa o te amuiraa rahi tata'itahi, e faatautau to matou utuafare i ta matou tapa'o faaiteraa i te haamataraa o te « A feruri na, o vai te haere mai e tamaa i teie pô ? » I muri iho, e tuu atu matou i te mau hoho'a apî roa a'e o to tatou mau peropheta, e hi'o e e heheu parau mai roto mai i te ve'a a te Ekalesia no ni'a i te amuiraa i ma'iri a'enei.

E faaineine au na roto i te imiraa i te peropheta ta matou e farii i taua pô ra. I te tahi taime, e imi au i te tahi mau tauihaa na rapae i te fare no te faahoho'a i te tahi mau mea tei itehia ia'u, e e tuu vau i te reira i ni'a i te hoê mereti. I te taime tamaaraa i te pô, ia faati'a ana'e au i te mau aamu no ni'a i te tauihaa tata'itahi, e imi te taata tata'itahi o vai taua taata ra. I te tahi atu taime, e faatia vau i te hoê aamu e aore râ, e piti, ta te peropheta i faatia i roto i te amuiraa rahi i ma'iri a'enei.

Ua maere au i te mau mea ta ta'u mau tamarii e haamana'o no ni'a i to tatou mau peropheta here e mau aposetolo, e ua ite au e, ua faarahi atoa teie ha'uti ohie roa i to'u here e i to'u ite no ni'a i teie mau taata rahi.

Ta'u iho nene'iraa no te amuiraa

I te haereraa mai o Elder Neil L. Andersen no te Püpü no te Tino Ahuru Ma Piti Aposetolo e ta'na vahine o Kathy, i roto i ta matou amuiraa tifi, ua faati'a mai te tuahine Andersen i te hoê aamu ia matou. Ua parau mai oia e, a ora ai ratou i Farani, ua nene'i faarahi oia i te mau a'oraa o te amuiraa na ta raua mau tamarii tata'itahi—e tae roa'tu i te mau tamarii apî roa. Ua hitimahuta oia i te iteraa i te moni hoo o te mau api nene'i, inaha, e moni rahi roa. Ua tupu mai ra te mana'o i roto i to'na feruriraa e : « Eaha te mea faufaa no oe ia farii to oe utuafare i te mau parau a te mau peropheta ? »

Ua putapû roa vau i teie aamu, e ua imi au i te rave'a ia farii te taata

tata'itahi i roto i to matou utuafare i te hoê nene'iraa no te mau a'oraa o te amuiraa. Ua anaanatae roa ta maua mau tamahine. Ua faaohipa matou i te reira i roto i te pureraa pô utuafare e i roto i te tuatapaparaa papa'iraa mo'a. Ua au roa vau i te hi'oraa i te hoê tamahine ia tai'o i te mau a'oraa o'na ana'e, e ia tapa'opa'i i te reira i te hoê peni. Hoê tamahine ta'u, no bapetizonoa-hia a'enei, ua ani mai ia'u ia tai'o maua i te mau a'oraa te tahi e te tahi.

Titauraa no te amuiraa

I roto i ta'u haapiiraa i roto i te Sotaiete Tauturu, ua titau vau i te mau tuahine tata'itahi ia hi'ohi'o faahou i te mau a'oraa no te amuiraa i ma'iri a'enei ; ua tai'oi'o faahou te tahi mau tuahine i te mau a'oraa, ua mata'ita'i te tahi pae i ni'a i te Itenati. E rave rahi tuahine tei parau e, ua ite ratou e, ua ineine maitai a'e ratou no te amuiraa i muri nei. ■

Te ora nei te taata papa'i i Washington, te mau Hau Amui no Marite.

TE ORA MAITAI O TE TINO E O TE FERURIRAA

No te tahi feia apï, e nehenehe te oreraa e faaohipa i te mau parau tumu o te ora maitai o te tino e riro mai ei haaffiraa ia ratou ia roaa te hoa e ia faatupu i te ti'aturiraa ia ratou iho. Hau atu i te reira, e mea faufaa te parau no te ora maitai o te tino e o te feruriraa, tera râ, aita te reira na tuhaa e haapa'o-maitai-hia ra i roto i te ohipa faaineineraa no te tavini i te hoê misioni. I roto i na api 52–53 o teie ve'a, te parau nei Elder Adrián Ochoa no te Hitu Ahuru e, mai te mea e, e aupuru tatou i to tatou tino, e nehenehe i te reira e paruru i te ora maitai o te tino e o te feruriraa. Te faahaama-na'o mai nei oia ia tatou ia faaha'uti i to tatou tino e ia haapa'o i te parau paari (hi'o PH&PF 89) e maitai ia to tatou ea e e rahi atu to tatou oaoa. Mai te mea e, e tauturu outou i ta outou mau tamarii ia haapii e ia faaohipa i te mau parau tumu o te ora maitai o te tino e o te feruriraa, e ti'a ia ia ratou ia faarahi i to ratou ti'aturiraa ia ratou iho e ia faaineine no te ohipa taviniraa a muri a'e.

Mai ta Elder Ochoa e parau nei : « Ia atuatu outou i to outou tino, e haamaitai atoa ia te reira i to outou feruriraa, e e tauturu ia outou ia haamana'o e, e tamarii outou na te Atua, e e nehenehe e roaa te ti'aturiraa e te oaoa. Ua nati-hoê-hia to tatou pae feruriraa, pae tino e te pae varua ».

Te mau mana'o tauturu no te haapii i te feia apï

- A tai'o amui i te papa'iraa a Elder Ochoa e a faanaho i te hoê faanahoraa ohipa faaetaetaraa tino na te utuafare ma te haapapû maitai i te mau fâ i te pae o te ea.
- A tai'o outou e ta outou mau tamarii taure'are'a i te tuhaa no ni'a i te ora maitai o te tino e o te feruriraa i roto i te *No te Puai o te Feia Apï* (te mau api 25–27). A aparau no ni'a i te auraa o te parau ra, te ora maitai i te pae o te feruriraa.
- A himene amui « Noa'tu te pe'ape'a » (*Te mau himene*, no. 60) e a aparau eaha ta te ti'a-faahou-raa e haapii mai nei ia tatou no ni'a i te faufaa o to tatou tino tahuti nei.
- A tuatapapa i te mau irava i tapurahia i roto i teie papa'iraa e a aparau i te mea ta te reira mau irava e haapii mai nei no ni'a i te ora maitai o te tino e o te feruriraa.

Te mau mana'o tauturu no te haapii i te mau tamarii

- A faaite i ta outou tamarii i te hoê hoho'a o te hiero. A aparau i te auraa o te mau parau a te aposetolo Paulo a haapii ai oia e, « e hiero to [tatou] tino no te Varua Maitai » (1 Korinetia 6:19) e nahea teie ite e nehenehe ai



TE MAU PAPA'IRAA MO'A

Maseli 16:32

Daniela 1:3–20

Luka 21:19

Roma 12:1–2

1 Korinetia 6:19–20

1 Tesalonia 5:14

Alama 38:12 ; 53:20

Te Parau Haapiiraa e
te Mau Parau Fafau
88:15 ; 89

e tauturu ia tatou ia atuatu i to tatou tino e to tatou feruriraa.

- A hamani i te hoê tapura no te mau ohipa faaoaoaraa maitai ta ta outou tamarii e hinaaro e rave e te utuafare. I muri iho a hamani i te hoê faanahonahoraa no te faariro i te reira mau faaoaoaraa ei tuhaa no te oraraa utuafare.
- A aparau i te mau rave'a no te haro'aro'a e no te arai i te mau mana'o o te aau, tae roa'tu i te riri e aore râ, te oto. A himene « Pour montrer ta joie » (*Chants pour les enfants*, 125), « Jésus-Christ est mon modèle » (*Chants pour les enfants*, 40), e aore râ, e tahi atu himene no ni'a i te mau mana'o o te aau e te raveraa i te mau ma'itiraa maitai. ■

TE MAU PARAU APÎ O TE EKALEZIA

A haere i ni'a i te news.lds.org no te tahi atu â mau parau apî e mau ohipa a te Ekalesia.

E nehenehe ta te mau melo e ani i to ratou reni mana autahu'araa

Na Ryan Morgenegg

Church News

I teie nei, ua ti'a i te Ekalesia ia horo'a i te reni mana autahu'araa i te mau melo atoa e titau mai i te reira. E tuatapaparaa te reni mana autahu'araa no te mau faatoro'araa e tae roa i te mau mahana matamua o te Ekalesia e tae roa'tu i te Faaora ra.

No te tahi mau reni mana autahu'araa, e itehia te tahi taata faatoro'a tei mau i te toro'a Hitu Ahuru, aita râ e reni mana taa ê tei tape'ahia no te toro'a Hitu Ahuru. Na reira atoa, no te reni mana autahu'araa o te mau episekopo e te mau patereareha tei faatoro'ahia, ua ravehia ta ratou reni ia au i to ratou toro'a tahu'a rahi.

O te mau reni mana Autahu'araa a Melehizedeka ana'e te noaa ia titau mai i te Ekalesia; aita te reni no te Autahu'araa a Aarona e noaa. E nehenehe ta te mau melo e ani i te reni mana Autahu'araa a Melehizedeka, te reni no ratou iho, te reni o te hoê tamarii e ora ra i to ratou fare e aore râ te reni o te hoê taure'are'a misionare e tavini ra i ta'na misioni. E ere teie mau parau i te mau parau mana na te Ekalesia.

Mai te mea ua hinaaro outou i te ani i to outou reni mana autahu'araa, a papa'i mai i to outou i'oa

ti'a, te tai'o mahana fanauraa, te numera no te parau meloraa (te vai ra i ni'a i te parau faati'a no te hiero e aore râ a ani i te papa'i parau o te paroisa), te i'oa o te taata tei faatoro'a ia outou i te toro'a peresibutero e aore râ tahu'a rahi (mai te peu te haamana'o ra outou), e tae noa'tu te vahi e haponu atu e te numera niuniu e aore râ te rata uira.

E haponu i ta outou aniraa i :

Priesthood Line of Authority

Global Service Center

120 North 200 West

Salt Lake City, Utah 84103-1514, USA

Rata taniuniu (fax) : 1-801-240-6816

Niuniu : 1-800-453-3860,

patapata atu ai te 2-3500

Rata uira (imere) : Haponu i te rata uira i te lineofauthority@ldschurch.org ma te parau « PLA » i ni'a i te reni no te tumu parau. Ia oti, e haponohia mai ia outou te hoê api parau e faai e e haponu faahou atu (na te matini e pahono i te mau rata uira atoa e te tumu parau « PLA »). ■



TE MESIA E FAATORO'A RA NA APOSETOLO E AHURU MA PITI, NA HARRY ANDERSON © IRI

E nehenehe te reni mana autahu'araa o te feia e rave nei i te mau oro'a e tuatapapahia e tae noa'tu i te Faaora ra.



Ua faahoho'a te mau taata ori e ta ratou tahiri i te numera « 20 » i roto i te hoê aru'i faahanahana i te 20raa o te matahiti o te Ekalesia i Mogolia.

Te faahanahana ra Mogolia i te 20 matahiti o te Ekalesia

I te monire 15 no eperera 2013, hau i te 300 melo o te Ekalesia tei putuputu i Zaisan Hill i Ulaanbataar, Mogolia, no te faahanahana i te 20raa o te matahiti o te Ekalesia i te reira fenua. Ua himene te hoê pûpû himene 50 taata, e ua faaroo te taatoaraa i te hoê haruharuraa no Elder Neal A. Maxwell (1926–2004) tei haamo'a ia Mogolia no te pororaa evanelia i te matahiti 1993.

No Elder Tai Kwok Yuen, e melo na mua a'enei no te peresideniraa Area no Asia, tei pee atoa ho'i ia Elder Maxwell i Mogolia i te matahiti 1993 ra, ua ite oia i te huru o to« te rima o te Fatu tura'i-tamau-noa-raa i roto i teie tuhaa no Ta'na ô vine ».

Ua rau te mau faaoaoaraa i faatupuhia i te roaraa o te hepetoma no teie faahanahanaraa. 200 misionare tahito tei tae mai i te hoê putuputuraa misioni. Hau i te 1000 feia Mogolia tei tavini ei misionare rave tamau—fatata roa 1 i ni'a i te 10 o te mau melo i Mogolia. Ua faatupuhia te tahi mau oro'a bapetizoraa na Mogolia taatoa i te mahana pae ra i te pô ; e 24 taata tei bapetizohia i tera mahana. Ua paraparau o Mary N. Cook, tei haamauuruuhia aita i maoro a'e nei i te peresideniraa rahi o te Feia Apî Tamahine, i roto i te hoê pureraa na te Feia Apî Tamahine, e ua faaha'utihia te hoê video no ni'a i te mau arata'iraa no

te opuaraa Family Tree i roto i te hoê opani iriti no ni'a i te aamu utuafare. Ua faaiteitehia i roto i te hoê aru'i rahi te hiro'a tumu e te mau taren i te mau melo o te Ekalesia e rave rahi.

Te Feia Mo'a i Haiti e faahanahana ra, ua tauturu ia tanu i te mau tumu raau

I te 1 no me 2013, ua amui te mau melo o te Ekalesia no Haiti i roto i te hoê opuaraa rahi ati a'e te fenua no te tanuraa i te mau tumu raau. E mano ohi tei tanuhia i te mahana matamua no te opuaraa, e e rave rahi â te haere mai nei. Ia oti te opuaraa, e tae'ahia e 400 000 tumu raau apî te tupu mai i Haiti, mai te taporo, te anani, te haari, te iita e te aluna.

Na te Ekalesia i hoo mai i te reira mau tumu raau ei tuhaa no to'na tururaa i te tâtâiraa ia Haiti i muri mai i te aueuaraa fenua. Ua faafana'o atoa teie opuaraa i te mau melo i te hoê ohipa tautururaa no te faahanahana i te 30raa o te matahiti o te Ekalesia i roto i te reira nunaa o te mau motu. A toru ahuru matahiti i teie nei, ua tere te peresideni Thomas S. Monson i Haiti, i tera ra tau, e melo noa ia no te Pûpû no te Tino Ahuru Ma Piti Aposetolo, e ua haamo'a oia i te fenua no te pororaa i te evanelia tei faaho'i-faahou-hia mai.

Ua ti'a o Elder Neil L. Andersen no te Pûpû no te Tino Ahuru Ma Piti Aposetolo i Haiti i te taime no te faahanahanaraa e

ua peresideni oia i te hohoraraa o te ofa'i haamana'o i te haamataraa o te Ekalesia i Haiti.

Ua horo'a te Ekalesia hoê mirioni paunu maa i te faanahoraa Feeding America

I te ava'e no me 2013 ra, na roto i ta'na amaa tauturu i te ao nei, te Latter-day Saint Charities, ua horo'a te Ekalesia hau i te hoê mirioni paunu maa i te faanahoraa Feeding America, te faanahoraa tauturu rahi roa a'e no te mau Hau Amui no Marite i te pae no te haamaharaa i te po'ia. I roto i taua maa horo'a ra, te vai ra te mau maa punu mai te mau maa hotu, te mau pota, te pipi, e e operehia te reira i te mau utuafare nava'i ore na roto i te tahi mau fare horo'a maa e te tahi mau fare farii otare na te mau Hau Amui no Marite paatoa.

Ua parau o Bob Aiken, te peresideni e te ti'a faatere rahi no Feeding America e, e faafana'o teie maa horo'a te tahi 625 000 tamaaraa.

Teie te mau misionare e te mau melo i Haiti, te tanu ra i te mau tumu raau i ni'a i te mou'a i ni'a a'e i te oire no Port au Prince, o te itehia nei i muri roa mai.



HOHOA NA JASON SWENSEN

HOHOA' A HO' MAHIA E TE MISIONI NO MOGOLIA ULAANBATAAR MISSION



Na Elder Quentin L. Cook

No te Pūpū no te Tino Ahuru
ma Piti Aposetolo

Pinepine te peresideni David O. McKay (1873–1970) i te faati'a i te hoê aamu tei tupu i te tau a riro ai oia ei misio-nare i te fenua Ekotia. I muri noa a'e i to'na tomoraa i roto i te misioni ua mihimihi rii oia i te fenua e ua haere oia e mata'ita'i haere i te pare nui no Stirling tau hora te maoro. A faaoti ai raua e to'na hoa i te mata'ita'i i te pare nui, ua haere raua na piha'i iho i te hoê fare e ua ite atu raua i te hoê ofa'i i ni'a a'e i te opani e te hoê papa'iraa i ni'a iho, mai te mea ra e, e parau te reira na Shakespeare, te na ô ra e, « Noa'tu eaha to oe huru, a rave maitai i ta oe tuhaa ».

A haamana'o ai oia i taua ohipa ra, ua parau te peresideni McKay e : « Na ô a'era vau ia'u iho, e aore râ, te Varua i roto ia'u e, 'E melo oe no Te Ekalesia a Iesu Mesia i te Feia Mo'a i te Mau Mahana Hopea Nei. Hau atu i te reira, tei



A RAVE
MAITAI
I TA OE
TUHAA

Riro ei taata parau-ti'a. Faatupu i te hoê utuafare. Imi i te rave'a tano no te imi i te ora. Tavini mai tei piihia. Faaineine no te farerei i te Atua.

Ô nei oe ei ti'a no te Fatu o Iesu Mesia. Ua farii oe i te hopoi'a ia riro ei ti'a no te Ekalesia'. E ua haamana'o a'era vau i te ohipa ta maua i rave i taua po'ipo'i ra. Ua haere maua e mata'ita'i ; e parau mau, ua roaa ia maua te tahi ite e te tahi haamaramaramaraa aamu, e ua oaoa roa vau no te reira ... Tera râ, e ere te reira i te ohipa misionare ... Ua farii au i te poro'i tei horo'ahia mai ia'u i ni'a i taua ofa'i ra, e mai taua taime ra, ua tamata a'era maua ia rave i ta maua tuhaa ei misionare i Ekotia ».¹

Ua riro teie poro'i ei poro'i faufaa roa e ua haaputapû te reira i te peresideni McKay e ua faaohipa oia i te reira ei faaûruraa no te toe'a o to'na oraraa. Ua faaoti a'era oia e, noa'tu te huru o ta'na hopoi'a, e rave maitai roa oia i te reira.

Eiaha e rave taa ê atu i te huru mau

Ia au i te faito puai rahi no te maitai e vai ra i roto ia outou e te u'i apî o te Ekalesia, eaha ta'u mana'ona'oraa no to outou ananahi ? Eaha te a'o ta'u e nehenehe e horo'a'utu ia outou ? A tahi, e farerei outou i te hutihutiraa rahi no te faarave ia outou i te ohipa aita i au i to outou huru—ma te tamau roa i te hoê tapo'i mata—e ia riro mai ei taata e ere i to outou huru mau e aore râ, mai te taata o ta outou e hinaaro ia riro.

I te omuaraa o te aamu o te Ekalesia, te noho ra te peropheta Iosepha, o Emma e ta raua na maehaa hoê ahuru ma hoê ava'e, o Joseph e o Julia, i Hiram, Ohio, i te fare no John e Alice Johnson. Te pohehia ra na tamarii i te ma'i puupuu (rougeole). Te taoto noa ra o Iosepha e ta'na tamaiti iti i ni'a i te hoê ro'i i piha'i iho i te uputa no mua.

I te pô, ua tomo mai ra te hoê pûpû taata tei penihia te mata i te peni ereere i roto i te fare e ua huti i te peropheta i rapae, e ua ta'iri ia'na e ua manii i te tâ i ni'a ia'na e ia Sidney Rigdon.

Te vahi pe'ape'a roa'utu o teie hamani-ino-raa, o Iosepha na'ina i ia, i te mea e, ua vai noa oia i mua i te matai o te pô, e ua putahia i te to'eto'e, e te afa'i-ê-hia ra ia to'na metua tane. E no reira, tau mahana i muri mai, ua pohe oia.²

HOHO'A NO ELDER QUENTIN L. COOK NA CRAIG DIMOND ; HOHO'A FAAHO'ORAA NA SCOTT DAVIS

Te feia tei rave i teie maratiri i ni'a i te peropheta e to'na taea'e o Hairamu, ua peni atoa ratou i to ratou mata no te huna i to ratou hoho'a mau.³

I to tatou nei anotau, e mea ohie roa'tu ia huna i to tatou iho huru mau, tera râ, te vai ra te mau ture faufaa i roto i te parau no te oreraa e tamau i te hoê tapo'i mata e « haapa'o tatou i te evanelia... [te tumu i pohe ai ratou] ».⁴

Hoê o to outou paruru rahi a'e i mua i te raveraa i te mau ma'itiraa ino maori râ, o te oreraa ia e tamau i te hoê noa'tu tapo'i mata no te huna i to outou huru mau. Mai te mea noa'tu e, e tupu mai te hinaaro i roto ia outou ia rave



Ua rave maitai Elder L. Tom Perry i ta'na tuhaa a parahi ai oia i te fenua Tapone.

i te reira, ia ite mai outou e, e tapa'o papû te reira no te ati e o te hoê ho'i te reira mauhaa na te enemi no te faarave ia outou i te hoê mea eita e ti'a ia outou ia rave.

E ohipa matarohia i teie mahana ia huna i te i'oa ia papa'i ana'e te hoê taata i te mau parau riri e te faaino i ni'a i te Itenati. Te parau nei te tahi pae e mau parau *ura*.

Ua papa'i te aposetolo Paulo e :

« Eiaha e vare, e ino te parau maitai i te amuiraa iino ra.

« E ara e ti'a'i, eiaha e rave i te hara ; aore ho'i te hoê pae i ite i te Atua » (1 Korinetia 15:33–34).

E mea maramarama maitai e, e ere te mau parau iino i ta te peu iino noa. Mai te mea e, na te Feia Mo'a i te Mau Mahana Hopea Nei e rave i te reira, e riro ia i te faaino i te feia aore i ite i te Atua e aore râ, aore e iteraa papû no ni'a i te Faaora.

Mai te mea e, e faaohipahia te Itenati no te haamäta'u, no te faaino i te roo, e aore râ, no te tuu i te hoê taata i

roto i te hoê hi'oraa ino, e faahapahia ia te reira e te ture. Te ite nei tatou i roto i te oraraa sotaiete nei e, ia tamau ana'e te taata i te tapo'i o te hunaraa i'oa, e mea ohie no ratou ia rave i teie huru ohipa tei riro ei ohipa haamou rahi i te paraparauraa tano. Te ofati atoa ra te reira i te mau parau tumu ta te Faaora i haapii mai.

Ua faaite mai te Faaora e, aita Oia i haere mai no te faahapa i to te ao nei, no te faaora râ. I muri iho ua faataa mai Oia i te auraa o te parau ra, faahapa :

« Teie taua faahapa ra, o te maramarama ua tae mai i te ao nei, e hinaaro a'enei te taata i te pouri, aore te maramarama, no te mea te ino ra ta ratou parau.

« O tei mau i te parau ino ra, aore oia i hinaaro i te maramarama ; e ore hoi oia e haere mai i te maramarama o te itea ta'na parau.

« O tei haapa'o ra i te parau mau ra, e tae mai ia i te maramarama ia itea-maitai-hia e, te au ra ta'na parau i te Atua » (Ioane 3:19–21 ; a hi'o atoa irava 17–18).


Aita e faufaa no te feia parau-ti'a ia tamau i te tapo'i mata no te huna o vai ratou.

A rave i te ohipa mai te au i to outou mau ti'aturiraa mau

E rave outou i te ohipa mai te au i to outou mau ti'aturiraa mau na roto i te horo'araa i to outou taime i roto i te mau mea o te patu e o te faahotu i to outou huru e o te tauturu ia outou ia rahi atu te riroraa mai te Mesia te huru. Maitai e, aore roa hoê o outou e faaairo nei i te oraraa ei taime arearearaa e te ha'utiraa na mua roa, e faaairo râ i te reira ei taime no te « faaineine... ia farerei i te Atua » (Alama 34:32).

Hoê hi'oraa nehenehe no ni'a i te parau o te raveraa i ta outou tuhaa e te faaohipa-ti'a-raa i te taime no roto mai i te oraraa o Elder L. Tom Perry no te Pūpū no te Tino Ahuru Ma Piti Aposetolo, a riro ai oia ei faehau i roto i te nuu o te Hau Amui no Marite, i te fenua Tapone i te hopea o te tama'i II no te ao nei. Ua faaite mai Elder Perry i teie aamu i te taime a papa'i ai oia i to'na iteraa papû taa ê no ni'a i te Faaora.

« Tei roto vau i te pūpū matamua o te mau faehau marite « Marines » tei tae i te fenua Tapone i muri a'e i te tuurimaraahia te parau no te hauraa te Tama'i II o te ao nei. A tomo ai matou i roto i te oire no Nagasaki tei nina-roa-hia, ua riro ia ei hoê o te mau iteraa oto roa a'e o to'u oraraa. Ua mou roa te hoê tuhaa rahi o te oire. Aitâ te tahi mau tino pohe i oti atura i te hunahia. E nuu haru fenua matou, e ua faati'a matou i to matou vahi faatereraa e ua haamata i te rave i te ohipa.



*Hoê o to outou paruru
rahi a'e i mua i te rave-
raa i te mau ma'itiraa
ino maori râ, o te oreraa
ïa e tamau i te hoê noa'tu
tapo'i mata no te huna i
to outou huru mau.*

« E mea huru horiri te ohipa i taua taime ra, e ua hinaaro te tahi pae o matou e horo'a rahi atu â. Ua haere matou e farerei i to matou raatira faaroo no te ani i te parau faati'a ia tauturu i te patu-faahou-raa i te mau fare pureraa. Na roto i te mau haavîraa a te faatereraa hau i roto i te tau o te tama'i, ua fatata roa teie mau fare pureraa i te opani. Ua ino roa teie mau fare pureraa, aita ho'i e rave rahi roa. Ua horo'a te tahi pae o matou i to matou taime no te tâtâi i teie mau fare pureraa i roto i ta matou mau hora faafaearaa, ia nehenehe i te reira ia riro faahou ei vahi pureraa na te feia Keresetiano.

« ... Ua itehia ia matou te mau orometua tei ore e nehenehe e faatere i ta ratou ohipa i roto i te mau matahiti o te tama'i, e ua faaitoito matou ia ratou ia ti'a faahou i te terono ra. Ua farii matou i te mau iteraa faahiahia i rotopu i teie mau taata a ti'a ai ia ratou ia rave faahou i te mau ohipa o to ratou faaroo Keresetiano.

« Ua tupu a'era te hoê ohipa i te taime a faaru'e ai matou ia Nagasaki no te ho'i i te fenua e o ta'u e haamana'o tamau noa. A ta'uma ai matou i roto i te pereoo auahi o te afa'i atu ia matou i to matou mau pahi no te ho'i i te fenua, ua faaôô mai e rave rahi mau faehau « marines » ia matou. E mau hoa tamahine to piha'i iho ia ratou e te aroha ra ia ratou no te taa-ê-raa. Ua ata ratou ia matou ma te parau mai e, ua ere matou i te mau mea arearea a parahi ai matou i Tapone. Ua haamau'a matou i to matou taime i te tâtâiraa i te mau papa'i fare.

« I te taime mau a puai roa ai ta ratou mau faaôôraa, i ni'a rii a'e i te vahi tape'araa pereoo auahi, te haere mai nei fatata e 200 o teie mau Keresetiano Tapone no te mau fare pureraa ta matou i tâtâi, ma te himene 'Ei Faehau Faaroo'. Ua haere mai ra ratou e ua horo'a mai ra i te mau tao'a horo'a na matou. I muri iho, ua ana'i ratou ia ratou na te hiti i te reni tereraa pereoo auahi. E a haamata ai te pereoo auahi i te tere, ua faatoro matou i to matou mau rima no te tape'a i to ratou mau rima. Aita ta matou e nehenehe e parau i te hoê parau ; ua putapû rahi to matou aau. Tera râ, ua oaoa matou i te mea e, ua ti'a ia matou ia tauturu rii i te faati'a-faahou-raa i te Keresetiano i roto i te hoê nunaa i muri a'e i te tama'i ».⁵

A feruri hohonu e a haapa'o maitai ia ma'iti outou i te huru no te faaohiparaa i to outou taime. Mai ta outou e ite nei i roto i te hi'oraa a Elder Perry, aita vau e parau nei ia vai noa ta outou haapa'oraa i ni'a i to outou rima ahu e aore râ, ia riro noa mai te tahi parairaa faaroo. E riro ia ei mea huru fifi rii no outou e no te Ekalesia. Te parau nei râ vau no to outou riroraa mai te au i tei titauhia ia outou.

A haamau i te mau opuaraa tano

Te toru o ta'u parau a'o, no ni'a ia i te tahi mau opuaraa o te ti'a ia outou ia feruri. I te taimē tei te fenua Tapone o Elder Perry i rotopu i te mau « marines », te tavini ra ia te peresideni Boyd K. Packer, peresideni no te Pūpū no te Tino Ahuru Ma Piti Aposetolo, i te fenua Tapone i roto i te nuu no te reva i te hopea no te Tama'i II o te ao nei.

I te matahiti 2004 ua apee atu vau i te peresideni Packer e vetahi ê atu i te fenua Tapone. Ua ti'a ia'na ia faaite i te tahi mau tuhaa e ia feruri i te tahi mau iteraa e te tahi mau



Ua haamaitahia Boyd K. Packer no to'na haamauraa i te mau opuaraa maitai.

faaotiraa ta'na i rave i taua taimē ra. Na roto i ta'na parau faati'a, te faaite atu nei au i te tahi o to'na mau feruriraa e te mau mana'o.

Ua faaite mai te peresideni Packer i te mau ohipa tei tupu i ni'a i te hoê motu i te atea ê i te fenua Okinawa. Te faariro nei oia i te reira ei mou'a no'na i roto i te me-debara. Na to'na faaineineraa ia'na e to'na farereiraa i te tahi atu mau melo i faahohonu i to'na ti'aturiraa i te mau haapiiraa o te evanelia. Te mea râ e toe ra, o te haapapûraa ia—te hoê ite papû e, e parau mau te mea ta'na i mana'o a'e.

Ua tape'a mai te taata papa'i aamu o te peresideni Packer i te mea tei tupu : « Ei pahonora i te hau o te haapapûraa ta'na i imi, teie oia i mua i te ino rahi o te tama'i i ni'a i te feia hapa ore. I te hoê mahana, ua imi oia i te hoê vahi mo'emo'e no te feruri, ua ta'uma oia

i te hoê vahi teitei fâa'o i te moana. I reira ua ite oia i te toe'a o te hoê fare na'ina'i tei parari roa, e te faaapu umara i piha'i iho tei faaru'ehia. E i rotopu i te mau raa tanu te pohe atura, ua ite atu oia i na tino pohe o te hoê metua vahine e ta'na na tamarii e piti. Ua tupu te oto rahi i roto ia'na i te iteraa i te reira, ma te ano'ihia i te mau mana'o o te here i to'na iho utuafare e i te mau utuafare atoa ».⁶

Ua haere atura oia i roto i te hoê apaapa fare paruru, i reira to'na mana'ona'oraa, te feruriraa e te purerara. A hi'o faahou ai oia i muri i ni'a i teie ohipa, ua faaite mai te peresideni Packer i te mea ta'u e nehenehe e parau e, te hoê iteraa pae varua no te haapapû. Ua tupu te faaûruraa i roto ia'na no ni'a i te ohipa e ti'a ia'na ia rave i roto i to'na oraraa. Aita roa oia i feruri e, e piihia oia i roto i te hoê piiraa teitei e te mo'a o ta'na e mau nei i teie taimē. Ta'na hi'oraa oia ho'i ia, ua hinaaro oia ia riro ei orometua haapii, no te haapapû i te mau haapiiraa a te Faaora. Ua faaoti a'era oia e, e ora oia i te hoê oraraa parau-ti'a.

Ua ite roa a'era oia e, e ti'a ia'na ia imi i te hoê vahine parau-ti'a e ia faatupu amui raua i te hoê utuafare rahi. Ua ite teie faehau apî e, te toro'a ta'na i ma'iti, e mea iti roa ia te apî ta'na e horo'a mai, e e titauhia i to'na hoa here ia farii i taua mau mea matamua ra, e ia farii ia ora ma te ore e farii i te tahi mau mea o te tino nei. No te peresideni Packer, ua riro e te riro nei ho'i te tuahine Donna Packer ei hoa maitai hope no'na. Aita ta raua moni i rahi, aita râ raua i ere i te hoê noa a'e mea. Ua fanau raua 10 tamarii, e ua faatusia raua. E 60 mootua ta raua e hau atu i te 80 hina i teie nei.

Te faaite atu nei au i teie aamu parau mau no te mea, pinepine roa ta tatou mau opuaraa i te faatumuhia i ni'a iho i te mau mea e haafaufaahia nei e to te ao nei. E mea ohie roa te mau mea faufaa no te mau melo tei farii i te mau oro'a no te faaoraraa. Riro ei taata parau-ti'a. Faatupu i te hoê utuafare. Imi i te rave'a tano no te imi i te ora. Tavini mai tei piihia. Faaineine no te farerei i te Atua.

Ua haapii mai te Faaora e « e ere hoi tei taua tao'a na'na ra to'na ora » (Luka 12:15).

Patu i to outou fenua e to outou oire

Taa ê noa'tu i to outou huru taata, to outou mau ite, e ta outou mau faaotiraa, ia riro noa'tu outou i te u'i tei titauhia ia outou ia riro, e patu ia outou i to outou fenua e to outou oire i te vahi e orahia ra e outou. E titauhia i to outou u'i ia paruru i te parau-ti'a e te ti'amâraa o te faaroo. E ere te faufaa ai'a Keresetiano e Ati Iuda i fatuhia e tatou i te hoê noa mea tao'a rahi, e mea faufaa atoa râ no te faanahoraa a to tatou Metua i te Ao ra. Ua titauhia ia tatou ia faaherehere i te reira no te mau u'i no ananahi. Ua titauhia ia



E ere te faufaa ai'a keretiano Atiuda i fatuhia e tatou i te hoê noa tao'a rahi, e mea faufaa atoa râ no te faanahonahoraa a to tatou Metua i te Ao ra. Ua titauihia ia tatou ia faaherehere i te reira no te mau u'i no ananahi.

tatou ia amui atu i te mau taata maitai, tae roa'tu i te mau taata no te mau huru faaroo atoa—te feia ihoa râ e feruri nei e, e hopoi'a ta ratou i te Atua no to ratou huru oraraa. Teie te mau taata e haro'aro'a i te parau a'o ra e, « Noa'tu eaha to oe huru, a rave maitai i ta oe tuhaa ». E riro te manuiaraa o te haafaufaraa i te mau tumu parau Kerese-tiano e Ati Iuda e i te ti'amâraa o te faaroo, i te faariro i to outou u'i ei u'i rahi mai tei titauihia.

Na roto i te mau titauihia teimaha e vai nei i roto i te ao nei i teie mahana, e mana'ona'o rahi to te Peresideniraa Matamua e to te Pūpū no te Tino Ahuru Ma Piti Apose-tolo ia tomo outou ma te au maite i roto i te tereraa ohipa poritita i roto i te fenua ta outou e noho na. E ti'a noa te Ekalesia i ropu i te mau hororaa poritita e aita oia e paturu i tera e tera taata e aore râ, i tera e tera pūpū poritita. Tera râ, te hinaaro nei matou i to tatou mau melo ia faao hope roa ratou ia ratou i te patururaa i te taata e i te pūpū ta ratou i ma'iti ia au i te mau ture e paruru atu i te faatereraa hau maitai. E mea maramarama maitai ta tatou haapiiraa tumu : « e mea ti'a roa ia ma'imihia te mau taata parau-ti'a e te mau taata paari hoi » (PH&PF 98:10).

E ti'aturi rahi to matou ia outou. Te ti'aturi nei te faa-tereraa o te Ekalesia e, e nehenehe ta outou e patu i te basileia mai hoê u'i o te ore e faaauhia i te hoê u'i i tahito ra. Tei ia outou na to matou here e to matou ti'a-turiraa e tae noa'tu i ta matou mau pure e ta matou mau haamaitairaa. Ua ite matou e, e mea faufaa te manuia o to outou u'i no te haamauraa tamau o te Ekalesia e no te tupuraa o te basileia. Te pure nei matou ia rave maitai outou i ta outou tuhaa, ma te ore e tamau i te hoê tapo'i mata, e ma te rave i te ohipa ia au i to outou huru mau, ia haamau i te mau opuaraa ti'a, e ia patu i to outou fenua e to outou oire. ■

No roto mai i te hoê Pureraa Pae Auahi na te feia apî paari i roto i te faanahoraa haapiiraa a te Ekalesia i te fare haapiiraa no BYU-Idaho i te 4 no mati 2012. No te taatoaraa o te papa'iraa na roto i te reo peretane, a haere i ni'a i te Itenati, lds.org/broadcasts/archive/ces-devotionals/2012/01?lang=eng.

TE MAU NOTA

1. David O. McKay, i roto Francis M. Gibbons, *David O. McKay: Apostle to the World, Prophet of God* (1986), 45.
2. Hi'o Mark L. Staker, « Remembering Hiram, Ohio », *Ensign*, Atopa 2002, 32, 35.
3. Hi'o *Te Mau Haapiiraa a te Mau Peresideni o te Ekalesia : Iosepha Semita* (2007), 25.
4. « A Haapa'o tatou i te evanelia », *Te mau himene*, no. 156.
5. L. Tom Perry, i roto i te « Joy—for Us and Others—Comes by Following the Savior », <http://lds.org/prophets-and-apostles/what-are-prophets-testimonies?lang=eng>.
6. Lucile C. Tate, *Boyd K. Packer : A Watchman on the Tower* (1995), 58–59.

TE FEIA APÎ E TE MAU FAFAURAA O TE HIERO

Na Gary and Susan Carter

E i feia rave ohipa no te hiero, ua farii matou i te haamaitairaa ia farerei i te feia paari apî e haere mai nei i te hiero no te farii i to ratou iho oro'a hiero. Teie ta matou i ite, ua tauturu maitai te hoê haapiiiraa faaineineraa no te hiero ia ratou, tera râ, e mea faufaa atu te faaûruraa a te mau metua e te feia faatere maitai no te tauturu ia ratou ia faaineine no te rave i te mau fafauaraa o te hiero. Tatou te mau metua, titauhia ia tatou ia tauturu i te feia apî eiaha i te faaineine-noa-raa no te ohipa misionare rave tamau o te hope i roto i te tahi tau ava'e noa, e faaineine atoa râ no te rave e no te haapa'o i te mau fafauaraa o te hiero o te vai e a tau a hiti noa'ûtu. E nehenehe i te tahiraa matamua e haamata i te tamariiriiraa.

Faaineine i te mau tamarii

E nehenehe ta te mau metua e faaite i ta ratou mau tamarii i te faufaa o te hiero na roto i te haereraa e haamori i roto i te hiero e na roto i te faaiteraa i to ratou iteraa papû no ni'a i te ohipa o te hiero. Noa'ûtu e, tei roto outou i te mau fenua eita e nehenehe e haere pinepine i te hiero, e nehenehe ta te mau metua e faatupu i roto i ta ratou mau tamarii i te hinaaro ia haere i te hiero.

Ua haapii mai te peresideni Howard W. Hunter (1907–95) i te mau metua e : « E faaite tatou i ta tatou mau tamarii i te mau mana'o pae varua tei roaa ia tatou i roto i te hiero. E e haapii maite atu tatou ia ratou e ma te au i te mau mea o ta tatou e nehenehe e parau no ni'a i te mau opuaraa o te fare o te Fatu ».¹ E ti'a i ta tatou mau tamarii ia ite e, te hiero, e vahi ia i reira tatou e farii ai i te mau pahonora a

ta tatou mau pure e i reira tatou e ite ai i te here o te Atua.

E nehenehe atoa i te mau metua e haapii i ta ratou mau tamarii ia ti'a i e ia ora ma te parau-ti'a no te hoê parau faati'a tei ta'oti'ahia, o ta ratou ia e nehenehe e farii mai te mea ua ti'amâ ia tae'ahia to ratou matahiti i te 12. Ia tae ana'e te taima no teie mau feia apî no te tomo i roto i te hiero, e ite tatou i to ratou oaoa e te haapeu ia faaite i te reira parau faati'a i te hiero.


Faaineine i te Feia apî

E nehenehe i te mau metua e tauturu i ta ratou mau tamarii ia rave i te ohipa ma'imiraa i te aamu utuafare ia ti'a ho'i ia ratou ia hopoi i te mau i'oa o

te utuafare i te hiero ia tae'ahia to ratou matahiti i te 12. I te feia apî e rave nei i te reira, ua fafau mai Elder David A. Bednar no te Pûpû no te Tino Ahuru Ma Piti Aposetolo e : « E tupu rahi to outou here e to outou mauruuru no to outou tupuna. E riro to outou iteraa papû e te faafariuraa i te Faaora ei mea hohonu e te tamau noa. E te fafau nei au e e paruruhia outou i mua i te faahemaraa onono a te enemi ».²

Ua ite tatou e rave rahi hi'oraa o teie fafauaraa i te tupuraa. Aita i maoro a'enei ua parau mai te hoê vahine apî ia matou e, i muri a'e i to'na ma'imiraa i te i'oa o to'na mama ruau, ua haere mai oia i te hiero no te rave i to'na mau oro'a. Ua parau oia e, i te taima a bapetizohia ai oia no to'na mama ruau, ua puta mai te hoê iteraa papû i roto ia'na e, e haamauruuru mai oia ia'na i roto i te oraraa a muri a'e. Na teie mau huru iteraa e haapuai i te iteraa papû e e faatupu i te hinaaro ia rave i te tahi atu â mau oro'a i te hiero.





E rave rahi feia apî e farerei nei i te mau faahemaraa ia ahu i te ahu tano ore. Ia oomo ana'e te mau metua e te feia faatere i te mau ahu nehenehe e te au maitai o te nehenehe e tapo'i i te ahu hiero, e ite ia te feia apî e, e nehenehe atoa ta ratou e na reira. E ti'a i te feia apî ia ite e, na te huru o ta ratou ahuraa e te huru no ta ratou raveraa i to ratou tino e faaite mai i te huru o to ratou ti'araa pîpî.

E nehenehe i te mau metua e tauturu i te feia apî ia faaineine no te tomo i roto i te hiero na roto i te tautururaa ia ratou ia maramarama i te mau fafauraa ta ratou e rave i reira. I roto i te mau fafauraa o te hiero te vai ra te mau euheraa ia « haapa'o i te ture no te peu ti'a e te viivii ore, ia riro ei taata aroha, horo'a i te taima, te huru farii e te mâ ; ia horo'a i te tareni e te mau rave'a no te haaparare i te parau mau e no te faati'a i te [utuafare taata nei] ; ia haapa'o tamau noa i te parau mau ; e ia imi i te mau rave'a atoa ia tauturu i te faaineineraa rahi ia ineine te fenua no te farii i to'na Arii—te Fatu o Iesu Mesia ».³ E nehenehe i te mau metua e faaite papû e, e farii te feia apî i to ratou iho mau haamaitairaa puai i roto i to ratou oraraa mai te mea e, e haapa'o ratou i teie mau fafauraa, e e riro mai teie mau fafauraa ei mau mea faufaa roa no te feia apî na roto i te tautururaa a te mau metua ia ite ratou e, e tupu te mau haamaitairaa e te mau fafauraa na roto i te Taraehara a Iesu Mesia.

Ua rau te mau rave'a e nehenehe ta tatou e tauturu i te faaineineraa i ta tatou mau tamarii e i te feia apî ia farii i te mau haamaitairaa o te hiero. Rahi atu to ratou ineine, rahi atoa'tu te hau e roaa ia ratou e te Varua e fariihia, e na roto i te reira, e roaa ai ia ratou te mau iteraa pae varua rarahi, a farii ai ratou i to ratou oro'a hiero. Na roto i te hoê iteraa maitai no ni'a i te hiero e fafau rahi ai ratou ia ratou iho ei pîpî na te Mesia e ei mau misionare maitai a'e—ma te mana'o puai ia tauturu i te feia ta ratou e haapii ia faaineine no te farii i to ratou iho mau oro'a mo'a no te hiero. ■

TE MAU NOTA

1. Howard W. Hunter, « Follow the Son of God », *Ensign*, Novema 1994, 88.
2. David A. Bednar, « E Riro te Aau o te mau Tamarii i te Fariu mai », *Liahona*, Novema 2011, 26–27.
3. James E. Talmage, i roto i te *Preparing to Enter the Holy Temple* (2002), 34–35.

TA TATOU faufaa ai'a rahi misionare

E tavini te mau misionare taatoa, to tei tahito ra e to teie anotau, ma te ti'aturi ia faatupu i te hoê oraraa maitai a'e no te tahi atu mau taata.

**Na LaRene Porter Gaunt
e o Linda Dekker Lopez**

Te mau ve'a a te Ekalesia

Te amo nei te mau misionare o teie anotaui i te faufaa ai'a rahi o te faa'raa i te fenua nei i te ite i te Fatu (hi'o Isaia 11:9). Mai ia Aberahama e tae atu ia Paulo e tae atu ia Amona e tae atu ia Wilford Woodruff, te faaite mai nei te mau misionare i roto i te mau papa'iraa mo'a e i roto i te aamu o te Ekalesia i te mau misionare o teie tau apî ma te hoho'a puai.

Ei melo misionare anei, te faaineine ra no te ohipa misionare rave tamau, te tavini ra i te hoê misioni, e aore râ, ua ho'i mai na te misioni, e nehenehe ta tatou e apo mai i te itoito e i te faa'ururaa na roto mai i teie mau hi'oraa.

Ta tatou faufaa ai'a misionare i roto i te Bibilia e i te Poe tao'a rahi


Ua piihia te mau misionare o te Faufaa Tahito, mai ia Iona, ia faaite i te hoê reo faaara i te taata (a hi'o Ezekielia 3:17–19). Ia au i te hi'oraa o Iona te ite nei tatou i te faufaa o te tatarahapa e te haapa'o. Te haapii mai nei te aamu o Aberahama ia tatou no ni'a i te paparaa tupuna e i te mana o te Autahu'araa a Melehizedeka.

Ua rohi te mau misionare o te Faufaa Apî, mai ia Petero e o Paulo, no te paruru i te mau haapiiraa a Iesu Mesia. Noa'tu râ i te reira, i roto i te roaraa o te tau, ua topa te ao nei i roto i te taivaraa. Ua faaho'i faahou mai te Atua i te evanelia na roto i te peropheta Iosepha Semita. I teie nei, te rave nei tatou i te ohipa, mai tei ravehia e tera ra mau misionare, no te paruru e no te faaite i te mau haapiiraa a Iesu Mesia.



© 2002 DANIEL A. LEWIS

Iona i ni'a i te pae tahatai no Nineve, na Daniela A. Lewis. Ua tatarahapa Iona e ua haere e poro e e haapapû e, te faatere nei Iehova i te mau vahi atoa e aita Oia e horo'a noa nei i To'na here i te hoê noa fenua e aore râ, nunaa (a hi'o Iona 1–4).



HOÊ REO FAAARA

« No te mea e mea maitai te Fatu, i pii ai Oia i te mau tavini no te faaara i te mau taata i te ati ... A haamana'o ia Iona. Ua tapuni oia i te piiraa matamua a te Fatu ia haere e faaara i te mau taata o Nineve o tei haamatapohia i te ati na roto i te hara. Ua ite oia e, ua pato'i te mau taata ino i tera tau e tera tau i te mau peropheta, e i te tahi mau taime ua haapohe ia ratou. Ia haere ra Iona i mua na roto i te faaroo, ua haamaitai te Fatu ia'na na roto i te parururaa e i te manu'ia ».

Peresideni Henry B. Eyring, tauturu matamua i roto i te Peresideniraa Matamua, « A faateitei i to tatou reo faaara », Liahona, Tenuare 2009, 3.



Te aposetolo Paulo, *na Karel Skreta*. I roto i to'na mau tere e ta'na mau episetole, ua faaite Paulo i te iteraa papû puai no ni'a i te Faaora ati a'e Asia Na'ina'i e i te rahi-raa o te mau fenua itehia i taua taime.

Petero e o Ioane i mua i te mau haapii ture i Ieruselema, *na Simon Vedder*. Ua arata 'ihia mai Petero e o Ioane i mua i te sunederi, e ua ani mai ra te tahu'a rahi ia raua, « Aore matou i parau hua'tu ia outou, eiaha outou e haapii ma teie nei i'oa? e inaha, ua î roa Ieruselema ia outou i ta outou parau ... Ua parau atura Petero... na ô atura, o te Atua ta matou e faaroo e ti'a'i eiaha te taata » (Te Ohipa 5:28–29).



BPK, BERLIN / GEMÄLDEGALERIE ALTE MEISTER, STAÄTLICHE KUNSTSAMMLUNGEN, DRES / ELKE ESTEL / HANS-PETER KLUT / ART RESOURCE, NY



Te haamaitai nei Melehizedeka ia Aberama [Aberahama], *na Walter Rane*. Ua haamaitai Melehizedeka ia Aberama (a hi'o Genese 14:18–20) e ua horo'a atoa ia'na i te autahu'araa (a hi'o PHEPF 84:14). I te tahi atu taime, ua fâ mai te Fatu ia Aberama, ma te parau mai e, « Ua opua hoi au... ia faariro ia oe ei ve'a no te hopoi i to'u nei i'oa i te hoê fenua ê ... E e riro oe ei haamaitairaa no to oe ra huaai i muri ia oe, e ti'a'i ia ratou ia hopoi i teie nei toro'a e teie nei Autahu'araa i te mau nunaa atoa ra » (Aberahama 2:6, 9).



**HAAPII
I TE FEIA
TI'ATURU ORE**

« Ua haere... te mau tamaiti a Mosia i rotopu i te Ati Lamana. Ua haapii ratou i te hoê nunaa taata peu fifi roa no te tupuraa pae varua, noa'tu râ i te reira, ua tauturu teie mau misionare itoito i te faatupuraa i te hoê tauraa rahi i roto i teie mau Ati Lamana. Ua ite tatou e... 'o te ati Lamana i faaroo i ta ratou a'oraa, e i fariu hoi i te Fatu ra, aita roa'tura ratou i taiva' (Alama 23:6) ».

Elder James B. Martino no te Hitu Ahuru, « Repentance That Brings Conversion », Ensign, Setepa 2012, 58.

© GARY L. KAPP, EIAHA E TAPITHIA TE NENE'IRAA

Amona i mua i te Arii Lamoni, na Gary L. Kapp. Ua faaora Amona, te hoê o te mau tamaiti a Mosia, i te nānā a te Arii Lamoni. Ia ani atu te Arii ia Amona e, na te Atua anei oia i tono mai, na ô atura Amona e, e taata oia tei piihia e te Varua Maitai no te haapii i te evanelia « i teie nei mau taata [no Lamoni], ia faafariuhia mai ratou i te ite i te parau-ti'a e te parau mau » (Alama 18:34).

Ta tatou faufaa ai'a misionare i roto i te Buka a Moromona

Alama, Amuleka, te mau tamaiti a Mosia, e o Samuela te Ati Lamana, te tahi noa teie o te mau hoho'a misionare rarahi e itehia nei e tatou i roto i te Buka a Moromona. Na roto mai ia ratou te ite nei tatou i te mau hi'oraa no te tatarahapa, te faaroo, te haapa'o e te itoito. Mai ia ratou, e nehenehe ta tatou e turu'i i ni'a i te faaûruraa e te heheuraa no ô mai i te Atua ra no te arata'i i ta tatou ohipa misionare.

Oia tei faatae mai i te parau maitatai i to'u nei Varua ra, na Walter Rane. Ua fâ mai te hoê melahi ia Samuela te Ati Lamana e ua faaite mai i te « parau maitatai i te varua o [Samuela] » no ni'a i te ho'iraa mai o te Faaora (Helamana 13:6-7). Ei tuhaa no to'na piiraa ia haapii i te Ati Nephi, ua ta'uma o Samuela i ni'a i te patu aua o te oire no Zarahemela e ua faaite i teie parau maitatai i te taata.



Ta tatou faufaa ai'a misionare i roto i Te Parau Haapiiraa e te Mau Parau Fafau

I muri a'e i te Faaho'i-faahou-raa mai o te evanelia, ua titauhia te mau misionare. Ua faaite te mau misionare mai ia Dan Jones, Orson Hyde, e o Parley P. Pratt i te Buka a Moromona e te evanelia a Iesu Mesia. Te tahi pae mai te taea'e o te peropheta Iosepha, ua tavini ratou i te mau vahi fatata i to ratou fenua. Ua ratere te tahi pae i te atea roa no te faaite i te evanelia i te mau fenua mai ia Thailand, te mau Motu Sandwich (Hawaii), i Danemaka, e i Peretane.

Pinepine teie mau misionare matamua i te tavini i te misioni roa e te rau atoa. Ua faaru'e ratou i to ratou mau metua, te feia tei herehia e ratou, ta ratou vahine, te mau tamarii e te mau mootua mai ta tatou e rave nei. Ua riro ratou ei hi'oraa no tatou i teie mahana i te pae no te faaroo, te itoito, te haapa'o, te tamau maite e te rave maitai.



Te mau orometua momoni, na Arnold Friberg, no roto mai i te hoê hoho'a tumu na Christen Dalsgaard. E hoho'a huru mata-rohia teie no te ohipa pororaa evanelia i te tenetere 19 ra, oia ho'i, te hoho'a o te hoê misionare Feia Mo'a i te Mau Mahana Hopea Nei i tahito ra te haapii nei i te evanelia a Iesu Mesia i te hoê utua-fare no Danemaka tei haaputuputuhia i roto i te hoê fare faaapu. Ua haapii atoa te mau misionare i te hiti purumu e aore râ, i roto i te mau fare putuputuraa o te oire.



Te faaineine nei Wilford Woodruff no te baptizoraa i Benbow Farm, na Richard A. Murray. Ua arata'i te Fatu ia Wilford Woodruff i te mau matahiti 1840 ra i te fare faaapu no John Benbow i Herefordshire, Peretane. Ua papa'i o Wilford e, « i vai na te taata i reira tei pure no te ani i te faanahoraa o te mau mea no tahito ra ». « Te ohipa tei tupu maori râ, i roto i na mahana matamua e toru ahuru i muri a'e i to'u taeraa i reira, ua baptizo vau e ono hanere taata ... I roto e va'u ava'e to'u raveraa i te ohipa i roto i taua fenua ra, ua arata'i mai au tauatini e va'u hanere taata i roto i te Ekalesia. No te aha? No te mea te vai ra hoê pūpū taata tei ineine no te Evanelia » (« Discourse », Deseret Weekly, 7 no novema 1896, 643).

Te bapetizo nei te mau misionare tae apî mai i te mau taata ai'a no te mau motu no Sandwich (Hawaii) i te mau matahiti 1851 ra. E mea apî rii mai teie hoho'a.



EIAHA E TAPIHIA TE NIENEIRAA

Patu i ni'a i ta tatou faufaa ai'a misionare

Mai te mahana a faaraa ai te peresideni Thomas S. Monson i te amuiraa rahi no atopa ra 2012 e, e nehenehe i te feia apî tamahine e i te feia apî tamaroa e reva i te misioni i te hoê matahiti apî a'e, e rave rahi ahuru tauatini Feia Mo'a i te Mau Mahana Hopea Nei tei tomo i roto i te aua misioni.

I roto i te amuiraa rahi no eperera 2013, ua faaite mai Elder Neil L. Andersen, no te Pûpû no te Tino Ahuru Ma Piti Aposetolo, i to'na iteraa papû no ni'a i te ohipa misionare e ua faaitoito mai ia tatou tata'itahi ia riro ei tuhaa faufaa no teie semeio o te iritihia nei, na roto i te tautururaa

i te feia tei ineine no te faaroo i te evanelia : « A faaûru papû noa ai te Fatu e rave rahi atu â mau misionare ia tavini, te faaraa atoa nei Oia i te feruriraa e te iriti roa nei ho'i i te aau o na taata e rave rahi atu â, na taata maitatai e te parau-ti'a, ia farii i Ta'na mau misionare. Ua mâtau a'ena outou ia ratou e aore râ e mâtau mai outou ia ratou. E fetii ratou no outou e te ora nei ratou na piha'i iho i to outou fare. Te haere nei ratou na piha'i iho ia outou na ni'a i te puromu, te parahi ra i piha'i iho ia outou i te haapiiraa, e te farerei nei ia outou i ni'a i te Itenati » (« E semeio mau te reira », *Liahona*, Me 2013, 78). ■

Haapii i te evanelia na ni'a i te mau purumu, na Ken Spencer. Te faaite nei teie na misionare i te evanelia i te hoê taata i mua i te hoê fare hoora a buka i New Brunswick, New Jersey, te mau Hau Amui no Marite.



HO-MAI-HIA E TE FARE MANAHA NO TE AAMU O TE EKALESIA



TO OUTOU TARETA MISIONARE

« Mai te mea e ere outou i te misionare rave tamau ma te tareta i'oa i ni'a i to outou ahu, teie ia te taime no outou no te peni i te reira i ni'a i to outou aau—peni mai ta Paulo i parau, 'aita râ i papa'ihia i te inita, na te Varua râ o te Atua ora ra' ».

Elder Neil L. Andersen no te Pupu no te Tino Ahuru Ma Piti Aposetolo, « E semeio mau te reira », *Liahona*, Me 2013, 78.



HO-MAHIA E TE FARE MANAHA NO TE AAMU O TE EKALÉSIA

E ua'a te Ati Lamana mai te roti ra, na *Joselito Jesus Acevedo Garcia*. Te faaite nei te hoho'a i te varua o te ohipa misionare i rotupu i te taata reo paniora. Te faa-ineine nei e piti na misionare i te haapii i te evanelia a rave noa ai te taata i ta ratou ohipa no te mau mahana atoa. Te ti'a nei te hiero no Lima Peru i ropu i te mau fare na'ina'i e i te mau animala no te fenua iho, ei faaiteraa i te tupuraa o te Ekalesia.



© IRU, HO-MAHIA NA JUEIING CHEN

Misionare morohi ore, na *Juei Ing Chen*. Te imi nei te mau melo o te Ekalesia no Taiwan, mai te mau melo misionare i te mau fenua atoa, ia faaite i to ratou oaao i roto i te Ekalesia e te papa'iraa mo'a. Tei ni'a te mau papa'iraa mo'a i te amuraa maa ; e tei ni'a te hoho'a o te hiero no Taipei Taiwan i te vairaahi rahi ninamu.



HO-MAHIA E TE FARE MANAHA NO TE AAMU O TE EKALÉSIA

Te mau misionare Feia Mo'a i te Mau Mahana Hopea Nei i Sierra Leone, na *Emile Wilson*. Ua faati'ahia te misioni matamua i Sierra Leone i Freetown i te 1 no tiurai 2007. Ua riro mai Freetown te 3 000raa o te ti'i i roto i te Ekalesia i te 2 no titema 2012.



Na Elder Eduardo Gavarret

No te Hitu Ahuru

INEINE NO TE PATO'I I TE MAHANA ARORAA

*E mata na tatou, na roto i te tuuraa i to tatou ti'aturiraa
i roto i te Faaora, o Iehova sabaota, ia vai ineine noa
e eiaha ia hi'a i ni'a i te tahua aroraa.*

I te matahiti 1485, o Richard III to ni'a i te terono no Peretane. E mea papû ore te faatereraa, e ua titauhia ia Richard ia paruru i to'na korona hau atu i te hoê taime. Tera râ, e taata aravihi oia i te ohipa tama'i, e faachau mâtâ'u ore e te maramarama, e nuu tama'i ta'na i ni'a i te faito e 8 000 e 10 000 taata.

I taua matahiti ra, ua haere mai ra te hoê taata titau i te terono no Peretane, o Henry Tudor, Tau'aarii no Richmond, e ua pato'i e ua aro ia Richard i te hoê vahi i parauhia i te i'oa o taua aroraa ra : Bosworth Field. E mea iti roa to Henry iteraa no ni'a i te ohipa tama'i, eiaha mai ia Richard, e e 5 000 ana'e taata to'na. Tera râ, e mau taata maramarama te ti'a ra i piha'i iho ia'na—e mau taata hui arii tei aro na i roto i taua huru aroraa ra, e te tahi atoa i ni'a ia Richard. Ua tae mai ra te po'ipo'i no taua aroraa ra, e ia hi'ohia, e nehenehe e parau e, e upooti'a o Richard.

Teie te a'ai haapotoraa no te mau ohipa i tupu i te 22 no atete 1485. I taua po'ipo'i ra, ua faaineine te Arii Richard e to'na mau taata no te aro i te nuu a Henry. Te taata e upooti'a i roto i taua tama'i ra, na'na ia e faatere ia Peretane. Na mua noa a'e i te tama'i, ua tonu o Richard i te hoê rave ohipa no te hi'o e, ua ineine anei ta'na puahorofenua au roa.





« A faatiaa oioi ia'na », te parau ïa a te rave ohipa i ni'a i te taata tupa'i auri. « Te hinaaro nei te arii e ti'a i mua i ta'na nuu ».

Ua pahono mai ra te taata tupa'i auri e, e mea ti'a ia'na ia tia'i. « Ua faatiaa vau i te nuu taatoa a te arii i te mau mahana i ma'iri a'enei », ta'na ïa parau, « i teie nei, e mea ti'a ia'u ia haere e tii i te auri ».

Ua pahono mai ra te rave ohipa rû e, eita ta'na e nehenehe e tia'i. « Te haere mai nei te enemi o te arii i teie nei, e ua titauhia ia matou ia farerei ia ratou i ni'a i te tahua », ta'na ïa parau. « A rave i te oti ia oe ».

E mai tei faauehia, ua imi te taata tupa'i auri i te rave'a ia oti maitai ta'na ohipa, ma te hamani e maha tiaa i roto hoê tapu auri. Ia oti i te tupa'ihia te mau tiaa, ua patiti oia e toru i ni'a i te puaahorofenua. Tera râ, i to'na tamataraa e tamau i te maha o te tiaa, ua ite a'era oia e, eita e nava'i ta'na naero.

« Hinaarohia hoê e aore râ, e piti a'e naero faahou, e e titauhia te tahi maa taime no te tupa'i i te reira », ta'na ïa parau i te rave ohipa.

Tera râ, eita e ti'a i te rave ohipa ia tia'i maoro atu â. Na ô a'era oia e, « Te faaroo ra vau i te pu i teie nei ». « Eita anei ta oe e nehenehe e rave noa i te mea e vai ra ? »

Ua pahono mai ra te taata tupa'i auri e, e tamata oia i te

vahi e oti ia'na tera râ, eita ta'na e nehenehe e haapapû e mau anei te maha o te tiaa.

Na ô mai ra te rave ohipa e, « a patiti noa ». « E a haaviti-viti, aita ana'e, e riri roa te Arii Richard ia taua ».

Aita i maoro ua haamata a'era te aroraa. No te faaitoito i to'na mau taata, ua horo o Richard na ni'a e na raro, ma te aro e ma te faitoito ia ratou ma te pii e, « A haere i mua ! A haere i mua ! »

Tera râ, ua hi'o atura o Richard i ni'a i te tahua aroraa, ua ite atura oia i te tahi o to'na mau taata te otohe ra i muri. No to'na ri'ari'a o te horo ê te tahi atu mau faehau to'na, ua faahoro oia i ta'na puaahorofenua i te pae ua mutu te reni no te faaitoito ia ratou. Tera râ, hou a tae atu ai o Richard ia ratou ra, ua haruru ta'na puaahorofenua e ua topa i raro, pee atura te arii i ni'a i te repo. Mai ta te taata tupa'i auri i taiâ na, ua pee te hoê o te tiaa o te puaahorofenua, i te taime a faahoro ai te arii.

Ua ti'a a'era o Richard i ni'a a ti'a ai ta'na puaahorofenua e a horo ê atu ai. Te haere noa ra te nuu o Henry i mua, e ua tarape o Richard i ta'na o'e i ni'a roa, ma te pii hua e, « Hoê puaahorofenua ! Hoê puaahorofenua ! To'u basileia no te hoê puaahorofenua ! »

Tera râ ua taere roa. I te reira taime, ua horo te mau taata o Richard no to ratou ri'ari'a i te nuu o Henry, e ua pau ratou. Mai taua taime ra, ua faahiti te taata i taua maseli ra :



HAAMANA’O I TE MAU MEA ITI

« A haapa’o i te mau haapiiraa a te peropheta ta te Mesia e tia’i ra ia outou ia pee. Eiaha

te popou no ananahi e faatumu-haere-noa-hia i ni’a i te mana’o, e na te mau tapu-haapoto-raa e mono i te mau parau tumu papû o te evanelia. A haamana’o e : e arata’i te mau mea iti i te mau mea rarahi. E nehenehe te mau mana’o rii paari ore e te mau haapa’o-ore-raa na’ina’i, e arata’i i te fifi rahi. Hau atu râ, e arata’i te mau peu rii ohie e te tamau e te maitai, i te oraraa o tei î i te mau haamaitairaa ».

Elder Richard G. Scott no te Püpû no te Tino Ahuru Ma Piti Aposetolo, « No te hau i te fare », *Liahona*, Me 2013, 29.

*No te hoê naero i ma’iri ra, ua mo’e te hoê tiaa,
No te hoê tiaa i ma’iri ra, ua mo’e te hoê puaahorofenua,
No te hoê puaahorofenua i mo’e ra, ua pau te hoê aroraa,
No te hoê aroraa i mo’e ra, ua mo’e te hoê basileia,
E taua mau mea atoa ra, no te hoê ia naero tiaa puaahorofenua i mo’e ra.¹*

Tamau i ta tatou mau parau tumu

Ia feruri ana’e au i teie aamu, e feruri au e, nahea hoê ohipa iti ha’iha’i roa mai te hoê naero tiaa aore i patiti-maitai-hia e nehenehe e horo’a mai i teie huru hopearaa. E nehenehe ta tatou e faaau i te naero e mo’e ra i te mau parau tumu o te evanelia. Mai te mea e, aita e parau tumu no te evanelia e to’na mau faufaa e te mau ohipa, e nehenehe ta tatou e vai ma te tauturu ore i ni’a i te tahua aroraa i mua i te faahemaraa e te ino.

Eaha te mau ohipa e mo’e nei i roto i to tatou oraraa e to tatou utuafare ? Te haapa’o ore ra anei tatou i te pure tata hoê e aore râ, i te pure utuafare ? Te tai’o-itoito-raa i te mau papa’iraa mo’a ? Te faatupu-tamau-raa i te pureraa pô utuafare ? Te aufauraa i te tuhaa ahuru ti’a ? Te taviniraa i to tatou mau taea’e e to tatou mau tuahine ? Te haapa’oraa i te mahana Sabati ? Te haamoriraa i te hiero ? Te here i to tatou taata tupu ?

E nehenehe ta tatou tata’itahi e hi’o i roto ia tatou ma te imi e, eaha te mea e mo’e ra—eaha te parau tumu e aore râ, eaha te ohipa e titauhia ia tatou ia *tamau* papû maitai i

roto i to tatou oraraa e i roto i to tatou utuafare. I muri iho, ia itehia ia tatou taua parau tumu ra e aore râ, taua ohipa ra, e nehenehe ta tatou e rave maitai e ma te hinaaro papû ia *patiti i te naero*—no te haapa’o maitai roa’tu i taua parau tumu ra e no te faaineine maitai a’e ia tatou iho e i to tatou utuafare ia ti’a no te ohipa ti’a.

I roto i te Te Parau Haapiiraa e te Mau Parau Fafau, ua haapii mai te Fatu e, « A rave i te taupoo paruru o te ora, e te ’o’e o to’u nei Varua, o ta’u e ninii atu i ni’a iho ia orua na, e ta’u parau hoi ta’u e heheu mai nei ia orua, e... a tamau noa i te faaroo e tae noa’tu i to’u taeraa mai » (27:18).

Ua fafau mai te Faaora i To’na mau tavini haapa’o maitai e, « E e riro to ratou rima ra o to’u ia rima i reira, e riro vau to ratou ra paruru e to ratou ra tapoi ; e e tatua na hoi au i to ratou ra mau tauupu, e e aro puai roa ratou na’u... e na roro i te auahi o to’u nei riri au e faaora’i ia ratou ra » (PH&PF 35:14).

E mata na tatou i te haamana’o noa e, noa’tu e, « ua faaineinehia te puaahorofenua no te mahana aroraa », mai ta te maseli e parau nei, « na te Fatu e paruru » (21:31). Ia haapa’o tatou i te aniraa a Moroni « e haere mai i te Mesia ia maitai roa outou ia’na » (Moroni 10:32). E mata na tatou, na roto i te tuuraa i to tatou ti’aturiraa i roto i te Faaora, o Iehova sabaota, ia vai ineine noa e eiaha ia hi’a i ni’a i te tahua aroraa. ■

NOTA

1. A hi’o « For Want of a Horseshoe Nail », i roto William J. Bennett, ed., *The Book of Virtues : A Treasury of Great Moral Stories* (1993), 198–200.

Haapeepee

I TE OHIPA NO TE FAAORARAA

A ani manihini noa ai e a here noa ai e a tavini noa ai tatou ia vetahi ê, e riro mai tatou ei mau pīpī mau na Iesu Mesia ma te tauturu atoa ia haapeepee i te ohipa no te faaoraraa.

Noa'tu â te vai ra te anaanatae no ni'a i te ohipa a te mau misionare rave tamau na ni'a i te Itenati e te raveraa i te tahi mau tere mata'ita'iraa na roto i te mau fare pureraa, e tuhaa iti noa te reira no te hoho'a rahi o te ohipa no te faaoraraa. Te mea faufaa roa a'e, o te huru ia tatou, te mau melo, e faaô atu ia tatou i roto i te hoho'a rahi a'e no te haapeepeeraa i te ohipa no te faaoraraa. Aita tatou e anihia nei ia faaô ia tatou i roto i te tahi faanahoraa apî. Te faaitoito-noa-hia ra tatou ia riro mai ei pīpī mau na Iesu Mesia. Ta tatou hopoi'a, o te utuhiraa ia ia tatou iho i roto i te hereraa e te taviniraa i te taata e faaati nei ia tatou—tamahana i te hoê hoa ohipa i roto i te ati, titau i te mau hoa ia haere mai i te hoê bapetizoraa, tauturu i te tahi taata paari e to'na aua, titau i te hoê melo mauui no te tahi tamaaraa e aore râ tauturu i te tahi taata tupu e to'na aamu utuafare. E mau rave'a ohie ana'e teie, e te oaoa atoa ho'i, no te titau i te mau melo mauui e ratou atoa e ere no to tatou faaroo ia ite i to tatou oraraa e i muri iho ia ite i te maramarama o te evanelia. E riro paha te faaiteraa ia ratou i to tatou mau taime anaanatae e to tatou mau taime mo'a i roto i to tatou oraraa i te riro mai ei rave'a faahiahia roa a'e no tatou no te « rave i te ohipa i roto i ta [Iesu Mesia] ra ô vine no te faaoraraa i te mau varua o te taata nei [te tane e te vahine] » (PH&PF 138:56).

Eaha te ohipa no te faaoraraa ?

Te ohipa no te faaoraraa, o te ohipa ia a te Metua i te Ao ra no te « faa-tupu i te tahuti ore e te ora mure ore o te taata nei » (Mose 1:39). I roto i teie ohipa faufaa rahi, te vai nei te ohipa misionare a te melo, te tape'araa i te taata faafariu, te faaitoitoraa i te melo mauui, te ohipa hiero e te aamu utuafare e te haapiiraa i te evanelia.¹ Pinepine roa tatou i te feruri i teie mau tuhaa o te evanelia ei mau mea taa ê roa. Teie râ, i roto i *Te ohipa no te faa-oraraa : Haapuruoraraa na te feia faatere o te ao nei* tei tupu i te 23 no tiunu 2013, ua haapii o Elder Russell M. Nelson no te Pūpū no te Tino Ahuru Ma Piti Aposetolo e, « eita teie ohipa e vahihia. E ere teie mau ohipa i te mau



HOHO'A FAAHO'ARAA NA DAVID STOKER

ohipa taa ê te tahi i te tahi; e mau tuhaa ana'e te reira no te ohipa no te faaoraraa ».²

Te parau e « Haapeepe i te ohipa no te faaoraraa »—te i'oa tei topahia i ni'a i te tahua itenati apiti i te haapuroraa (hasteningthework.lds.org)—no roto mai ia i te fafauraa a te Fatu : « Inaha, e [haapeepe] au i ta'u ohipa i roto i te tau mau no te reira » (PH&PF 88:73).

Ua riro te mau oro'a faufaa rahi no te autahu'araa—te bapetizoraa, te haamauraa, te faatoro'araa i te autahu'araa na te mau tane e te mau oro'a hiero—ei mau taahiraa rarahi i ni'a i to tatou e'a ho'iraa i to tatou Metua i te Ao ra. Mai te mea e, e amui tatou i roto i te ohipa no te faaoraraa, e pee tatou e e faaûru atoa tatou ia vetahi ê ia pee i te e'a no te fafauraa.

E rave amui te mau melo e te mau misionare i raro a'e i te mau taviri no te autahu'araa

Ua tae te taima ia tutonu faahou â to tatou mana'o i ni'a i te parau tumu niu e, te riroraa ei melo i roto i te Ekalesia a te Fatu, maori râ, o te piiraahia ia ia tatou ia fafau ia tatou iho i roto i Ta'na ohipa no te faaoraraa. Te mau nei te mau peresideni titi e te mau episekopo i te mau taviri autahu'araa no te ohipa misionare i roto i ta ratou mau amuiraa no te Ekalesia³ e na ratou e tauturu i te mau melo ia rave i te ohipa ta te mau pipi mau a te Mesia e rave—faaite i te maramarama o te evanelia. Te mau nei te mau peresideni misioni i te mau taviri autahu'araa o te faati'a ia ratou ia arata'i i te ohipa a te mau misionare ta ratou e faatere nei.⁴ Ua haapiipihia te mau misionare rave tamau no te haapii



i te mau taata ua faaineinehia no te farii i te evanelia. Na ratou te tururaa mai na muri mai i te mau melo i roto i teie ohipa misionare a te melo, eiaha na ratou e na mua mai. E no reira, e mau apiti te mau misionare rave tamau e te mau misionare melo no te hopoi i te evanelia i roto i te oraraa o te taata ta te Fatu i faaineine no te farii i te reira.

I roto i te haapuroraraa, ua parau te peresideni Thomas S. Monson : « Teie te taima no te mau melo e te mau misionare ia haere amui, ia ohipa amui, ia haa amui i roto i te ô vine a te Fatu no te hopoi i te mau varua Ia'na ra. Ua faaineine Oia i te mau rave'a na tatou no te faaite i te evanelia na roto i te mau huru rau, e e tauturu mai Oia ia tatou i roto i ta tatou mau ohipa mai te mea e haa tatou ma te faaroo no te rave faaoti i Ta'na ohipa ».⁵

Ua parau o Elder Neil L. Andersen no te Pūpū no te Tino Ahuru Ma Piti Aposetolo no ni'a i te faufaa o te here. Ua parau oia e, « Te rave amui nei tatou i te ohipa na roto i te faaroo e te tahoê—te faaroo ia arata'i mai te Fatu i to tatou mau taahiraa, e te tahoê, te tahi i te tahi e i te mau misionare, na roto i te here Ia'na e i te tahi e te tahi, e i te feia ta tatou e tavini ».⁶

Na te mau apooraa paroisa e arata'i ti'a mai, na te mau taata faatere ohipa misionare no te paroisa e faaau mai

I raro a'e i te faatereraa a te episekopo, e faaohie te apooraa paroisa, e turu atoa e e faaau ho'i ratou i te mau tautooraa a te mau melo o te paroisa na roto i te faanahonahoraa e te arata'iraa i te ohipa no te faaoraraa a te paroisa.⁷

Ei melo no te apooraa paroisa, na te taata faatere ohipa misionare no te paroisa « e faaau i te mau tautooraa a te paroisa no te imi, no te haapii e no te bapetizo i te mau hoa o te Ekalesia. Na'na e faaau i te reira ohipa i ni'a i te ohipa a te mau misionare rave tamau ».⁸

I ni'a i te mau taata faatere ohipa misionare no te paroisa, ua parau Elder Nelson e : « A tauturu [i te mau misionare no] te faa'iraa i ta ratou buka farereiraa i te mau farereiraa maitai, aita ia to ratou e taima no te haere e patoto i ni'a i te mau opani no te imi i te taata e haapii... [O outou] te tu'atiraa i rotopu i te mau misionare, te apooraa paroisa e te mau melo o te paroisa ».⁹



Te tapa’o mau no te manūiarāa

Ei Feia Mo’a i te Mau Mahana Hopea Nei, ua haamaitaihia tatou ia ora i teie taime te haapeepe nei te Fatu i Ta’na ohipa. No te mea e opuaraa ihoa na te Atua te tuuraa ia tatou i ni’a i te fenua nei i teie taime, e faito puai to tatou no te rave rahi atu â i ta tatou e mana’o ra e maraa ia tatou. Mai te mea e, e haere tatou e tii na roto i te mārū e te aroha i te taata e hinaaro nei i ta tatou auhoaraa e ta tatou tauturu, eita roa ia tatou e ore e manuia. E tae mai te manūiarāa misionare na roto i te faaūrurāa e manii mai i roto i to tatou ferurirāa e to tatou aau, e na roto noa i te ani-manihini-raa ia vetahi ia tomo mai i roto i to tatou oraraa tei faatumuhia i ni’a i te evanelia. O te ani-manihini-raa te tapa’o no te manūiarāa, e ere te baptizorāa e aore rā, te itoito-faahou-raa mai te taata i roto i te Ekalesia. Mai ta Elder Jeffrey R. Holland no te Pūpū no te Tino Ahuru Ma Piti Aposetolo i parau no ni’a i teie nuu misionare hanahana e tomo ra i roto i te aua misioni : « Ua tae te hora no tatou ia parau e, ‘Teie mai nei ratou’. E ti’a ia tatou ia faanahonaho e ia faaohipa i teie rima tauturu tei tonohia mai na te ra’i mai ei rave’a maitai roa a’e no te faahoturāa ».¹⁰

Ua tae te taime no tatou paatoa ia maramarama rahi a’e i ta tatou hopoi’a i roto i te haapeepeeraa i te ohipa no te faaoraraa. A faairi ai tatou, i te ohipa misionare a te melo, te tape’araa i te taata faafariu, te faaitoitōraa i te melo mauui, te ohipa hiero e te aamu utuafare e te haapiirāa i te evanelia, ei tuhaa ohie i roto i to tatou oraraa, e itehia ia tatou te oaoa rahi e e horo’ahia mai ia tatou te mau horo’a pae varua titauhia no tatou no te haapuui i te Ekalesia i roto i te 21raa o te tenetere. ■


TE MAU NOTA

1. Hi’o *Manuel 2 : Administration de l’Eglise* (2010), pene 5.
2. Russell M. Nelson, *Te ohipa no te faaoraraa : Haapurorāa na te feia faatere o te ao nei* 23 no tiunu 2013, hasteningthework.lds.org.
3. Hi’o *Manuel 2*, 5.1.6; 5.1.9.
4. Hi’o *Manuel 2*, 5.1.6.
5. Thomas S. Monson, *Te ohipa no te faaoraraa*, hasteningthework.lds.org.
6. Neil L. Andersen, *Te ohipa no te faaoraraa*, hasteningthework.lds.org.
7. Hi’o *Manuel 2*, 5.1.2.
8. *Manuel 2*, 5.1.3.
9. Russell M. Nelson, *Te ohipa no te faaoraraa*, hasteningthework.lds.org.
10. Jeffrey R. Holland, *Te ohipa no te faaoraraa*, hasteningthework.lds.org.

No te video o *Te ohipa no te faaoraraa : Haapurorāa na te feia faatere o te ao nei* na roto e 26 reo, a haere i ni’a ia hasteningthework.lds.org. E roaa atoa ia outou te puturaa parau tahito no te haapurorāa na roto e 59 reo i ni’a ia lds.org/broadcasts. No te *Manuel 2 : Administration de l’Eglise*, e roaa mai na roto e 29 reo i ni’a ia lds.org/manual/handbook.



*No to Roger
faautaraa i na
misionare i roto
i te pereoo taxi,
i haamata ai oia
i te rave i te e'a
o te ti'araa pipi.*



TE RIRORAA EI taata no te hau

Ua tauturu te hiero, te misioni e te taviniraa ia Roger e i to'na utuafare ia haere i ni'a i te avei'a o te utuafare mure ore.

Na Matthew D. Flitton

Te mau ve'a a te Ekalesia

Ua ite o Roger Randrianarison e, te ere ra to'na oraraa utuafare i te hoê mea. Ua parau oia e, « Ua pure au i te Atua ia tauturu mai ia'u ia imi i te hoê mea no te arata'i i to'u utuafare ». « Ua hinaaro vau ia arata'i i to'u utuafare i roto i te hoê mea maitai, te hoê mea o te arata'i i ni'a i te e'a ti'a ».

Te haape'ape'a ra oia no ni'a i te aupururaa i ta'na na tamarii e toru—na tamaroa, o Randrianandry e o Sedinirina, e te tamahine o Nirina. Aita oia i oaoa i te mea e, na roto i to'na huru riri ohie, ua faatupu mai te reira i te mau tamataraa i roto i te utuafare. Ua hinaaro oia ia riro ei metua tane mârû a'e.


Ua parau oia e, « Ua faaoti a'era vau e, o vau te taata e ti'a ia tau no te mea ua ite au e, o vai te huru taata ta'u i riro mai.

Ua topa te ohipa patu fare a Roger tau matahiti i ma'iri a'enei, e te rave nei oia i te ohipa faahoro taxi i Antananarivo, Madagascar. I te hoê mahana ua faauta oia e piti na tuahine misionare.

Te parau ra oia e, « I to raua parahiraa mai i roto i te pereoo, ua ui mai ra raua i to'u i'oa e e utuafare anei to'u ». « Ua ui mai raua e, ua ite anei au e, o vai te Atua e te pure ra anei au Ia'na ».

Ua himene na misionare i te mau himene e o Roger a tere noa ai ratou e ua ani ia'na ia haere mai i te pureraa. Ua tamata oia i te haere no te tahi tau taime, tera râ, aita i nahonaho ia'na ia faataa i te hoê taime i roto i ta'na tarena ohipa, e ua mo'e te taamuraa i roto ia'na e te mau misionare.

E pae ava'e i muri mai, te rave ra o Roger i te ohipa i te fare i te hoê mahana, a faaroo ai oia e piti na misionare te paraparau ra i te hoê taata i rapae mai i to'na aua. Ua ite o Roger e, e haere mai raua e paraparau ia'na. Ua tupu mai te mana'o i roto ia'na e, e ti'a ia'na ia pahono, e, i te mau huru uiraa atoa ta raua e ui mai.



Ua riro te tuatapaparaa a te utuafare i te evanelia ei tautururaa i te utuafare Randrianarison ia haafatata amui ia ratou.

I muri a'e i te faaiteraa i to raua i'oa, ua ui mai ra na misionare ia'na e, ua ite anei oia i te parau no ni'a i te Atua. E. Ua hinaaro anei oia e pure i te Atua ? E. Ua hinaaro anei oia e paraparau i te mau misionare ? E. Ahea ? I teie nei. Ua parau mai ra na misionare e, e ho'i mai raua i roto e 20 minuti. Ia ho'i mai ra raua, ua apeehia mai raua e te hoê melo e noho ra na piha i iho mai.

Ua haapii na misionare ia Roger e rave rahi taime i te roaraa hoê ava'e i roto i to'na fare. Na roto i te mau mea ta ratou i faaroo no ni'a i te Ekalesia, aita te toe'a o to'na utuafare i hinaaro e haapii na muri iho i te mau misionare. I muri a'e hoê ava'e te haapiiraa no ni'a i te evanelia, ua haere o Roger i te pureraa na muri iho i te mau misionare. Ua putapû oia i te huru o te fariiraa ta'na i ite. Ua parau oia e, « Ua farii te mau melo ia'u mai te huru e, e mea maoro to ratou matauraa ia'u ».

Ua ho'i o Roger i te fare e ua parau i to'na utuafare e, e baptizohia oia i roto i te hoê ava'e, e e ti'amâraa to ratou no te ma'iti ia tomo i roto i te Ekalesia e aore râ, aita. Ua ani mai ra ratou ia'na ia tia'i rii ia nehenehe atoa ia ratou ia apiti atu ia'na. Ua haamata a'era ratou i te haere i te mau pureraa e ua maere atoa ratou e te oaoa ho'i.

Ua putapû roa te tamaiti paari a Roger, o Randrianandry, i te taime matamua a haere ai oia i te mau pureraa a te Ekalesia. Te parau ra oia e, « I te taime matamua a haere mai ai au i te pureraa, ua maere roa vau no te mea, e mea haehaa roa te taata ». « A tahi, e mea au maitai to ratou mau ahua no te pureraa. I muri a'e i te reira, ua ite a'era

vau e, ua haere mai ratou no te hoê tumu mau, eiaha no te faaiteite noa i mua i te tahi atu mau taata ».

Ua baptizohia te utuafare Randrianarison i te 20 no fepuare 2003. I tera ra taime, va'u matahiti to Nirina, 17 to Sedinirina, e 19 to Randrianandry. Ua faaea te utuafare i te rave i te ohipa i te mahana Sabati e ua faairi i te oraraa i te evanelia ei ohipa matamua na ratou.

Te mau tauraa

Te parau ra o Arelina, te vahine a Roger e, « I muri a'e i to'u baptizo-raa-hia, ua ite au e rave rahi tauraa i roto i to matou utuafare ». « Ua riro mai ei utuafare varua, e ua tae mai te mau haamaitairaa e rave rahi, no te pae tino e no te pae varua, na roto mai i te oraraa i te evanelia ».

I te pae no te oraraa, ua haamauruuru Roger i te Metua i te Ao ra no to'na tautururaa ia'na ia faati'a faahou i ta'na ohipa imiraa faufaa. I muri a'e e piti matahiti i te faahoraraa i te taxi e i te tahi atu huru ohipa no te faaora i to'na utuafare, ua haamata oia i te farii faahou i te mau faaauraa ohipa paturaa. Ua parau oia e, « Te ti'aturi nei au e, te haamaitai nei te Atua ia'u ia faaoti ana'e au ia pee Ia'na ».

Tera râ, te parau nei ta'na mau tamaiti e, te tauraa rahi roa a'e ta ratou i ite tei roto ia i te huru o to ratou metua tane. Te parau nei ratou i teie nei no ni'a ia'na ei hi'oraa no te haehaa e te maitai. Ua parau o Roger e, na te evanelia i faaue ia'na ia tau. Mai te taime a haamata ai oia i te tuatapapa i te reira, ua tamata o Roger i te faa'i i to'na oraraa i te mau mea maitai.

Ua parau oia e, « Aua'e te mau haapiiraa o te evanelia, aita vau e riri faahou ». « I te tahi taime e tupu mai te mau ohipa imi pe'ape'a, tera râ, tei roto te evanelia i to'u aau, tei roto i to'u upoo, e tei roto i to'u varua. Na te reira e tauturu nei ia'u ia vai hau noa ».

Ia tupu ana'e te mau mea au ore, na Roger e tamârû i te mau melo o te utuafare e e faahaamana'o ia ratou ia rave mai ta te Faaora e rave.

Ua parau o Sedinirina e, « Ua riro to'u metua tane ei taata haehaa, e i teie nei, te atuatu nei oia i to matou utuafare ma te here ». « Ia hi'o ana'e au i te tauraa i roto ia'na, e oaoa rahi to'u i te Metua i te Ao ra, i te evanelia, e i te riroraa ei melo no te Ekalesia ».

Hoê Utuafare Mure Ore

I te matahiti 2006, na roto i te tauturu a te moni tauturu i te taata haere hiero, ua haere o Roger e o Arelina i Johannesburg, Afirita Apatoa, no te taati ia raua i roto i te hiero.

Mai te matahiti 2009 e tae atu i te matahiti 2011, ua tavini o Sedinirina e o Randrianandry i te hoê misioni i Afirita Apatoa—o Sedinirina i Cape Town e o Randrianandry i Johannesburg. Te hoê tuhaa o to raua hinaaro puai ia tavini, no te tauturu ia i te tahi atu mau utuafare ia tau, mai ta to ratou utuafare i tau.

Ua parau Randrianandry e, « E nehenehe i te hoê semeio mai teie te huru e tupu mai, e ua tupu no te mea ua tae mai te mau misionare i to matou fare ». « No reira, ua hinaaro vau ia rave i te reira atoahipa no te hoê utuafare i te tahi atu vahi ».

Na taua faaotiraa ra i hopoi mai i te tahi atu haamaitairaa i te utuafare Randrianarison. E iva mahana to Sedinirina e o Randrianandry faaearaa i roto i te pû haapiiiraa misionare i Johannesburg. Ua faanaho o Roger no te reva i Afirita Apatoa e o Arelina e ta raua tamahine o Nirina, ia nehenehe i te utuafare taatoa ia taatihia i roto i te hiero. 14 matahiti to Nirina i taua taime ra, e te parau ra oia e, e mea fifi roa ia faataa i te ohipa i tupu e i te mana'o tei tupu i roto ia'na.

Ua parau oia e, « ua haapuui te reira i to'u faaroo e ua tauturu ia'u ia fatata roa i te Atua ».

I teie mahana te haa nei te mau melo o te utuafare no te faati'a e no te haapuui i te taata ati a'e ia ratou. Te tavini nei Roger ei episekopo no to'na paroisa. Te rave nei Arelina i te ohipa i roto i te Paraimere i roto i te faanahonahoraa te Faaroo i te Atua. E tauturu papa'i parau no te tîti o Sedinirina. E tauturu papa'i parau no te paroisa o Randrianandry. E arata'i himene no te paroisa o Nirina.

Ua riro te evanelia ei pahonoraa no te mau pure i roto i te utuafare Randrianarison. Ua faaora te reira i te mau puta tahito, ua haafatata ia ratou, e ua horo'a ia ratou i te rave'a ia amuitahihia e a muri noa'tu. Ua haapii te reira ia Roger ia here. Ua parau oia e, « te oraraa utuafare o te oraraa ia tei i te here ». ■

Ua riro te ratereraa i Afirita Apatoa no te taati ia ratou i roto i te hiero no Johannesburg ei haapuairaa i te utuafare Randrianarison.



TE MONI TAUTURU I TE TAATA HAERE HIERO

« Te vai noa ra â te tahi mau fenua i te ao nei e mea atea roa te hiero i to tatou mau melo, aita e maraa ia ratou te mau haamau'araa e titauhia no te tere atu i reira. No reira, aita ia e ti'a ia ratou ia farii i te mau haamaitairaa mo'a e te mure ore ta te hiero e horo'a mai. E no te tautururaa i te reira, ua faataa matou i te mea tei parauhia, te Moni Tauturu i te Taata Haere Hiero. Na teie moni e aufau hoê a'e tere i te hiero no te feia aita roa'tu ta ratou e rave'a no te haere i te hiero e i te tia'i-maoro-raa i taua taime ra. Te taata e hinaaro e tauturu i teie afata, e nehenehe ia ratou e faaite i te reira i nî'a i te api parau aufauraa i matarohia, o te horo'ahia'tu i te episekopo ra i te mau ava'e atoa ».

Peresideni Thomas S. Monson,
«Te farerei faahou nei tatou»,
Liahona, Novema 2011, 5.

E HO'I ANEI O MATTHEW ?

Te vai ra i roto i ta matou paroisa te hoê pŭpŭ feia apî tamaroa puai roa, tera râ, ua haere o Matthew na muri iho i te hoê pŭpŭ melo ore tei here i te pereoo uira e te mau tao'a matini atoa. Te vahi fifi râ, no roto mai teie taure'are'a i te hoê utuafare aita i haafaufaa i te parau no te faaroo. Ua faati'a na metua i te inu e te pupuhi avaava i roto i to ratou fare e aita i ti'aturi e, e mea faufaa ia vai viivii ore noa i te pae morare.

Ua roaa ia Matthew te ti'araa teitei roa i roto i te ohipa Scout, tera râ, aita oia i tae i roto i te putuputuraa no te haamuruururaa no te mea ua faaea oia i te haapa'o i te mau faatureraa o te ohipa scout. Ua haaputupu-putu vau i ta'na mau feti'a scout atoa e ua hamani i te hoê afata faaiteite. E ua vaiiho vau i te reira i te hoê vahi, ma te ti'aturi e, i te hoê mahana, e faufaahia te reira no'na. I te 16 to'na matahiti, te puhipuhi ra o Matthew i te avaava, te inu ra, e te rave ra i te raau taero. Ua faaru'e oia i te haapiiraa e ua faaea i te hoê tamahine. E mea varavara roa matou i te ite

faahou ia'na no te tahi tau matahiti te maoro.

Ua oto roa matou. Aita matou i ite e, e ho'i anei oia i roto i to'na utuafare e te faaroo, tera râ, ua faaoti a'era matou ia pee i te hi'oraa o Alama i roto i te parau no ta'na tamaiti haapa'o ore. Ua tamau noa Alama i te here i ta'na tamaiti e ua pure ma te faaroo ia ti'a ia'na « ia arata'ihia i te ite i te parau mau » (Mosia 27:14).

Ua pure tamau noa matou ia haere mai te Fatu i roto i te oraraa o Matthew, e ua rave matou i te mau rave'a atoa no te faaite na roto i te parau e i te ohipa i to matou here ia'na. I to'na ho'iraa mai i te fare, aita matou i parau i te hoê parau o ta'na e nehenehe e faairo ei parau faaino e aore râ, ei parau haavâ. Ua faaite noa matou i to matou oaoa i te iteraa ia'na.

I te hoê mahana, ua haere mai Matthew i te fare ma te parau mai e, ua hinaaro oia e paraparau. Ua parau mai oia e, ua farerei oia i te hoê tamahine i roto i te hoê faaoaoaraa, e e uiraa ta'na no ni'a i te Ekalesia.

Hou a ti'a ai ia'na ia parau atu ia'na e, aita oia i ite faahou i te pahonora, ua haamata a'era te mau parau i te matara mai na roto mai i to'na vaha. E ua ite oia ia'na iho i te pahonora i ta'na mau uiraa ma te vitiviti. Ua parau o Matthew e, aita oia e haamana'o ra i te taime a haapii mai ai oia i te mau mea ta'na i parau ra, tera râ, ua ite oia e, e parau mau ta'na mau parau. Ua mana'o oia e, no te aha pai oia e ora ra mai te reira te huru inaha ho'i te ti'aturi noa ra oia i te evanelia.

I muri a'e e toru mahana i te ferurimaite-raa, ua faaoti a'era oia ia faaru'e i te huru oraraa ta'na e ora nei. Ua ho'i mai oia i te fare no te ani i te tauturu no te haamata apî faahou.

Ua taniuniu o Matthew i te tahi taea'e fetii to'na i te tahi atu tuhaa fenua tei upooti'a atoa i taua huru fifi ra, e ua ani ia'na e nehenehe anei ta'na e faaea ia'na ra. Ua farii to'na taea'e fetii, e ua haamata o Matthew i te haere i te pureraa na muri iho ia'na e ua farerei i te episekopo no te farii i te tauturu no te faanahoraa o te tatarahaparaa. Ua ite oia i te here e i te patururaa e ua itoito faahou mai i roto i te Ekalesia.

I muri a'e, ua farerei oia i te hoê tamahine maitai e te au. Ua here raua e ua faaipoipo i roto i te hiero.

I te fanauraahia mai ta raua tamarii matamua, ua haere mai au e farerei ma te afa'i mai i te afata faaiteite ta'u i hamani no ta'na mau feti'a scout. Ua oaoa roa oia e ua faatarere i te reira i te hoê vahi ite-maitai-hia i roto i to'na fare.

Aita te melahi i fâ mai i ta maua tamaiti, mai tei tupu i ni'a ia Alama tamaiti. Tera râ, mai te hoê semeio ra te huru o te ho'iraa mai Matthew i roto i te parau mau. ■ Ua tape'ahia te i'oa



Ua haaputupu-putu vau i te mau feti'a Scout atoa a Matthew e ua hamani au i te hoê afata faaiteite. E ua vaiiho i te reira i te hoê vahi, ma te ti'aturi e, i te hoê mahana, e faufaahia te reira no'na.

TEI TE FARE AU

Ei tuhaa no te hoê ohipa totauturu, ua ratere atu vau i Rwanda e te tahi mau taote no te tauturu i te rapaauraa i te taata. E piti hepetoma i muri iho, i te pae hopea o to'u tere, ua haamata vau i te mihi i te fenua. Ua mihi au i to'u utuafare, i to'u ro'i au maitai, e i to'u fare.

I ta'u Sabati hopea i Afirita, ua ti'a ia'u ia faanaho i ta'u tarena ohipa ia nehenehe ta'u e haere i te pureraa. Noa'tu e, aita te Ekalesia i te-papû-hia i Rwanda, ua itehia ia'u i ni'a i te Itenati i te hora pureraa e te mau arata'iraa no te puromu.

Teie ho'i taua mau arata'iraa ra no te puromu : « A haere na ni'a i te purumu timahia e tae atu i mua i te fare faatereraa hau. A imi i te hoê opani aua matara. I muri iho a pou i te mau e'a ».

A pee ai au i teie mau arata'iraa, ua haamata a'era vau i te faaroo i te hoê reo himene matarohia. Ua pou vau i te mau e'a, e ua faaroo a'era vau i te mau parau ra no te himene « Auê te Paari » (*Te mau himene*, no. 41). Ua tae atu vau i te hoê fare na'ina'i, tei reira te tahi tau taata rii te apapa ra i mua i te uputa tomoraa. Noa'tu e, e taata ê au no teie amuiraa, mai te mea ra i roto ia'u e, ua

fetii au ia ratou. E rave rahi taea'e e te tuahine no Rwanda tei haere mai e aroha rima ia'u, e i taua taime ra, ua pee ê te teimaha o te vai-otahi-raa tei ni'a ia'u—te i te fare au !

A tomo ai au i roto i te fare, ua faaea vau i roto i na hora pureraa e toru i matarohia, aita i taa ê i te mau pureraa e faatupuhia i roto i ta'u paroisa i Carifonia. Ua opere te Auhua'araa a Aarona i te oro'a mo'a, ua faatumuhia te mau a'oraa i ni'a i te


Noa'tu e, e taata ê au no teie amuiraa, mai te mea ra i roto ia'u e, e fetii au no ratou. E rave rahi taea'e e te tuahine no Rwanda tei haere mai e aroha rima ia'u.

Faaoa, e tae noa'tu i te haapiiraa no te Haapiiraa Sabati, hoê â huru e te haapiiraa i haapiihia i roto i ta'u paroisa i taua hepetoma ra.

Te mea faufaa roa'tu, ua itehia te Varua o te Fatu i roto i te mau pureraa atoa. Papû maitai e, ua ataata mai te Fatu i ni'a i teie mau taata maitai o te tamata nei i te tavini Ia'na ia au i te maraa ia ratou. Ua faaroo vau e, i te matahiti i ma'iri a'enei, e mea iti roa te taata no Rwanda i haere mai i te pure-raa i ô nei. Are'a râ, ua tai'o vau e, ua hau i te 100 taata tei tae mai, te afaraa e mau tamarii mata ataata.

I teie nei, ua matara Rwanda no te ohipa misionare, no reira, te mana'o nei au e, e manu'a rahi roa te mau misionare na roto i te faaiteraa te Varua i te rahiraa o te mau taata imi no Rwanda e, te Ekalesia i faaho'i-faahou-hia mai, o te basileia ia o te Atua no te ao taatoa nei—no te mau fenua atoa, no te mau taata atoa, e no te mau tamarii atoa a te Atua. Auê ho'i to'u mauruuru no te Ekalesia, i California ropu anei e aore râ, i raro mai i te purumu timahia i Afirita ropu. ■

Steven Sainsbury, California, te mau Hau Amui no Marite



EAHA TE MEA I ARATA'I MAI IA OUTOU I REXBURG NEI ?

I muri a'e e rave rahi matahiti i te oraraa i te vahi aita i rahi te melo o te Ekalesia, ua taui maua o ta'u tane i te faaearaa e ua haere maua i Rexburg, Idaho, te mau Hau Amui no Marite, e piti ana'e utuafare melo ore i reira. Ua fana'o maua i te mea e, ua ora maua i piha'i iho i te hoê o taua na utuafare ra.

Te tapu ra te metua tane i te aihere i te taima matamua a haere ai maua na ni'a i to maua aroa. Ua haere atura maua o ta'u tane na roto i te aua no te farerei. A toro atu ai au i to'u rima, ua ui atura vau e, « Ahani, eaha te mea i arata'i mai i to oe utuafare i Rexburg nei ?

Ua pahono mai ra oia e, « no ta'u ohipa—e ua imi taa ê matou i te hoê oire e ti'a ia faaitehia'tu i te Mesia ra ».

Mai te mea ra e, ua taorahia mai te hoê pakete pape to'eto'e i ni'a i to'u mata, tera râ, ua ataata vau. Ua faaoti a'era vau i taua taima ra e, noa'tu eaha ta to maua taata tupu apî i parau e aore râ i rave, e riro mai maua ei na taata tupu *maitai roa a'e* aita teie utuafare i farii a'enei. I roto i te mau

farereiraa atoa, e tamata maua i te pahono noa ma te mārû, te here e te maitai, mai ta te Faaora e na reira.

I roto i na matahiti e va'u i muri mai, ua tupu te mau ohiparaa i rotopu i to matou na utuafare. Ua ani manihinihia te metua vahine ia haere mai i te mau ohiparaa a te Sotaiete Tauturu. Ua ani manihini mai oia ia'u e e rave rahi Feia Mo'a i te Mau Mahana Hopea Nei no taua vahi ra, ia haere i te hoê aru'i putuputuraa faaterehia na ta'na ekalesia. Ua ani manihinihia ta'u tane e o vau ia haere e faaroo i te aru'i oriraa e te ha'utiraa piana a ta raua mau tamarii. Ua anihia to raua utuafare ia amui mai i roto i te faaoaoaraa tunuraa maa no taua vahi ra. E ua farii maua i te mau niuniu na ta raua mau tamarii paari ia hinaaro ana'e ratou e ho'i i te fare ia faaoti te ohipa, aita i roaahia to ratou na metua.

Ua haape'ape'a na metua a'unei ta raua mau tamarii e haamata ai i te au roa i te Feia Mo'a i te Mau Mahana Hopea Nei, no reira aita raua i vaiiho

i ta raua mau tamaroa ia tomo mai i roto i te faanahoraa ohipa Scout a ta matou paroisa. Tera râ, ua riro to maua utuafare ei vahi papû, inaha, e vaiiho raua i ta raua mau tamarii ia haere mai e ha'uti e ta maua mau mootua ia haere mai ratou e farerei ia maua.

I te mau taima atoa e tamata to maua na taata tupu i te tauturu mai ia maua ia ite « i te hape o to maua haerea », e faahaamana'o maua ia raua e, te faatura nei maua i to raua mau ti'aturiraa, e i te huru o to raua oraraa e ta raua huru haapa'oraa i ta raua mau tamarii. E i reira maua e parau atu ai e, te hinaaro atoa nei maua ia faatura atoa mai raua i to maua mau ti'aturiraa, tei faatumu-atoa-hia i ni'a i te mau haapiiraa a te Faaora.

Ia tamata ana'e te metua vahine i te faa'iro i to matou taa-ê-raa mai te hoê abuso hohonu na roto i te parauraa e, ua ti'aturi te Feia Mo'a i te Mau Mahana Hopea Nei i te hoê « Iesu taa ê », e faahaamana'o vau ia'na e, ua ti'aturi matou paatoa e, e mea hana-hana Oia e e Tamaiti here Oia na te Atua. I te pae hopea ua tupu mai te hoê auhoaraa maitai roa i rotopu ia'na e o vau.

Ua taui to raua utuafare i te faaearaa ma te ore e tomo mai i roto i te Ekalesia. Tera râ, mai te mea e, e nehenehe ta ratou e parau e, « Ua noho matou i rotopu i te mau momoni ; e mau taata maitai ratou e te faatura i te taata ma te aau tae mau », e nehenehe ia ta'u e parau e, ua manu'a matou i te riroraa ei mau taata tupu maitai e i te tautururaa ia ratou ia riro ei feia aau matara a'e e te afaro i roto i ta ratou mau parauraa no ni'a i te Feia Mo'a i te Mau Mahana Hopea Nei. ■

Sandra Rush, Idaho,
te mau Hau Amui no Marite



Ua faaoti a'era vau e, noa'tu eaha ta to maua taata tupu apî e parau e aore râ, e rave, e riro maua ei na taata tupu *maitai roa a'e* aita teie utuafare i farii a'enei.

HOÊ AFATA HOHO'A

E rave rahi matahiti i ma'iri a'enei, te faaru'e ra maua o ta'u tane i te pehu i ni'a i te faaru'eraa pehu a te oire, ite atura vau i te hoê o te mau vahine rave ohipa i te raveraa i te hoê afata no te tuu i roto i te umu auahi. I taua iho taimera, ua parari te afata, e ua purehu mai ra te tahi mau hoho'a i rapae.

A hi'o noa ai au i te reira, ua tupu mai ra te hoê mana'o puai i roto ia'u ia haere e rave mai i taua afata hoho'a ra. Ua ou'a a'era vau i rapae i te pereoo no te tauturu e ohi i te mau hoho'a. Tera vahine e o vau, maua toopiti atoa ra i te mana'oraa e, ua hape te faaru'e-raa-hia taua mau hoho'a ra, e ua taparu atura vau ia'na ia horo'a mai i te reira no te tamata ia imi i te taata e hinaaro e rave i te reira.

A hi'ohi'o ai au i roto i taua mau hoho'a ra e rave rahi i roto i te afata, ua itehia mai ia'u hoê vehi rata na te hoê taata i Warburg, Alberta, Canada. I roto i te mau matahiti e rave rahi i muri iho, ua papa'i au i te tahi mau rata i te mau taata hoê â paeraa, tera râ, aita hoê pahonorraa i tae mai.

I te taimera roa ai ta matou Itenati, ua ite a'era vau e, te vai ra hoê taiete aamu i Warburg. Ua ani au e, te vai ra anei te hoê taata e rave ra i te ohipa i reira o tei ite i te mau i'oa tei itehia ia'u i muri i te mau hoho'a.

Hoê ava'e i muri iho ua farii au i te hoê niuniu na te hoê taata tei farereihia e te taiete aamu. Ua parau mai oia e, e tuahine to'na e faaea ra e ere i te mea atea roa ia maua, e ua ani mai ra, e nehenehe anei i to'na tuahine e hi'o i taua mau hoho'a ra. Na ô atura maua e, oia mau roa.

I te mahana i muri iho, ua haere mai ra o Floyd e o Beth Hawthorn, Feia Mo'a i te Mau Mahana Hopea Nei, e hi'o i taua mau hoho'a ra. I

to'u iritiraa i te afata, na ô mai ra te taea'e Hawthorn e, « Teie oia », ma te faatoro i ni'a i te hoho'a i ni'a roa. E hoho'a ia no te papa ruau o te tuahine Hawthorn.

A rave ai raua i te tahi hoho'a i muri i te tahi hoho'a, ua faatia mai te taea'e e te tuahine Hawthorn i te mau aamu no ni'a i te mau taata i roto i te hoho'a tata'itahi. Aita i papû ia Hawthorn mâ e, e fetii anei raua e te taata i faaru'e i teie mau hoho'a, e aita roa raua e taa

ra e, no te aha teie mau hoho'a i faaru'ehia ai i ni'a i te faaru'eraa pehu.

Ua papû roa ia'u e, ua tauturu mai te Metua i te Ao ra ia'u ia faaho'i i te mau hoho'a i te utuafare Hawthorn ra. Te faaite papû nei au e, te ohipa aamu utuafare, o te hoê ia o te mau ohipa faufaa roa a'e e ti'a ia ravehia. Mai te mea e, ua hinaaro tatou ia rave i te ohipa, e tauturu mai te Fatu ia tatou ia rave i te reira. ■

Cindy Heggie, Alberta, Canada

I taua iho taimera, ua parari te afata, e ua topa mai ra te tahi mau hoho'a i rapae. A hi'o noa ai au i te reira, ua tupu mai ra te hoê mana'o puai i roto ia'u ia haere e rave mai i taua afata hoho'a ra.



Nahea vau e riro ai ei misionare **MANUÏA** ?

Noa'tu te puai o te ohipa ta'u e ta to'u hoa i rave, ua pato'i te mau taata atoa i ta maua parau poro'i. Eaha te ti'a ia maua ia rave no te riroraa ei misionare manuïa ?

Na Lauren Bangerter Wilde

Ua hau rii hoê matahiti i teie nei to'u riroraa ei misionare a tupu mai ai te hoê fifi taa ê mau. Tei ropu maitai maua i te hoê pu'e tau poiri e te marehurehu—no mahuti noa mai ra na roto mai i te hoê pu'e tau to'eto'e haere atu i roto i te pu'e tau faahoturaa raau. E noa'tu te itoito o to'u hoa e o vau nei, pauroa te taata ta maua i paraparau, ua pato'i u'ana ratou i ta maua parau poro'i. Ia farerei ana'e maua i te tahi atu mau misionare, ua ite maua e, e mea tere maitai ta ratou ohipa. Aita roa vau i taa e, no te aha aita maua i manuïa. Ua ite maitai au i te reo i teie nei, e na hoa maitai roa maua, ua faatupu maua i te ti'aturiraa e i te mau melo, e ua tamata maua i te pee i te Varua e i te haapa'o maitai roa i te mau ture o te misioni.

Tera râ, noa'tu te huru o te ohipa ta maua i rave, ua farerei maua i te pato'iraa i te mau vahi atoa. I muri a'e e rave rahi hepetoma mai teie te huru, ua fati au i raro a'e i to'u huru au ore. I roto i te hoê apooraa faaineineraa ua na ô a'era vau e, « Eaha te faufaa ? Aore hoê taata e faaroo mai ia taua ». E hi'oraa atea e te maitai a'e to to'u hoa i to'u, e ua parau mārû mai ra oia e, « Te faataa nei taua i te mau

opuaraa no te faaite i to taua faaroo. E rave taua i te mau opuaraa no te tai'o mai i to taua mau maitai ».

A feruri ai au i to'na mana'o, ua ite a'era vau e, ua faaohipa vau i te raau faito hape no te faito i to'u manuïaraa ei misionare. Te horo'a mai nei te *Ia Poro Haere i Ta'u nei Evanelia : Te hoê arata'i no te ohipa misionare* i te hoê tapura no te mau huru o te mau misionare manuïa,¹ e ua ite a'era vau e, pauroa taua mau huru ra, tei raro a'e ia i te mana o te misionare. Aita to'u e mana no te tura'i i te taata ia farii e aore râ, ia ore e farii i te parau poro'i o te evanelia, tera râ, e nehe-nehe ta'u e arai i te huru misionare ta'u e hinaaro ia riro. Ua faaite mai to'u hoa ia'u e, na te faaroo rahi a'e i roto ia Iesu Mesia e na te aau mehara no Ta'na mau haamaitairaa e tauturu ia'u ia ite i te mau rave'a i faariro a'ena ia'u ei misionare manuïa.

Na te faaroo e haamaramama i te semeio

Ua tupu te haehaa i roto ia'u i te iteraa e, te ere ra vau i te faaroo. Ua imi au i te mau vahi e ti'a ai ia'u ia haapuai i to'u faaroo e ua ite a'era vau e, ia ore ana'e te ohipa e tere ia au i

teie faaineinehia, ua tupu te paruparu i roto ia'u. Te na ô ra te *Ia Poro Haere i Ta'u nei Evanelia* e : « Eiaha roa râ to oe aau e tarapape ; e haaparuparu te reira i to oe faaroo. Mai te mea e haamarirau oe i ta oe mau opuaraa, e iti mai ia to oe maitai, e paruparu to oe hiaai, e fifi ia oe i te peeraa'tu i te Varua ».² Ua ite a'era vau e, ua vaiiho vau i to maua mau manuïa ore ia haaparuparu i to'u faaroo.

Ua haamata vau i te pure no te ani ia tauihia to'u aau e ia rahi atu to'u faaroo. Ua turu'i atoa vau i ni'a i te fafauaraa tei horo'ahia mai i roto i te Moromona 9:21 : « O te faaroo i te Mesia, aore to'na e feaa e hoê iti a'e, o ta'na e ani atu i te Metua na roto i te i'oa o te Mesia, e horo'ahia mai ia ia'na ; e ua parauhia'tu teie no te mau taata atoa, e no te feia atoa hoi i te mau otia o te fenua nei ». Na teie fafauaraa i tura'i ia'u ia pure u'ana atu â no te ani i te mau haamaitairaa e te mau semeio ta maua o to'u hoa e hinaaro, ma te parau tamau atoa e, « Ia ti'a to oe hinaaro ». Na teie mau pure i tauturu ia'u ia farii i te faahuru-ê-raa o te mau faaineineraa e te mau manuïa-ore-raa ma te faaroo rahi a'e, ma te ite e, e pahono tamau mai te Metua i te



TE RIRORAA EI MISIONARE MANUĪA

E ite oe e, ua riro oe ei misionare manuĪa :

- la ite oe i te haapapūraa a te Varua i te mau taata na roto ia oe.
- la here oe i te mau taata e ia hinaaro i to ratou ora.
- la haapa'ō maitai oe i te mau ture misionare.
- la faatupu i te mau ateributi mai to te Mesia.
- la faaara i te mau taata i te mau hopea o te hara. A ani manihini ia ratou ia rave e ia haapa'ō i te mau fafauraa.
- la hamani maitai haere e ia tavini i te mau taata ia tae mai te titauraa, noa'tu e ua farii e aore rā, aita i farii i ta oe parau poro'i.

Hi'o *Ia Poro Haere i Ta'u nei Evanelia: Te hoē arata'i no te ohipa misionare* (2004), 11–12.



A IMI I TE MANA'O FARIĪ A TE FATU

« Ma to'u aau atoa, te titau manihini nei au ia outou ia imi i te mana'o farii o te Fatu e ia oaoa i Ta'na mau haamaitairaa tei fafauhia ... E ite tatou e, ua fariihia tatou e Ana, noa'tu to tatou ti'araa, to tatou faito e aore rā to tatou mau oti'a tahuti nei. Na To'na mana'o farii e To'na here e faaitoito ia tatou, e faarahi i to tatou faaroo e e tauturu ia tatou ia faaruru i te mau mea atoa i mua ia tatou i roto i te oraraa nei. Noa'tu ā to tatou mau tamataraa, e manuĪa tatou, e faufaa-hia tatou [a hi'o Mosia 2:22] e e farii tatou i te hau [a hi'o Mosia 2:41] ».

Elder Erich W. Kopischke no te Hitu Ahuru, « Ia fariihia mai e te Fatu », *Liahona*, Me 2013, 106.

Ao ra i te mau pure faaroo—noa'tu e, e tae mai te mau pahonora a i te rave'a tia'i-ore-hia. Ua ti'a ia'u i teie nei ia ite i te mau rave'a a te Atua no te arata'i ia maua i te roaraa o te mahana.

A imi ai au i te rave'a no te haapuai i to'u faaroo, ua ite a'era vau e, te parau faaitoito i roto i te *Ia Poro Haere i Ta'u nei Evanelia* e parau mau ĩa : mai te mea e, e faateitei outou i ta outou mau titauraa, e teitei atoa ĩa to outou aravihi i te ohipa, e tupu to outou hinaaro i te rahi, e e ti'a ia outou ia pee maitai atu i te Varua. Hau atu i te reira, ua rahi atu to'u feruriraa maitai no ni'a i te ohipa misionare e ta'u taviniraa ei misionare ia ite ana'e au e ia maururu ana'e au i te mau semeio i tupu i te mau mahana atoa.

E pato'i te aau mehara i te pohehae

Ua haamata te Fatu i te faaite mai ia'u e, e faatupu Oia i te semeio na maua i te mau mahana atoa—tera rā aita i ti'a ia'u ia ite i te reira e tae roa'tu i te taime a faaitoito ai au ia faaite i te aau maururu mau. Ua hau te aau mehara i te faaite-noa-raa i te peu maitai e aore rā i te mau peu au. A faaite ai au i te aau mehara i te Fatu e ia vetahi ê, ua faarii vau i te puai. Ua ite au ia'u i te oaoaraa no te tahi atu mau misionare, a manuĪa ai ratou, eiaha rā te pohehae (a hi'o Alama 29:14, 16). Ua ti'a ia'u i teie nei ia faatumu i te mana'o i ni'a i tei roaa ia'u, e i ni'a i te ohipa maitai i tupu, eiaha rā i ni'a i te mea aita e vai ra e i ni'a i te fifi i tupu.

Ua haapii mai au e, na te aau mehara e tupohe i te ohipa faaauraa ia tatou iho e ia vetahi ê. Tauga mau taime ra a feruri ai au e, e ere au i te misionare manuĪa, no te mea ĩa e, ua parau vau ia'u iho e, « aita vau e rave nei mai ia vetahi ê atu », e aore rā, « E mea maitai a'e ratou i ia'u i roto i teie

ohipa ». Ua haapii atoa mai au e, o te arata'iraa a te Fatu te horo'araa mai ia tatou i te mau hi'oraa maitai no te faaitoito e no te pee, are'a o te haavare-raa a Satane te faahemaraa ia tatou ia faaau ia tatou iho ia ratou no te faito i to tatou faufaa e aore rā, to tatou manuĪaraa. Tera rā, e mea marama-rama maitai te *Ia Poro Haere i Ta'u nei Evanelia* i ni'a i te reira : « Eiaha e faafaito ia oe i te tahi atu mau misionare e ia faaau i te mau hopearaa o ta oe mau tautooraa i ta ratou ». ³ I te pae hopea, na te aau mehara i tauturu ia'u eiaha ia faate'ote'o e i faahaama-na'ō atoa ia'u e, na te Fatu e faatere nei i Ta'na ohipa. Aita i titauhia ia'u ia pohehae no te mea e, e mea manuĪa a'e to'u mau hoa misionare. ⁴

Te faito mau o te manuĪaraa

Hou a tau ai to'u hi'oraa, ua faatumu teimaha vau i ni'a i te hoē huru haamaitairaa taa ê, i mo'ehia ai ia'u ia araara noa i to'u na mata i ni'a i te tahi atu mau rave'a te Fatu e pahono ra i ta maua mau pure e e haamaitai ra i ta maua ohipa misionare. I te hopea ra, ua haamata te Fatu i te haamaitai i te ohipa misionare i roto i to maua tuhaa fenua na roto i te mau rave'a nehenehe e te mana'o-ore-hia. Ua itehia ia maua te taata tei hinaaro ia farii i ta maua parau poro'i, tera rā, ua haapii mai au i taua taime ra e, eiaha e faito i to'u manuĪa ia au i te ma'itiraa a vetahi ê.

Ua faaite mai te peresideni Gordon B. Hinckley (1910–2008) i te parau a'o a te hoē peresideni misioni no ni'a i te ohipa misionare : « A rave i te maitai roa a'e e roaa ia oe, te maitai, te maitai roa a'e. A faaoti i to outou mau pure e a rave itoito i te ohipa e a vaiiho na te Fatu e ooti ». ⁵ Te haapii atoa mai nei te *Ia Poro Haere i Ta'u nei Evanelia* i te hoē mea mai



I roto i te mau hi'oraa e rave rahi, e nehenehe i te faito o to'u manu'āraa ei misionare ia faitohia ia au i to'u hinaaro mau ia tatarahapa e i to'u itoitō i te rave tamau noa i te ohipa.

te reira te huru no ni'a i te mau misionare manu'ā : « Ia ohipa ma te maitai... ma te horo'a i te ope puai i te hopoiraa mai i te mau varua i te Mesia, e ia imi itoitō i te haapiiraa e a tamau i te haamaitai noa ».⁶

A vai noa ai te hinaaro i roto ia'u ia tatarahapa, e a faaite noa ai au ma te haavare ore i te Fatu e, te rave ra vau ia au i te maitai roa a'e e roa ia'u, e nehenehe ta'u e ti'aturi e, ua riro vau ei misionare manu'ā—noa'tu e, ua farii anei te taata i ta maua poro'i e aore rā, aita. I roto i te mau hi'oraa e rave rahi, e nehenehe i te faito o to'u manu'āraa ei misionare ia faitohia ia au i to'u hinaaro mau ia tatarahapa e i to'u itoitō i te rave tamau noa i te ohipa.

Ua papa'i au e rave rahi semeio i roto i to'u buka aamu mai teie atu taime o ta'u misioni. A faaitoitō ai au ia rahi atu to'u faaroo e to'u maururu, ua roa ia'u te hoē hi'oraa atea maitai a'e, ua haapae au i te haaparuparu i

te mana'o, e ua ite au i te faa'ururu rahi atu a te Varua i roto i te ohipa. Ua itehia ia'u e, te mea ta te *Ia Poro Haere i Ta'u nei Evanelia* e haapii nei, e parau mau ia : « Ia horo'a hope roa oe ia oe iho, e nehenehe na roto i teie mau iteraa e riro oe i te tarapape area rā, eiaha oe e tarapape ia oe iho. E ite papū oe e, ua maururu te Fatu ia ite oe i te Varua i te ohiparaa i roto ia oe ».⁷ Ia ite ana'e au e, ua oaoa te Fatu ia'u, e nehenehe ta'u e faaoromai i te mau tamataraa atoa. ■

Te ora nei te taata papa'i i Maine, te mau Hau Amui no Marite.

TE MAU NOTA

1. Hi'o *Ia Poro Haere i Ta'u nei Evanelia* : *Te hoē arata'i no te ohipa misionare* (2004), 11–12.
2. *Ia Poro Haere i Ta'u nei Evanelia*, 11.
3. *Ia Poro Haere i Ta'u nei Evanelia*, 11.
4. A hi'o Jeffrey R. Holland, « Te feia rave ohipa i roto i te ô vine », *Liahona*, Me 2012, 31.
5. Gordon B. Hinckley, « Find the Lambs, Feed the Sheep » *Liahona*, Tiurai 1999, 120.
6. *Ia Poro Haere i Ta'u nei Evanelia*, 12.
7. *Ia Poro Haere i Ta'u nei Evanelia*, 12.

A FAAITE I TO OUTOU ITERAA

« No ho'i noa mai nei au na ta'u misioni, e mai te mea ra e, ua mo'e ê to'u hiro'a no ni'a i te opuaraa. Eaha ta'u e ti'a ia rave ? »

Outou e mau misionare tei faaoti i te misioni, a faaite mai ia matou e mea nahea te tupuraa to outou ho'iraa mai na te misioni i te fare, e te haere-faahou-raa i te haapiiraa, e te ohipa, e aore rā, te tahi atu mau ohipa. A hapono i to outou iteraa na roto i te rata uira i te liahona@ldschurch.org e aore rā, a tuu atu i ni'a i te ltenati i te liahona.lds.org. A papa'i i to outou i'oa taatoa, te mahana fanauraa, e te i'oa o te paroisa e aore rā te amaa.



Te riroraa ei misionare *Ia Poro Haere i Ta'u nei Evanelia*



**Na Elder
David A. Bednar**

No te Pūpū no
te Tino Ahuru ma
Piti Aposetolo

*E nehenehe ta outou e rave i
te reira! Ua ite te Fatu ta outou
e mono nei e e tavini nei e, ua
nehenehe ta outou e rave i te
reira. Ua ite au e nehenehe ta
outou e rave i te reira.*

Te hoê aposetolo, a tahi e na mua
roa, e misionare oia i te mau
taime atoa. No reira, te oaoa taa
ê nei au ia paraparau atu ia outou to'u
mau hoa tavini i roto i teie ohipa nehe-
nehe o te mau mahana hopea nei.

EAHA TE HOÊ MISIONARE IA PORO HAERE I TA'U NEI EVANELIA ?

Te hoê misionare *Ia Poro Haere i
Ta'u nei Evanelia* o te hoê ia tavini
na te Fatu, tei piihia na roto i te tohu
e tei haamanahia na roto i te tuuraa
rima, o te poro i te evanelia mure ore
a te Faaora tei faaho'i-faahou-hia mai
ia au i Ta'na raveraa (a hi'o PH&PF
50:13–14, 17–24 ; PH&PF 68:1).

Te opuaraa tumu a te hoê misionare

te tatarahia i roto i te *Ia Poro Haere i
Ta'u nei Evanelia* maori râ, o te « ani
manihini i te mau taata ia haere mai i te
Mesia na roto i te tautururaa ia ratou ia
farii i te evanelia tei faaho'i-faahou-hia
mai na roto i te faaroo ia Iesu Mesia
e i Ta'na tarahara, te tatarahapa, te
bapetizoraa, e te fariiraa i te horo'a o
te Varua Maitai, e i te tape'araa e tae
noa'tu i te hopea ra ».¹

Te hopoi'a mo'a o te pororaa i
te evanelia mai te haamanaraa e te
raveraa i te mau oro'a faaora, ua
ravehia ia te reira mai te tau a tiavaru-
hia ai Adamu i rapae i te Ô i Edene,
e e rave-tamau-noa-hia te reira e tae
noa'tu i te taime « a parau mai ai o
Iehova Rahi e ua oti te ohipa ».²

TE MAU TITAUAAA NO TE RIRO EI MAU MISIONARE IA PORO HAERE I TA'U NEI EVANELIA

Te hinaaro nei au e aparau e pae tauraa tumu no te rirora ei mau misionare *Ia Poro Haere i Ta'u nei Evanelia*

Titauraa #1 : e haro'aro'a te mau misionare *Ia Poro Haere i Ta'u nei Evanelia* e, te tavini nei e te mono nei ratou ia Iesu Mesia.

E ite e e haro'aro'a te mau misionare *Ia Poro Haere i Ta'u nei Evanelia* e, o vai ta ratou e mono nei, no te aha ratou e tavini ai, e eaha tei titauhia ia ratou ia rave. Ua pihia te mau misionare rave tamau no te tavini e, ua faataa-maite-hia ei tavini e ei mau ti'a no te Fatu ra o Iesu Mesia. Te faaite papû nei tatou i To'na i'oa e i te ti'a mau e te hanahana e i te misioni a Iesu Mesia i te mau nunaa atoa, te mau opu atoa, te mau reo atoa e i te mau taata atoa (a hi'o PH&PF 133:37).

Ua here tatou i te Fatu. Te tavini nei tatou Ia'na. Te pee nei tatou Ia'na. Te ti'a nei tatou No'na.

Ia riro Ta'na mau opuaraa ei mau opuaraa na tatou. Ia riro To'na mau hiaai ei hiaai no tatou. Ia riro Ta'na ohipa ei ohipa na tatou. Ia riro To'na mau haerea ei mau haerea no tatou. Ia riro to'na hinaaro ei hinaaro no tatou.

Ei mau ti'a no te Faaora, te haapii nei tatou i te mau haapiiraa tumu e i te mau parau tumu o Ta'na evanelia ohie e te maramarama i faaho'ihia mai. Aita tatou e faaite i to tatou iho mau mana'o e aore râ, feruriraa. E poro haere e e faaite papû tatou i te parau mau ohie i faaho'ihia mai, ia au i te raveraa a te Fatu e na roto i te mana o To'na Varua.

E haro'aro'a te mau misionare *Ia Poro Haere i Ta'u nei Evanelia* e, aore e hopearaa to ta tatou hopoi'a no te ti'a ei mono no te Faaora e no te faaite i te iteraa papû no ni'a Ia'na. A haamana'o noa Ia'na i roto i te mau mea atoa ta



outou e feruri, i roto i te mau mea atoa ta outou e rave, e i roto i te mau mea atoa ta outou e tautoo nei ia riro mai, e a ti'a ei mono No'na ma te afaro i mua i te mau tamarii paatoa a te Metua i te Ao ra ta outou e ohipa nei i piha'i iho i teie nei e a muri noa'itu.

Titauraa #2 : e mea ti'amâ te mau misionare *Ia Poro Haere i Ta'u nei Evanelia*.

Te hoê titauraa tumu no te riro mai ei mau misionare *Ia Poro Haere i Ta'u nei Evanelia* maori râ, te ti'amâraa o te taata iho i mua i te Faaora.

E faahiti atu vau e rave rahi mau parau mau ohie ma te maramarama mai ta'u i ite.

- E mau ti'a haamanahia tatou no te Taraehara e no te Faaora o te ao nei.
- Ua pihia tatou no te faaite i Ta'na evanelia mure ore i faaho'ihia mai.
- Eita e ti'a ia tatou ia tafetafetahia i te mau tafetafeta o te ao nei e ia riro ei ti'a haamanahia No'na e ia haa ma te mana i roto i To'na ra i'oa.
- Eita ta tatou e nehenehe e tauturu ia vetahi ê ia upooti'a i ni'a i te taamuraa o te hara mai te mea e, ua tafifi-hia tatou iho i roto i te hara (a hi'o PH&PF 88:86).
- Eita ta tatou e nehenehe e tauturu ia vetahi ê ia haapii i te tatarahapa mai te mea e, aita tatou iho i haapii ia tatarahapa mau e ia tatarahapa hope roa.
- E nehenehe ta tatou e poro e e haapii ma te mana i te mau mea ana'e o ta tatou e tautoo nei ia riro mai.
- E haavâhia tatou ei tiaau i mua i te Atua no to tatou mau hinaaro parau-ti'a e no to tatou ti'amâ no te haa ei mau ti'a No'na.

Aita i titauhia ia tatou ia maitai roa i teie taime. Tera râ, ua faauehia tatou ia vai mâ e ia haere ma te parau-ti'a i mua i te Faaora o Iseraela. « Ia mâ roa outou o te hopoi i te mau farii a te Fatu ra » (PH&PF 38:42).


Te tatarahapa e parau tumu ia no te ti'aturiraa e te faaoraraa—e ere no te haaparuparuraa mana'o e te pe'ape'a. Oia mau, te tatarahapa o te faahaehaaraa ia—eiaha râ te haamâta'uraa. E mea titau rahi te tatarahapa e te tamahana-hana atoa, e mea etaeta e te tamârû atoa. E horoa tao'a rahi te tatarahapa tei faatupuhia na roto i te Taraehara o Oia ta tatou e here, e tavini, e e pee nei.

Noa'itu e, ua rave outou i te mau hara teimaha, na roto i te Taraehara o Iesu Mesia e te tatarahapa ma te aau tae mau, ua tamâhia e aore râ, e nehenehe outou e tamâ-faahou-hia e e ti'amâ faahou.

Te vai ra te feia apî e titauhia ia tatarahapa hope roa. Teie te taimē. Eiaha na, eiaha roa na e faataere i te mahana o to outou tatarahaparaa.

Te vai ra te feia apî tei tatarahapa e te tamau noa nei â i te tatarahapa e o te uiui nei e, ua rave anei ratou i te mau mea atoa e titauhia ia fariihia mai ratou e te Fatu (a hi'o PH&PF 97:8). A haamana'o na e, ua titau te Fatu ia outou ia vai mâ eiaha râ ia maitai roa. Mai te mea e, te ohipa faahou ra te Varua Maitai i roto i to outou oraraa, o te faaiteraa papû a'e ia te reira o te faaoreraa hara a te Fatu no te mea « e ore te Varua o te Fatu e vai i roto i te hiero viivii ra » (Helamana 4:24). E ia ite outou e, te titauraa no te « faa-ore i te hapa a te taata atoa » (PH&PF 64:10) o te faaore-atoa-raa ia i ta outou iho hapa.

Te mau misionare *Ia Poro Haere i Ta'u nei Evanelia* e mau pipi ia na te Fatu o Iesu Mesia o te faatura i te fafau-raa e o te haapa'o i te faaueraa. A haamana'o tamau noa Ia'na e ia riro outou ei mea mâ e te ti'amâ no te mono Ia'na.



Titauraa #3 : e poihere te mau misionare *Ia Poro Haere i Ta'u nei Evanelia* i te mau parau no te ora mure ore.

Te ani manihini nei au ia outou ia « haaputu noa i roto i to outou mau feruriraa i te mau taimē atoa i te mau parau no te ora » (PH&PF 84:85). Te haaputuraa i te mau parau no te ora mure ore, ua hau atu ia i te tuatapapanoa-raa e aore râ, i te tamau-aau-noa-raa i te reira, e au ia mai te « oaoa i te ite i te parau a te Mesia » (2 Nephi 31:20 ; a hi'o atoa 2 Nephi 32:3) e ua hau atoa'tu i te tamatamataraa e aore râ i te amuamu-noa-raa. Te haaputuraa, no'u nei, o te faatumuraa ia i ni'a i te hoê mea, e te ohiparaa, te tuatapapa-hohonu-raa e te aporaa, te feruri-hohonu-raa e te pureraa, te faaohiparaa e te haapiiraa mai, te haafau-faraa e te mauruururaa, e te oaoaraa e te amuraa ma te aminamina.

Haamana'o na e mea nahea te mau tamaiti a Mosia—e maha misionare faahiahia mau, o Amona, Aarona, Omonera, e o Himeni, i tupu ai—« to ratou ite i te parau mau i te rahi ; e mau taata mana'o papû hoi ia ratou, e i imi maite ratou i te parau i papa'ihia ra » (Alama 17:2).

Ua haaputu tamau maite mau teie mau misionare itoito i te mau parau o te ora mure ore. Aita ratou i tau'a ore e aore râ, i pee ohie noa

i te tuatapaparaa papa'iraa mo'a a te taata iho e i piha'i iho i te hoa. Ua ô hohonu roa te ite e te haro'aro'araa varua i roto i to ratou iho varua, e ua haapapûhia te mau haapiiraa tumu e te mau ture o te evanelia i roto i to ratou aau ei parau mau na roto i te mana o te Varua Maitai.

Ei mau ti'a no te Faaora, e hopoi'a tamau na outou e na'u atoa nei i te rave-itoito-raa e i te haamauraa i roto i to tatou aau e te feuriraa te mau haapiiraa tumu e te mau parau tumu o te evanelia i faaho'i-faahou-hia mai, tera ihoa râ i roto i te Buka a Moromona. Mai te mea e, e na reira tatou, ua fafauhia mai te haamaitairaa e, na te Varua Maitai « e faaite faahou mai hoi ia [tatou] i te mau parau atoa » (Ioane 14:26) e e horo'a mai i te mana i roto ia tatou a haapii ai e a faaite papû ai tatou. Tera râ, e nehenehe ta te Varua e ohipa i piha'i iho e na roto ia tatou mai te mea noa e, e horo'a tatou Ia'na i te hoê mauihaa no te faaohipa atu. Eita ta'na e nehenehe e tauturu ia tatou ia haamana'o i te mau mea aita tatou i haapii mai (a hi'o Alama 31:5).

E haaputu tamau noa te mau misionare *Ia Poro Haere i Ta'u nei Evanelia* i te mau parau o te ora mure ore, e turu'i ratou i ni'a i te maitai o te parau, e tei roto ia ratou te mana o te parau. A haamana'o tamau noa Ia'na, ia vai ti'amâ noa no te ti'a ei mono No'na,

e a haaputu e a turu'i i ni'a i te maitai o te parau.

Titauraa #4 : e haro'aro'a te mau misionare la Poro Haere i Ta'u nei Evanelia e, o te Varua Maitai te orometua mau e te hoê roa.

O te Varua Maitai te toru o te melo o te Atuaraa, e o Oia te faaite i te mau parau mau atoa e te orometua mau e te hope roa. Te haapiiraa ta tatou e haapii e te mau iteraa papû ta tatou e faaite, e riro ia ei faaineineraa no te hoê hoa o te Ekalesia ia ohipa e ia haapii no'na iho.

Ei mau misionare, hoê o ta tatou mau ohipa faufaa roa a'e, o te ani-manihini-raa ia i te mau hoa o te Ekalesia ia faaohipa i to ratou ti'amâraa morare e ia haa mai te au i te mau haapiiraa a te Faaora. Te raveraa e te haapa'oraa i te mau fafauraa pae varua, mai te pureraa no te ani i te hoê iteraa papû no te parau mau, te tuatapaparaa e te pureraa no te Buka a Moromona, te haereraa i te mau pureraa a te Ekalesia, e te haapa'oraa i te mau faauerua, e titauhia ia i te mau hoa o te Ekalesia ia faaite i te faaroo, ia rave i te ohipa e ia taui.

Noa'tu te huru to tatou itoitou i te taviniraa, eita ta outou e ta'u e nehe-nehe e tura'i e aore râ, e faahepo i te parau mau ia ô i roto i te aau o te mau hoa o te Ekalesia. Ta tatou ohipa maitai roa a'e, o te hopoi-noa-raa ia i te poro'i o te parau mau i *i roto* i te aau (a hi'o 2 Nephi 33:1). I te pae hopea, titauhia i te hoê hoa o te Ekalesia ia rave i te ohipa ma te parau-ti'a, e na roto i te reira, e ani manihini i te parau mau *i roto roa* i to'na iho aau. Na roto ana'e i teie rave'a e nehenehe ai i te feia imi i te parau mau ma te aau tae e te feia faafariu-apî-hia ia faahotu i te aravihi pae varua no te imi i te mau pahonoraa no ratou iho.

No te mea, e hopoi'a na tatou ia

tauturu i te mau hoa o te Ekalesia ia haapii mai na roto i te faaroo e na roto i te mana o te Varua Maitai, e ere teie ohipa no ni'a ia'u, e e ere roa'tu no ni'a ia outou. Titauhia ia tatou ia imi i te mau rave'a atoa no te haapa'o i ta tatou hopoi'a misionare, tera râ, « eiaha e faaapiapi i te e'a » ia ti'a ho'i i te Varua Maitai ia rave i To'na ti'araa e Ta'na ohipa mo'a. Inaha, no outou e no vau nei, ei mau ti'a no te Faaora, te mau mea atoa ta tatou e rave no te huti mai i te mana'o o te taata i ni'a ia tatou iho—i roto i te mau poro'i ta tatou e vauvau, i roto i te mau raveraa ta tatou e faaohipa, e aore râ, i roto i to tatou iho hi'oraa e te huru—o te hoê ia huru faatereraa o te haataupupu i te haapiiraa maitai a te Varua Maitai.

« E a'o anei oia i te reira na roto i te Varua o te parau mau e aore râ, i te tahi ê anei? E mai te mea i te tahi rave'a ê atu ra e ere ia i ta te Atua » (PH&PF 50:17–18).

A haamana'o tamau noa Ia'na, a vai ti'amâ noa ia riro ei ti'a No'na, a haaputu i Ta'na parau, e a vaiiho i te

orometua haapii rahi e te parau mau, te Varua Maitai, ia faaite papû no te mau parau mau atoa.

Titauraa #5 : e haro'aro'a te mau misionare la Poro Haere i Ta'u nei Evanelia e, e mea rahi atu te haapiiraa i te paraparau e te faati'araa parau.

A parahi ai te Faaora i te ni'a i te Mou'a Oliveta, na ô a'era Oia : « Eiaha e ahoaho atea noa, eiaha hoi e na mua i te imi i te parau ia parau, e te faaitehia mai râ ia outou i reira ra te parau ; e ere hoi o outou tei parau, o te Varua Maitai râ » (Mareko 13:11).

I te mau mahana matamua roa o teie nei tau tuuraa, ua haapii mai te Faaora i te mau misionare ia « hamama mai na i to orua na vaha e e faaihia mai ia » (PH&PF 33:8, 10) e ia « faateitei mai na orua i to orua na reo i teie nei feia ; a parau atu i te mau mana'o ta'u e tuu atu i roto i to orua na aau, e e ore roa orua e faahaamahia i mua i te taata nei ; no te mea e horo'ahia ia ia orua i te hora mau ihoa, oia ia i



te taime mau ihoa, i te mea ta orua e parau ra » (PH&PF 100:5–6).

Te faaite papû mai nei teie mau irava i te hoê hoho'a faufaa e te papû maitai no te poro haere e no te tauturu i te mau hoa o te Ekalesia ia haapii mai i te parau mau. Ua ite te mau misionare *Ia Poro Haere i Ta'u nei Evanelia* e, aita tatou e haapii nei i te haapiiraa ; te haapii nei tatou i te taata. Aita tatou e tai'o noa e aore râ, e faahiti aau noa i te mau poro'i no ni'a i te mau tumu parau o te evanelia. Te ani manihini nei tatou i te feia imi i te parau mau ia faatupu i te tauraa rahi o te aau. Ua ite tatou e, te paraparau-noa-raa e te faati'a-parau-noa-raa, e ere ia i te haapiiraa.

Te haapiiraa i te evanelia a te Fatu, e titauhia ia ia hi'ohi'o, ia toro i te tari'a e ia haro'aro'a, hou a paraparau ai. E mea faufaa te ana'iraa o teie na tuhaa ohipa e maha. Ia ite mai outou e, e na mua te hi'ohi'oraa e te tororaa i te tari'a i te haro'aro'araa e e mea na mua te hi'ohi'oraa, te tororaa i te tari'a e te haro'aro'araa i te paraparauraa. Ia faaohipa te misionare i teie raveraa, e ti'a ia ia ratou ia ite mai e ia haapii ia au i te mau hinaaro o te mau hoa o te Ekalesia.

Mai te mea e, e hi'ohi'o tatou, e toro atu i te tari'a e e haro'aro'a, e horo'ahia mai ia ia tatou nei « i te hora ti'a mau ra te reira tufaa o te horo'ahia'tu i te taata atoa » (PH&PF 84:85)—te mau parau mau e haapapû atu, e te mau pahonora e horo'a atu, e o te pahono i te mau hinaaro papû maitai o te hoê hoa o te Ekalesia. Na roto ana'e i te hi'ohi'oraa, te tororaa i te tari'a e te haro'aro'araa ho'i tatou e arata'ihia ai e te Varua no te parau e no te rave i te mau mea o te riro ei mau mea faufaa roa a'e no te feia ta tatou e tavini ra.

Te hi'ohi'oraa, o te hoê ia faaineine-raa faufaa rahi no te farii i te horo'a varua no te haro'aro'a. Te haro'aro'araa,



o te hi'oraa ia ia au i te mata varua e te fariiraa i te mana'o i roto roa i te aau—ma te iteraa e te fariiraa i roto i te aau i te hape o te hoê mana'o, te maitai i roto i te tahi taata, e aore râ, te parau tumu e titauhia no te tauturu i te hoê hoa o te Ekalesia. Te haro'aro'araa, o te faarooraa ia na roto i te tari'a varua e te fariiraa i te mana'o i roto roa i te aau—ma te faarooraa e te te fariiraa i roto i te aau i te mana'o faahiti-orehia no ni'a i te hoê faahitiraa parau e te hoê uiraa, te maitai o te hoê iteraa papû e aore râ o te hoê haapiiraa tumu, e aore râ, te haapapûraa e te hau e tae mai na roto i te mana o te Varua Maitai.

E ohipa te mau misionare *Ia Poro Haere i Ta'u nei Evanelia* ma te faaroo, e e arata'ihia ratou na te Varua no te tauturu i te mau hoa o te Ekalesia ia haapii mai i te parau mau. A haamana'o tamau noa Ia'na, a vai ti'amâ noa ia riro ei ti'a No'na, a haaputu i Ta'na parau, e a vaiiho i te Varua Maitai ia faaite papû i te mau parau mau atoa ; e a hi'ohi'o, a toro i te tari'a e a haro'aro'a a faaite papû ai outou no ni'a ia Iesu Mesia i mua i te feia imi mau i te parau mau.

E NEHENEHE TA OUTOU E RAVE I TE REIRA !

E tai'o paha outou i ta'u poro'i ma te ti'aturi e, e roaa i te tahi atu mau

feia apî atoa ia rave i te mea ta'u i tataratu. Tera râ, e riro outou i te uiui e, e nehenehe anei ta outou e rave i te reira. A faaroo mai na. E nehenehe ta outou e rave i te reira !

Ahiri e, ua pee au i te hinaaro o to'u aau, e rave ia vau i te tahi taime iti i piha'i iho ia outou tata'itahi. E aroha rima ia vau ia outou, e huti mai au ia outou i piha'i iho ia'u, e hi'o vau i roto i to outou na mata ma te parau e, « e nehenehe ta outou e rave i te reira ! Ua ite te Fatu ta outou e mono nei e e tavini nei e, ua nehenehe ta outou e rave i te reira. Ua ite au e nehenehe ta outou e rave i te reira. E ei tavini No'na, te fafau atu nei au e, e farii outou i Ta'na tauturu. A haamana'o tamau na e, na roto i Ta'na tauturu e To'na puai, e nehenehe ta outou e rave i te reira ! »

Ua here au ia outou e te pure nei au e, a tutava noa ai outou no te riro mai mai tei titauhia ia outou ia riro, e ite mai outou e e pahono mai outou ma te faaroo i te reo e i te arata'iraa a te Fatu. I reira outou e riro mai ai ei mau ti'a puai e te maitai no te Fatu ra o Iesu Mesia. ■

Na roto mai i te hoê a'oraa no te pureraa pae auahi tei faatupuhia i roto i te Pû Haapiipiraa Misionare i Provo i te 24 no Tiunuu 2011.

TE MAU NOTA

1. *Ia Poro Haere i Ta'u nei Evanelia: Te hoê arata'i no te ohipa misionare* (2004), 1.
2. *Te mau Haapiiraa a te mau Peresideni o te Ekalesia : Iosepha Semita* (2007), 162.

A ATAATA NOA ea PARAU E, AITA

Na Hazel Marie Tibule

I te hoê pu'e tau mahanahana, ua haere atu vau i roto i te hoê tau haapiiiraa i ni'a i te hoê motu no Bicol, i te fenua Philipino. E mea nehe-nehe te hi'oraa o te moana, e tia'i no vau i te reira i te mau po'ipo'i atoa.

I te pô râ, e mätä'u vau. Te reira te taima te taata i roto i te puhaparaa e haamata ai i te inu e i te arearea. E mea pinepine te ani-manihini-raa ia haere i taua mau arearearaa ra, e ua ti-tauhia ia matou ia haere i te reira mau faaarearearaa, i te mea e, e ere i te mea faatura ia oe e haere i te reira.

Te arearearaa matamua, e arearearaa ia no te farii i te mau piahi apî. Ua taiâ vau ia haere atu, no te mea ua papû maitai ia'u e, e horo'a mai ratou i te mau inu na'u, e aita vau i papû e, nahea ia pato'i i te reira. Ua niuniu vau i te hoê hoa to'u i roto i ta'u pa-roisa i to'u fenua, e ua horo'a mai oia i te tahi mau haapiiraa maitai roa o tei faaitoito ia'u.

I te haamataraa te arearearaa, ua horo'a mai ratou ia matou i te mau inu, au'a'é râ, aita ratou i faahepo ia matou ia inu. Ua farii to'u mau hoa i ta'u pato'iraa eiaha e inu, no reira, e mea huru ohie te pato'iraa i te inu i muri iho—e tae roa'tu i te hoê pô. I roto i te hoê o te mau arearearaa, ua haere mai te peresideni o te taiete. Te tape'a ra oia i te hoê mo-hina *lambanog* (e uaina no te reira fenua tei manihia i te

pape haari). Aita i maoro to'na taeraa mai, ua ite atura vau ia'na i te maniiraa i te uaina na te tahi pae. I muri iho na ô a'era oia e, « E ti'a ia outou ia haapii e nahea ia inu » e ua horo'a'tura i te hapaina i te hoê piahi ra. Ua inu oioi a'era oia i te reira.

Ua haamata a'era to'u mafatu i te tupa'ipa'i puai. Faatata to'u taima. Ua muhumuhu mărû noa vau ia'u iho e,

*Ua pato'i au i te mau titauraa
ia inu, tera râ, i teie nei, te
horo'a mai nei te peresideni
o te taiete i te hoê hapaina
uaina na'u.*

« Eita vau e inu. Eita vau e inu ». E ua ite atura vau i te peresideni i te toro-raa mai i te hapaina ia'u. Aita vau i ite e, eaha te ohipa e rave. Te hi'o noa mai ra to'u mau hoa piahi ia'u, ma te tia'i ia ite e, eaha ta'u ohipa e rave. Ua ataata atu vau i ni'a i te peresideni e parau atura ma te haehaa e, « Eiaha oe i inoino, eita vau e inu ».

Ua ite au e, ua inoino oia. Ua ui mai ra oia e, no te aha aita vau e inu. Na ô atura vau e, « E momoni au ».

Na ô mai ra oia e, « Aitâ vau i faaroo a'enei i te parau no taua haapa'oraa ra. Mai te huru ra e, te tahi huru maa te reira ». Ua ata te mau taata atoa.

Ua ataata atoa vau, eiaha no ta'na parau ha'uti, no te mea râ e, ua rave au i te ohipa ti'a.

Aita roa hoê taata i horo'a faahou mai i te inu na'u. Tera râ, ua vai noa te faaôôraa, na roto roa atoa mai i to'u iho mau hoa. Ua parau roa mai te tahi e, te haavare ra vau, e e mea fifi ia feruri e, aita te mau melo o te Ekalesia e inu. I taua taima ra to'u iteraa i te teimaha e fariihia e te mau melo o te Ekalesia.

I roto i taua taima ra a parahi ai au i ni'a i taua fenua ra, e rave rahi haapiiraa tei roaa ia'u, eiaha no te ite pae tino noa, no te pae varua atoa râ. Ua ite a'era vau e, eita te tahitohitoraa e faaea, tera râ, e tamau noa te Varua o te Fatu i te arata'i ia outou no te rave i te ohipa ti'a. ■

*Te ora nei te taata papa'i i Metro
Manila, Philipino.*





Na Elder
Adrián Ochoa
No te Hitu Ahuru

Hinaaro ia maitai a'é te tino e ia rahi a'é te ti'aturi i te pae tino e i te pae feruriraa? E riro te faaetaetaraa tamau i te tino ei tauturu.

Aita i maoro a'enei, ua tai'o vau i te tahi haapiiraa maitai roa no ni'a i te faaetaetaraa. Ua tai'o vau e, mai te mea e, e ti'a oi'oi outou i ni'a i te po'ipo'i, e oomo i to outou ahu faaetaetaraa tino, e e feruri e, « e oomo noa vau i teie, e haere i rapae no te hahaere, e mai te mea e, e mea maitai, e haamata ia vau i te horohoro rii », e roaa ia outou te hoê faaetaetaraa tino maitai roa hou a ite ai outou i te reira. Mai te mea e, e rave outou i te hoê faanahoraa ohie roa mai teie te huru, e nehenehe i te reira e tauturu ia outou ia haamau i te tahi mau peu faaetaetaraa tino maitai, e ia atuatu i to outou tino. No te mau taata e rave rahi, ua riro te haamataraa e te tamau-maite-raa ei na tuhaa paari roa. Mai te mea e, e haamana'o noa outou e, e haamaitai te faaetaetaraa tino eiaha i to outou noa tino, i to outou atoa râ varua e te feruriraa, e tauturu te reira ia outou ia faatupu i te hinaaro ia riro mai ei taata tino maitai atu. A faaetaeta noa ai outou i to outou tino, e riro mai outou ei taata ito rahi ma te mana'o ia'na ei taata puai e te ti'aturi e te i'ei'e e te paruru.

Te haamana'o nei au i te aamu o te hoê manu tei haamata i te hoo i to'na huruhuru no te to'e. E mea ohie roa ia roaa te maa na roto i taua rave'a ra, e ua mana'o te manu e, e mea rahi roa to'na huruhuru. A tamau noa ai oia i te hoo i to'na mau huruhuru, ua oaoa te

manu i te mea e, aita i titau-faahou-hia ia'na ia ti'a oi'oi i ni'a i te po'ipo'i no te haere e imi i te to'e. Ua nehenehe ta'na e parahi noa i roto i to'na ofaaraa i te mahana taatoa ma te faaha'uti ore i te hoê uaua. I te pae hopea râ, ua mâtau roa te manu i teie ohipa e ua ite a'era e, eita ta'na e nehenehe faahou e rere no te mea ua ere oia i to'na mau huruhuru faufaa.

E nehenehe i teie huru e tupu mai i ni'a i te mau huru taata atoa o te topa i roto i te herepata o te peu ino, te hupehupe, e aore râ, te faaohiparaa i te mau maa e faaairo mai ei tîti no te reira. I roto i te buka ra *No te Puai o te Feia Apï* te tai'o nei tatou e, na teie mau mea « e haamou i to outou tino, to outou feruriraa, to outou aehuehura, e to outou huru maitai i te pae varua. E faaino te reira i te mau auraa e te utuafare e te mau hoa, e e faaiti i to outou feruriraa no ni'a i to outou faufaa. E taoti'a te reira i to outou ite ia rave i te mau ma'itiraa no outou iho ». ¹ Ia faaetaeta tamau noa tatou i te tino e ia tamaa ma te au maite, e tauturu te reira ia tatou ia pato'i i teie mau peu ino. Ahiri te manu i tamau noa i te ma'urere e i te imi i te maa, eita roa ia oia e ere i to'na mau huruhuru. Oia atoa tatou, mai te mea e, « e ta'iri'iri tatou i to tatou pererau » e e faaetaeta tamau noa i te tino, e faatupu ia tatou i te aravihi no te pato'i i te mau peu o

te faaino e o te haafaufaa ore ia tatou.

Mai te mau taata e aro nei no te farii i te ora maitai o te tino, te aro nei te tahi atu pae no te farii i te ora maitai i te pae o te feruriraa. E nehenehe i te oraraa e fifi, e i te tahi taima e tupu mai i roto ia tatou te mau mana'o pe'a-pe'a, te oto, e aore râ, te ti'aturi ore ia tatou iho. Tera râ, a haamana'o e, no te ora maitai o te tino e o te feruriraa, na te faaetaetaraa tino e te ohipa-itoitoraa e tauturu ia tape'a noa i te hi'oraa atea maitai. Ia atuatu outou i to outou tino, e haamaitai atoa ia te reira i to outou feruriraa, e e tauturu ia outou ia haamana'o e, e tamarii outou na te Atua, e e nehenehe e roaa te ti'aturiraa e te oaoa. Ua nati-hoê-hia to tatou pae feruriraa, pae tino e te pae varua. Te haapii nei *No te Puai o te Feia Apï* e : « E mea faufaa atoa to outou ea i te pae o te [feruriraa] e e nehenehe te reira e haafifi i to outou huru i te pae varua e i te pae tino. I roto i te oraraa tahuti nei, e tupu mai te pe'a-pe'a e te oto. Tera râ, mai te mea e, e vai maoro te mau mana'o oto, te ti'aturi ore, te pe'a-pe'a, e aore râ, te ati, a paraparau i to outou na metua e i to outou episekopo e a ani i te tauturu ». ²

No te aha tatou e ite ai na piha'i iho ia tatou i te mau taata ito e te oaoa rahi atu? Te tumu rahi o te peu tamau ia. Mai te mea e, e hi'o tatou i to tatou tino i roto i te hi'oraa pae

varua ma te haro'aro'a e, « e hiero to outou tino, e horo'a no ô mai i te Atua ra », e here ia tatou ia'na e e faairo ia'na ei mea mo'a.³

No'u nei, te auraa no te parau ra, mo'a o te mâ ia, te faaamuhia, e te puai. Te hoê o te mau rave'a a te Metua i te Ao ra no te tauturu mai ia tatou ia tape'a mo'a noa i to tatou tino, o te horo'araa mai ia ia tatou i te Parau Paari. Te faataa ra *No te Puai o te Feia Apî* e : « Mai te mea e, e haapa'o outou i [te Parau Paari], e vai ti'amâ noa outou i te mau faatîrāa iino e e roaa ia outou i te faatere i to outou oraraa. E roaa ia outou te haamaitairaa o te tino maitai, te varua maramarama, e te arata'iraa a te Varua Maitai. E ineine outou no te tavini i te Fatu. Eiaha roa'tu e vaiiho ia Satane e aore râ, ia vetahi ê ia faahema ia outou ia feruri e, ia ofati outou i te Parau Paari e rahi a'e ia to outou oaoa, e rahi a'e ia to outou roo, e aore râ, e au-rahi-hia a'e outou.⁴ Mai te mea


e, e haapa'o outou i te Parau Paari, a haamana'o e, te atuatu ra ia outou i to outou tino e i to outou feruriaa, e na te reira e tauturu ia outou ia itehia « te paari e te mau tao'a rahi no te ite » (PH&PF 89:19).

Eiaha outou ia riro mai te hoê manu e hoo i te huruhuru, a oomo râ i to outou tiaa tu'aro e a faaitoito. A faaetaeta tamau noa i te tino. A tapa'o ia outou i roto i ta outou tu'aro au roa a'e e aore râ, a faahoa i te taata e nehe-nehe outou e horo na muri iho, e aore râ, e rave i te tahi atu mau huru ohipa faaoaoaraa. Mai te mea e, e rave outou i te mau ohipa no te tino, aita ia outou e faaetaeta noa ra i to outou tino, i to outou atoa râ varua. E haapuai atoa te faaetaetaraa tino i te ea i te pae o te feruriraa. A haamana'o e, te ohipa faufaa roa a'e, e ere ia to outou vitiviti e aore râ, to outou tino maona—to outou râ huru tamau maite. Mai te mea e, e faaetaeta tamau noa outou i te tino, eita outou e riro noa ei taata oaoa a'e, e riro atoa râ ei taata puai a'e, e te tino maitai a'e, e te feruriraa maramarama a'e. ■

TE MAU NOTA

1. *No te Puai o te Feia Apî* (buka iti, 2011), 26.
2. *No te Puai o te Feia Apî*, 27.
3. *No te Puai o te Feia Apî*, 25.
4. *No te Puai o te Feia Apî*, 25.

Eiaha e faairo ia outou mai te manu hupehupe tei hoo i to'na mau huruhuru.





A PEE I TO'NA taahiraa avae

E ohipa tātuhaa e o te oraraa taatoa te riroraa mai te Faaora ra te huru, e e nehenehe ta outou e haamata na roto i te raveraa i te mau taahiraa nā'ina'i i te mau mahana atoa.

Na Melissa Zenteno

Te mau ve'a a te Ekalesia

Te faaitoito mai nei te mau papa'iraa mo'a ia tatou ia riro mai ia Iesu Mesia te huru, e ia faaau i to tatou haerea « mai to'na atoa ra haerea e ti'a'i » (1 Ioane 2:6). Tera râ, e nehenehe i taua taahiraa matamua ra i te riro ei ohipa fifi—mai te mea ihoa râ e, aita outou i ite e, nahea i te haamata.

E ite outou i te tauturu i roto i te *Ia Poro Haere i Ta'u nei Evanelia: Te hoê arata'i no te ohipa misionare*. E mana'o paha outou e, e buka arata'i noa teie na te mau misionare rave tamau, tera râ, e tauihaa maitai roa o te tauturu ia outou ia haamata i ta outou opuaraa ia riro mai te Faaora te huru. Ua faataahia te pene 6 no te tauturu ia outou ia maramarama e ia faaohipa e iva huru taa ê o te Mesia.

Teie te tahi mau mana'o tauturu no ni'a i te faaohiparaa i te *Ia Poro Haere i Ta'u nei Evanelia* e i te mau papa'iraa mo'a, a imi ai outou i te rave'a no te faatupu i te mau huru o te Mesia :

- No te haamata, a haere i ni'a i te tuhaa ra, Ohiparaa no te taife, i te pae hopea o te pene 6 i roto i te *Ia Poro Haere i Ta'u nei Evanelia* (api 144). E nehenehe i teie ohiparaa e tauturu ia outou ia ma'iti eaha to outou mau huru puai pae varua i teie taima, e eaha te mau huru e ti'a ia outou ia haamaitai.

- Ia hope ana'e te ohiparaa, a ma'iti na roto i te pure, i te hoê huru o ta outou e tuatapapa atu. A tai'o i te tuhaa i roto i te pene 6 no ni'a i te reira huru.
- A haamau i te mau opuaraa papû e o te ti'a ia faitohia, o te tauturu ia outou ia faahotu i teie huru. A faataa i te hoê area taime no te faatupu i ta outou opuaraa. I muri iho, a hi'opo'a i to outou haereraa i mua. Ei hi'oraa, mai te mea e, te tamata ra outou ia faarahi atu i to outou huru aroha i te taata, e haamau ia outou i te hoê opuaraa no te faahiti i te mau parau maitai no ni'a i to outou taea'e e aore râ, to outou tuahine e toru a'e taime i te mahana hoê, no te roaraa hoê hepetoma. I te hopea o te hepetoma, e hi'opo'a outou eaha te ohipa ta outou i rave no te reira opuaraa, e a rave i te mau faatitiaifaroraa o te tauturu ia outou ia tamau noa i te haamaitai atu â.
- E itehia i roto i te *Ia Poro Haere i Ta'u nei Evanelia* te mau irava e tuatapapa no ni'a i te huru tata'i-tahi. E nehenehe ta outou e tuatapapa na roto i te pure, i te mau irava i tapurahia e a papa'i i te mau mana'o ta outou i farii a tai'o ai outou i te reira.

- A ani i te Metua i te Ao ra i te tauturu no te faahoturaa i te mau huru o te Mesia. A ani i te hoê tauturu taa ê mai teie te huru, « A horo'a mai oe i te puai ia haavî i to'u riri ia rave ana'e to'u mau taea'e i ta'u mau tauihaa ». Rahi atu te papû o ta outou mau pure, hau atoa'tu te ohie no outou ia ite i te pahonora a te Fatu.

E ohipa tatuhaa noa te riroraa mai to tatou Faaora ra te huru, o Iesu Mesia, e e ohipa no te oraraa taatoa. I te tahi taime mai te mea ra e, ua hau atu te fifi o te reira i te tuatapaparaa hohonu i te ihi puai (sciences physiques). Tera râ, eiaha e haaparuparu. Ua fafau mai te Fatu ia tatou e : « O oia o te farii i te maramarama, e e tamau noa hoi i ta te Atua ra, e farii mai â oia i te maramarama ; e e tupu te maramarama i te anaanaraa e tae noa'tu i te mahana mau ra » (PH&PF 50:24). Ia farii ana'e tatou, e ia tuatapapa ana'e, e ia faahipana ana'e i te maramarama e te parau mau ma te pee tamau noa i te Atua i te mau mahana atoa, e nehenehe ta tatou e papû e, e rahi atu to tatou riroraa mai to tatou Faaora ra te huru, o Iesu Mesia. ■



TE MAU OHIPA I TE MAU MAHANA ATOA

Ua riro te mau ohipa na'ina'i i te mau mahana atoa ei mau taahiraa i ni'a i te e'a no te riroraa mai to tatou Faaora te huru. A feruri i teie atu â mau ohipa no te tauturu ia outou ia faatupu i te mau huru o te Mesia :

- A tai'o i te mau irava i tapurahia i roto i te Arata'i faahoro tumu parau (Topical guide) e aore râ, i roto i te Arata'i faahoro papa'iraa mo'a (Guide des écritures) no ni'a i te huru ta outou e imi nei ia faatupu.
- A pure i te mau mahana atoa no te ani i te hinaaro ia tau i te puai no te haamaitai.
- A papa'i i te hoê buka aamu no te tapa'o i to outou haereraa i mua.
- A paraparau i to outou na metua. A faaite ia raua i ta outou mau opuaraa ia nehenehe ia raua ia tauturu mai ia outou.



A TOMO I ROTO I TE PARAPARAURAA



I roto i te ava'e atopa, e tuatapapa outou no ni'a i te huru no te riroraa mai te Mesia te huru (mai te mea e, ua farii ta outou paroisa e aore râ, ta outou amaa i te mau haapiiraa apî i roto i to outou reo). Ia hope ta outou tai'oraa i teie parau papa'i, a ma'iti na roto i te pure i te hoê huru o ta outou e faahipana i teie hepetoma e aore râ, i teie ava'e. E nehenehe ta outou e haamau i te hoê opuaraa e i muri iho, a hi'opo'a i to outou haereraa i mua. Ei hi'oraa, ua rahi atu anei to outou huru aroha i te taata e aore râ, to outou haapa'o e aore râ, to outou faaoromai ? E mea nahea ta outou opuaraa ia rahi atu to outou huru Mesia, i te tautururaa ia outou ia upooti'a i ni'a i te mau fifi ? A feruri ia faaite i to outou iteraa i te tahi atu feia apî e aore râ, i to outou utuafare.

« Eaha ta'ū e parau atu i te mau melo ore e ani mai nei e, no te aha aita te tahi o te mau melo o te Ekalesia e ora nei i ta tatou mau faatureraa ? »

E ohipa nehenehe roa ĩa ahiri e, e haapa'o hope roa te mau melo atoa o te Ekalesia i te evanelia. E ere te mau haamaitairaa rahi atu ana'e ta ratou e fana'o i roto i to ratou oraraa, e riro atoa rā ratou ei mau hi'oraa maitai no te mau taata e haati nei ia ratou. Tera rā, e taata tahuti tatou, no reira, e hape ihoa tatou i te tahi mau vahi. Te tumu rahi te tahi mau taata i hau ai i te haapa'o i te evanelia i te tahi atu mau taata no te mea ĩa e, ua taa ē to tatou huru faafariuraa e te puai o to tatou ĩteraa papū, to te tahi i to te tahi. E mea taa ē to tatou mau tamataraa i to te tahi, e e mea taa ē atoa te mau rave'a tauturu e te mau taata no te tauturu ia tatou.

Eita paha te melo ore e maramarama i te mau ta'o mai « faafariuraa » e « ĩteraa papū », tera rā, e ite maramarama e, ua nehenehe ta te taata tata'itahi e ma'iti nahea i to'na oraraa. E nehenehe ta outou e haamaramarama e, na te Metua i te Ao ra i faaoti ia riro mai te reira te huru. Ua horo'a mai oia ia tatou i to tatou ti'amāraa no te ma'itiraa ia nehenehe ia tatou ia tupu i te rahi i te pae varua na roto i te ma'itiraa i te maitai. Ua ite atoa rā te Metua i te Ao ra e, e te mau taata atoa—eiaha rā o Iesu Mesia—e hape e no reira Oia i horo'a mai ai i te hoē Faaora no tatou. Na roto i te Taraehara, e nehenehe ta tatou e tatarahapa, ia faaorehia te hapa, ia haapii no roto mai i ta tatou mau hape, e ia haere i mua i roto i te oraraa.

E nehenehe atoa ta outou e faaite e, aita tatou e haavā nei i te feia o te ore nei e pee i te mau ture a te Ekalesia. Te tamata nei rā tatou i te tauturu ia ratou, ia haro'aro'a ia ratou, e ia faaoromai i to ratou huru. Aita tatou e farii i te hara, tera rā, aita tatou e faahapa nei i te taata hara (a hi'o Ioane 8:11). Te vai noa nei te tatarahapa, no tatou paatoa.

Ma'imi i te papa'iraa mo'a



E itehia te pahonoraa i te uiraa i roto i te mau papa'iraa mo'a. Ia ore ana'e te taata e haapa'o i te mau faaueraa, eiaha tatou e haavā (a hi'o

Mataio 7:1). Te parau ra Roma 3:23 e, « Ua rave paatoa hoi i te hara, e ua ere i te haamaitai a te Atua ra ». Tera rā, e parau mau, e mea ti'a i te mau melo o te Ekalesia ia tamata ia riro ei feia haapa'o.

Madison M., 13 matahiti, Texas, te mau Hau Amui no Marite

Haapii no ni'a i te Taraehara



Ia parau ana'e te taata i te mau mea mai te reira te huru, aita vau e imi i te hapa i ni'a i te melo o te ore e pee nei i te mau ture, e faaohipa rā

vau i te reira no te haapii i te parau no te Taraehara. E parau vau e, e ere no te mea e, e momoni matou, ua riro ĩa matou ei feia maitai roa, e e parau vau e, te vai nei te Taraehara ia ti'a ia tatou ia tatarahapa i ta tatou mau hara e ia faatitiaifaro i te reira mau hape. Na teie huru parau e iriti i te opani no te tahi atu mau uiraa e rave rahi.

Jayde H., 16 matahiti, Oregon, te mau Hau Amui no Marite

Te haapii nei te Ekalesia ia tatou ia rave i te maitai



Mai te mau huru taata atoa, te faaruru nei te Ekalesia i te mau tamataraa e te mau faahemaraa. E paruparu to tatou paatoa, eiaha

rā no te reira e parau ai tatou e, e ere te Ekalesia i te parau mau. Na Iesu Mesia teie Ekalesia, o te tauturu nei i te taata ia ite i te evanelia mau e ia farii i te faateiteiraa. Te taata tino o te

haapa'ore nei i te mau faaueraa (a hi'o Mosia 3:19), e e ere ia i te hape no te Ekalesia. Te haapii nei te Ekalesia ia tatou ia rave i te ohipa maitai. Tera râ, e ti'a ia tatou paatoa ia ma'iti.

Lavinia S., 19 matahiti, Bulacan, Philipino

Ua faataahia te mau faatureraa no to tatou oaoa



Ia'u nei, ua tano maitai teie uiraa i te mea e, ua mâtau vau i te tahi mau taata tei rave i te ma'itiraa tei faaatea ê ia ratou i te evanelia. Ua horo'a mai te Fatu ia tatou i te mau faaueraa ia oaoa tatou e no te « faa-tupu i te tahuti ore e te ora mure ore o te taata nei » (Mose 1:39). Te hinaaro nei te Fatu ia ho'i tatou Ia'na ra ; tera râ, te hinaaro nei oia ia rave tatou i ta tatou iho mau ma'itiraa. No reira te tahi mau taata e ore ai e haapa'o i ta tatou mau ture. Te tauturu nei te mau ture ia'u iho no te mea ua ite au e, ua horo'a mai te Metua i te Ao ra i te reira ia'u nei ia ti'a ia'u ia ho'i e ia ora i piha'i iho Ia'na e ia oaoa. E tapa'o faaite te reira no To'na here ia'u.

Morgane D., 18 matahiti, Languedoc-Roussillon, Farani

Haapa'o i ta tatou mau faatureraa



Mai te au i te tahi atu püpü e aore râ, haapa'oraa, te vai ra te tahi mau taata tei riro ei mau taata haapa'o a'e e aore râ, haapa'o ore a'e. Ta tatou noa, o te haapa'oraa ia i ta tatou mau ture, i te faito maitai roa e maraa ia tatou, e ia ti'aturi e ia pure e, e na reira atoa te tahi atu mau taata.

Maren S., 16 matahiti, Arizona, te mau Hau Amui no Marite

Ia riro ei hi'oraa maitai



E mea faufaa teie Ekalesia no te tauturu ia tatou ia haapa'o i te mau faaueraa a to tatou Metua i te Ao ra, e ia ora faahou i piha'i iho Ia'na. Tera râ, eiaha no te mea e, tei roto te hoê taata i te Ekalesia e riro noa ia oia ei taata maitai. A hi'o na i to tatou ao i teie mahana, ua î i te ino e i te mau ohipa viivii, noa'tu e, ua î te ao nei i te taata tei faaoti e pee ia Iesu Mesia i roto i te oraraa hou te oraraa tahuti nei. Te mana'o nei au e, te ohipa maitai roa a'e o te ti'a ia tatou ia rave o te faaiteraa ia i te hi'oraa maitai i to tatou mau hoa.

Kaden S., 15 matahiti, Utah, te mau Hau Amui no Marite

A pure no ratou e a hahaere ia ratou

Te mau melo e ore e haapa'o nei i ta tatou mau faatureraa, aita ia to ratou iteraa papû i faatumuhia i ni'a ia Iesu Mesia. E pure tatou no ratou, ia ti'a ia ratou ia imi i te arata'iraa a te Varua, e ia ti'a ia ratou ia farii i to ratou iho iteraa papû. E haere tatou e farerei i teie mau taata e e tauturu ia ratou ia haere mai i te Mesia.

Andrea C., 13 matahiti, Lima, Peru



HI'O IA VETAHI Ê EI TAATA TA RATOU E NEHENEHE E RIRO MAI

« Tei ia tatou ra te hopoi'a ia hi'o i te taata eiaha mai ta'na e faaite ra, ei taata râ ta'na e nehenehe e riro mai. Te taparu nei au ia outou ia feruri ia ratou mai teie te huru ».

Peresideni Thomas S. Monson, « Hi'o ia vetahi ê ei taata ta ratou e nehenehe e riro mai », Liahona, Novema 2012, 70.

TE UIRAA NO MURI MAI

« Te tamata nei au ia haavî i to'u mau feruriraa, tera râ, ua rahi roa te mau faahemaraa. Nahea e roaa ai ia'u te mau feruriraa mâ a'e ? »

Na mua i te 15 no novema, a hapono i ta outou mau pahonora, e, mai te mea e, e hinaaro outou, hoê hoho'a maitai roa liahona@ldschurch.org e aore râ, na roto i te rata uira i ni'a i te vahî i ni'a i te api 3.

Teie te haamaramaramaraa e te parau faati'a e titauhia i roto i ta outou rata uira e aore râ ta outou rata : (1) te taatoaraa o te i'oa, (2) te tai'o mahana fanauraa, (3) te paroita e aore râ te amaa, (4) te titi e aore râ te mataeinaa, (5) ta outou parau faati'a papa'ihia, e mai te mea e, tei raro mai to outou matahiti i te 18, te parau faati'a papa'ihia e to outou metua (faati'ahia te rata uira) no te haaparare i ta outou pahonora e te hoho'a.



**Na Elder
C. Scott Grow**
No te Hitu Ahuru

Te tautururaa ia outou ia tatarahapa, o te hoê ia tuhaa taa ê roa o te piiraa o te hoê episokopo. Na te mana'ô o to outou aa'u e parau mai ia outou e, eaha te taima e titauhia ia outou ia paraparau ia'na.



NO TE AHA, E EAHA TE MEA I TITAUHIA IA'U IA **FA'I** I MUA I TO'U EPISEKOPO ?

E uiui paha outou e, no te aha i haapihia ai ia outou ia fa'i i mua i to outou episkopo e aore râ, te peresideni amaa ia rave ana'e outou i te hara rahi. E parau paha outou ia outou iho e, « E ere anei te tatarahapa i te hoê ohipa i rotopu noa ia'u e te Fatu ? Mai te mea e, ua faaea vau i te rave i ta'u ohipa hape e ua fa'i i te reira i mua i te Atua, no te aha i titauhia ai ia'u ia paraparau i to'u episekopo ? »

E no te aha te episekopo, e e ere i te tahi atu taata ?

E rave rahi feia apî e mea au a'e na ratou e fa'i i ta ratou mau hapa i to ratou na metua e aore râ, i te feia faatere no te feia apî. Noa'itu e, e nehenehe i to outou na metua e to outou feia faatere e horo'a mai i te patururaa e te a'oraa e titauhia, ua parau mai te Fatu e, ua riro te episeko ei haavâ i roto ia Iseraela (a hi'o PH&PF 107:72, 74). Tei ia'na te hopoi'a no te faaoti i te ti'amâraa o te mau melo o ta'na paroisa. Na roto i te faatoro'araa e te oraraa parauti'a, ua haamanahia te episekopo no te farii i te heheuraa no ô mai i te Varua Maitai ra no ni'a i te mau melo o ta'na paroisa, tae roa'itu ia oe.

E nehenehe i te episekopo e tauturu ia oe na roto i te tatarahapa na roto i te mau rave'a e ore e ti'a i to outou na metua e te tahi atu mau feia faatere ia horo'a. Mai te mea e, e hara rahi, e faaoti oia e, ia faaitihia to outou mau ti'araa i roto i te Ekalesia. Ei hi'oraa, i roto i ta outou tatarahaparaa, e ani mai paha oia ia outou ia faaea i te amu i te oro'a mo'a, e aore râ, ia faaea i te faaohipa i te autahu'araa no te hoê tau. E rave oia i te ohipa i piha'i iho ia outou e e faaoti e, eaha te taima e ti'amâ faahou ai outou no te farii i taua mau ohipa mo'a ra.

E a'o mai to outou episekopo ia outou no ni'a i te ohipa e rave no te haapaari i to outou ti'araa ia pato'i i te faahemaraa. E faaitoito oia ia outou ia tai'o i te mau parau tumu, mai te tatarahapa, e i muri iho, a faaite ia'na i te mau mea ta outou i apo mai. E ani paha oia ia outou ia farerei ia'na i te mau hepetoma atoa no te faaite i to outou huru i roto i te iritiraa mai ia outou i rapae i te mau ti'araa faahema.

Eaha te taima e titauhia ia'u ia paraparau ia'na ?

E feruri paha outou e, « Ua tano ihoa te reira, tera râ, nahea vau e ite

ai e, te ohipa ta'u i rave e mea fifi roa ia i titauhia ai ia'u ia paraparau i te episekopo? » Pahono poto noa : « Na te mana'o o to outou aau e parau mai ia outou ». Ia ite ana'e outou i te tara o te mana'o o te aau, a rave i taua taime iho ra (a hi'o Alama 34:31-34).

No ni'a i te tatarahapa, ua haapii mai te Arii Beniamina e, « Aita e ti'a ia'u ia faaite atu i te mau mea e hope roa'e e hapa'i outou ; ua rau te huru o te e'a e te rave'a, e tae atu hoi i te rahi e ore ia e ti'a ia'u ia tai'o » (Mosia 4:29). No reira eita vau e horo'a'tu i te hoê tapura o te mau ohipa o ta outou e fa'i i mua i to outou episekopo, e faaite atu râ vau i te tahi mau parau tumu o te tauturu ia outou ia rave i taua faaotiraa ra.

Eaha te mea e ti'a ia'u ia fa'i ?

Ua ite au e, ua tamata outou ia haapa'o, tera râ, penei a'e ua rave paha outou i te tahi mau hape—e e mau hape rahi paha. Te rahiraa o te mau hape ta te taata e rave, e nehenehe e faatitiaifarohia na roto i te pure o te taata iho e na roto i te tatarahapa aau tae mau. Te tahi râ mau hape, te mau hape ihoa râ no te pae morare, e titauhia ia ia fa'i i mua i te episekopo hou a ti'a ai ia outou ia farii i te faaoreraa hapa a te Fatu.

Ia feruri ana'e outou i te mau hape ta outou i rave, e tupu mai paha to outou mana'o faahapa, e vai papû ore paha outou, eita paha e oaoa, e aore râ, e oto roa paha outou. Mai te mea e, te tupu nei te reira huru mana'o i roto ia outou, e tano paha ia outou ia paraparau i to outou episekopo no ni'a i te reira mau hape.

Eiaha e tamata i te faaore i te hapa outou iho e aore râ, e faatumu i to outou hapa i ni'a i te mana'o. E feruri paha outou e, « E mea haamâ roa ia faaite i te episekopo i te ohipa ta'u i rave. Te feruri nei oia e, e taata maitai

a'e au i tera. E maere roa oia mai te mea e, e faaite au ia'na i te ohipa ta'u i rave. Eita oia e au faahou mai ia'u ».

Te fafau atu nei au ia outou e, eita oia e faahapa ia outou. Ei tavini no te Fatu, e faaite mai oia i te maitai e te haro'aro'a a faaroo ai oia ia outou. E i muri iho, e tauturu oia ia outou na roto i te faanahora o te tatarahapa. Oia te ve'a o te aroha o te Fatu no te tauturu ia outou ia riro ei taata mât na roto i te Taraehara o Iesu Mesia.

Ua parau te Fatu « Inaha, o oia o tei tatarahapa i ta'na ra mau hara, ua faaorehia ia te reira, e e ore hoi au, o te Fatu e haamana'o faahou â i te reira.

« Na roto i teie nei mea e ite ai outou e mai te mea ua tatarahapa te taata i ta'na ra mau hara—inaha, e fa'i mai oia i te reira e e haapae ê roa'tu ho'i » (PH&PF 58:42-43).

Ia fa'i e ia faaru'e ana'e outou i ta outou mau hara, e faaore te Fatu i ta outou hapa. Eita e titauhia ia outou ia tia'tu i mua Ia'na no te reira mau hara ia tae ana'e mai te taime e haavâhia ai outou.

E ahiri e, aita vau i fa'i ?

I te tahi taime e faaea te hoê taata i te rave i te ohipa ti'a ore, eita râ oia e fa'i, noa'tu ua titauhia, i mua i to'na episekopo. E no reira, e tamau noa te reira taata i te amo i te hopoi'a o te hara o'na ana'e iho, aita oia e vaiiho i te Faaora ia rave ê i te reira hopoi'a.

Teie te hoê hi'oraa. Hoê pô, tau matahiti i ma'iri a'enei, te uiui ra vau i te tahi mau taata paari no te faaapî i ta ratou parau faati'a no te hiero. Ua tomo mai ra te hoê vahine paari rii noa no ta'na uiuiraa. Ua faaiipoiphia oia i roto i te hiero, e e mea haapa'o roa oia i roto i te Ekalesia i roto i to'na orarara taatoa.

Ua ite a'era vau i te hoê oto i roto i to'na varua. A haere noa ai te uiuiraa

i mua, ua puta mai ra i roto ia'u te hoê mana'o o te varua. Na ô atura vau ia'na e, « E te tuahine, te mana'o nei au e, ua rave oe i te hoê hape rahi roa i to oe taure'are'araa ra, o ta oe i ore i fa'i i mua i te hoê ti'a faatere o te autahu'araa. Ua hinaaro anei oe e faaite mai i te reira ia'u ? »

Ua haamata a'era oia i te ta'i. Ua parau mai ra oia ia'u e, e parau mau te reira, tera râ, ua tupu tamau noa te haamâ i roto ia'na no te fa'i i te reira i mua i te hoê episekopo. A fa'i ai oia i te ohipa ta'na i rave, ua faaite oia i te mau haamaramaramaraa i mua ia'u ia ti'a ia'u ia faataa i to'na ti'amâraa.

Ua riro te fa'iraa o ta'na hara i mua i te hoê ti'a faatere o te autahu'araa ei hopearaa no to'na tatarahaparaa, eiaha râ ei haamataraa. Ua amo faufaa ore noa oia i te hopoi'a e te oto no taua hara ra hau atu i te 30 matahiti.

No te mea ho'i e, ua faaoti oia i te taahiraa hopea o te tatarahaparaa, ua tumâhia ta'na hapa. Ua farerei au ia'na i tera e tera taime i muri a'e i te pô o taua uiuiraa ra. Ua maramarama to'na hoho'a mata, e e mea oaoa oia.

Te hinaaro nei au ia ite outou e, aita vau e haamana'o nei i to'na i'oa. E nehenehe i te Fatu e iriti i te reira mau haamana'oraa i te feruriraa o te mau episekopo. Te mea ta'u e haamana'o ra, maori râ, na roto i to'na fa'iraa i mua i to'na ti'a autahu'araa, ua hau te hoê vahine paari rii noa i te mau mana'o hapa ta'na i amo noa e rave rahi matahiti.

Eiaha e rave i te reira hape. Mai te mea e, te fifi ra to outou mana'o, aita râ outou i papû e, e titauhia anei ia outou ia fa'i i mua i to outou episekopo, a haere a hi'o ia'na. A vaiiho ia'na ia tauturu ia outou. Eiaha e amo faufaa ore noa i te hoê hopoi'a i roto i to outou orarara taatoa, o te faaoto roa ia outou. Na roto i ta outou fa'iraa



i mua i te episekopo e ta outou tatarahapa, e iriti te Fatu i te reira hopoi'a i ni'a i to outou varua (a hi'o Isaia 1:18).

No te aha i titauhia ai ia'u ia tatarahapa ?

Ua aufau Iesu Mesia i te hoo o te mau hara a te mau taata atoa na roto i To'na tusia taraehara. Te ani manihini mai nei Oia ia outou ia tatarahapa no te ape i te tahi atu oto e te mamae. « A tatarahapa oi... rahi â to oe mau mamae ra—te rahiraa o te reira mamae aore roa i itea ia oe, te huru mau o te reira mamae aore roa ho'i i itea ia oe.

« No te mea, inaha, ua faaoromai au, o te Atua, i teie nei mau mea no te taato'araa, ia ore ratou ia roohia i te mamae mai te mea e e tatarahapa ratou ;

« Tera râ mai te mea e aita ratou e tatarahapa ia roohia ratou i te mamae rahi e ti'a'i ia au i ta'u i faaoromai ra...

« No reira, te faaue faahou atu nei au ia oe ia tatarahapa,... e ia fa'i mai hoi oe i ta oe ra mau hara, oi roohia'tu

ai oe i teie nei mau utu'a o tei parauhia e au nei » (PH&PF 19:15–17, 20).

Te faaite papû nei au e, na roto i To'na mauui, ua aufau a'ena Iesu Mesia i te hoo o ta outou mau hara. E nehenehe e faaorehia ta outou hapa mai te mea e, e tatarahapa outou. Eiaha e tamata i te aufau i te hoo no ta outou mau hara. Aita e faito no to outou iho mamae e faaora ia outou ; na roto ana'e i te Taraehara e farii ai outou i te faaoreraa o ta outou hapa.

E mata na outou i te faaite i te faaroo i roto ia Iesu Mesia e i To'na Taraehara. Te faaite papû nei au i te i'oa o Iesu Mesia e, na roto i te tatarahapa, e tae noa'tu i te fa'iraa i mua i to outou episekopo, mai te mea e, e titauhia, e riro mai outou ei taata mâ. Taa ê noa'tu i te reira, na roto i te aroha o te Faaora—To'na mana faati'a—e haapuiahia outou i roto i to outou ti'araa no te pato'i i te faahe-maraa a muri a'e. E na roto i te reira, e roaa te hau i roto i to outou varua e te oaoa i roto i teie oraraa, e e farii outou i te ora mure ore i roto i te ao e tae mai. ■



TO TATOU TAOTE RAHI

« E mea pinepine te Faaora i te faaauhia i te hoê Taote Rahi ... Ua riro te hirahira no to tatou varua, mai

te mauui no to tatou tino—ei faaararaa i te fifi e ei paruru i te tahi atu mau ati. Mai roto mai i te Taraehara a te Faaora, e tahe mai te raau tamärû o te nehenehe e faaora i to tatou mau puta i te pae varua e e iriti i te hirahira. Teie noa râ, na roto ana'e i te mau parau tumu o te faaroo i te Fatu ia Iesu Mesia, te tatarahapa e te haapa'o tamau maite e faufaahia ai teie raau. Ta te tatarahapa mau e faatupu mai o te hau ia i te aau, te tamahanahana, e te ora e te faaapiraa i te pae varua.

« To outou episekopo e aore râ, te peresideni amaa te tauturu o te taote pae varua tei haamanahia no te tauturu ia outou ia tatarahapa e ia ora ».

Elder David A. Bednar no te Püpü no te Tino Ahuru Ma Piti Aposetolo, « Te ti'aturi nei matou e, e mea ti'a i te taata ia ora ma te viivii-ore », *Liahona*, Me 2013, 44.



Na Elder O. Vincent Haleck
No te Hitu Ahuru

Ani manihini i te Faaora ia tomo mai

« Inaha, te ti'a noa nei au i te uputa, te patoto atu nei : ia faaroo mai te hoê taata i ta'u reo, e ua iriti i te opani ra, e haere atu vau i roto ia'na ra » (Apokalupo 3:20).

I to'u tau tamariira, i te pu'e tau Noela, e faatautau to'u metua vahine i te hoê hoho'a o te Faaora te patoto ra i ni'a i te uputa. Aita â matou i riro atura ei melo no te Ekalesia, e ua ani tamau noa vau, « No te aha Iesu e patoto ai i ni'a i te uputa ? O vai to te tahi pae mai ? »

Tau matahiti i muri mai ua ite a'era vau e, aita e tape'araa to te pae rapae o te opani ta te Faaora e patoto nei. Titauhia i te taata i roto mai ia iriti mai i te uputa. I teie nei ua ite au e, o vai to te tahi pae mai i te opani. O tatou ia ! Te patoto nei te Faaora, e ua titauhia ia tatou paatoa ia iriti i te opani e ia ani manihini Ia'na ia tomo mai i roto i to tatou oraraa.

I to'u apîraa, ua faaoti a'era vau ia ani manihini i te Faaora ia tomo mai i roto i to'u oraraa na roto i te baptizoraa ia'u e te riroraa ei melo no te Ekalesia. Ua riro to'u mau hoa ei mau hi'oraa

maitai no'u. Oia atoa to'u mama ruau. E rave ohipa hiero oia i roto i te hiero no Los Angeles California. E faaru'e mai oia i te fare i te hora 4:00 i te aahiata no te tavini i te Fatu i roto i te hiero.

E piti matahiti i muri iho i to'u baptizoraa, ua faaoti a'era vau e tavini i te Fatu ei misionare rave tamau. I roto i ta'u misioni, ua tauturu vau e rave rahi taata ia haapii mai no ni'a i te Faaora ia ti'a ia ratou ia ani manihini Ia'na ia haere mai i roto i to ratou oraraa.

I muri mai, ua tavini au ei peresideni misioni i Samoa. Ua ani tamau noa vau i te mau misionare apî eaha te taimi e faaoti ai ratou ia rave i te hoê misioni. E rave rahi tei parau mai e, tei roto ratou i te Paraimere a rave ai ratou i te faaotiraa ia tavini !

E tauturu te Paraimere ia outou ia faaineine no te ohipa misionare. A haapii mai i te rahiraa e ti'a ia outou ia apo mai. A haamau i te hoê opua-raa no te tavini i te hoê misioni. Ei reira e ti'a atoa ai ia outou ia tauturu i te taata ia ani manihini i te Faaora ia tomo i roto i to ratou oraraa. Te riroraa ei misionare, na te reira e tau i to outou oraraa—ua tau i te reira i to'u. ■



Diakono

*E hopoi'a rahi te opereraa i te oro'a mo'a.
E mai te mea e hape oia ?*

Na Jane McBride Choate

No roto mai i te hoê aamu mau

*« E teie atoa o ratou atoa o te farii
i teie autahu'araa nei, e farii atoa
mai ia ia'u, te na reira maira te
Fatu » (PHPF 84:35).*

Ua ti'a o Benji i mua i te hi'o,
ma te faaafaro i to'na taamu
arapoa. E mea tano maitai
to'na ahu uouo e to'na piripou avae
roa ninamu ereere. Ua paherehia
to'na rouru. Ua ineine maitai oia no
te faatoro'ahia ei diakono. No reira
no te aha oia i mäta'u ai ?

Ua rave mai ra o Benji i ta'na mau
papa'iraa mo'a e ua haere mai ra i
rapae i te piha. Ua tamata oia eiaha
e feruri i te huru taa ê o te mau
ohipa i te fare pure i teie mahana.
E te vai ra taua ohipa apî ra ta'na i
mana'ona'o noa i te mau taima atoa
a feruri ai oia i te reira : te opereraa
i te oro'a mo'a. E mai te mea noa'tu
e, e hape oia i te taima matamua
i teie hepetoma i muri nei ? Ua
tamata atoa oia i te haamo'e i te
reira a faaru'e atu ai oia i te fare.

Ua tere te pureraa oro'a mai
tei matarohia. Tera râ, i muri mai,
ua haere o Benji e to'na utuafare
i roto i te piha ohiparaa a te epise-
kopo Salazar. E mea taa ê mau ia
teie. Ua matau oia e, i teie taima,
tei roto ia oia i te Paraimere no te
haamataraa.

Ua parahi o Benji i raro e ua tuu



apî roa



« Mai te mea e, e faateitei outou, te mau... diakono, i ta outou toro'a, e riro ia outou ei mauhaa i roto i te rima o te Atua i teie nei, no te mea, te autahu'araa i roto i te hoê tamaiti, ua aifaito noa ia to'na mana i to te autahu'araa i roto i te taata paari mai te mea e, e faaohipahia te reira ma te parau-ti'a ».

Elder Tad R. Callister no te Hitu Ahuru, « Te mana o te autahu'araa i roto i te hoê tamaiti », *Liahona*, Me 2013, 54.

« A haamana'o », ua na reira o papa i roto i te haamaitairaa, « ua farii oe i te autahu'araa na roto i e hoê oro'a mo'a. Ua horo'a mai te Metua i te Ao ra ia tatou i te autahu'araa ia ti'a ia tatou ia tavini ia vetahi ê. Mai te mea e, e nehenehe ta outou e rave i te reira ma to aau atoa, e haamaitaihia oe i roto i te reira mea e i roto i te mau mea atoa ».

Ua pure o Benji i te hepetoma ta-atoa no te ani i te tauturu. I te Sabati i muri iho, ua amui atu oia i te mau diakono i mua i te fare pureraa. Ua faaroo maitai oia a faahiti ai o Jay i te haamaitairaa o te faraoa.

I taua taime iho ra, ua tupu faahou te mana'o pe'ape'a i roto ia'na. E nehenehe mau anei ta'na e rave i teie ohipa? E mea faufaa roa ho'i! Ua haamana'o a'era oia i te mau fafauaraa i roto i te haamaitairaa a papa. Ua ore a'era to'na mau mana'o pe'ape'a a parahi ai te Varua i ni'a iho ia'na.

Ua rave mai ra oia i te farii pane e ua haere atura ma te papû i ni'a i te mau ana'iraa parahiraa i faataahia na'na. Ua faatoro mârû atura oia i te farii i te hoê vahine i ni'a i te ana'iraa parahiraa matamua.

Ua ataata mai ra oia i ni'a ia'na. Ua ataata atura o Benji, ma te ite e, te tavini ra oia i te Fatu. ■

o papa, te episekopo, te peresideni o te feia apî tamaroa e na tauturu o te episekoporaa i to ratou rima i ni'a i to'na upoo. Na papa i horo'a ia'na i te Autahu'araa a Aarona. I te taime no te haamaitairaa, ua ore te maenuenu i roto i te opu o Benji. Ua ite oia i te hau e te oaoa.

Ua ti'a o Benji e ua aroha rima i te taata tata'itahi. E i muri iho, ua apa oia ia mama e i to'na taea'e, o Jay, e i to'na tuahine na'ina'i o Mirasol.

I muri a'e, ua haere oia i te Haapiiraa Sabati. Noa'tu e, e ere te mau piha haapiiraa apî hoê â e ta te Paraimere, aita ia i huru ê roa'tu. Te haapiiraa no ni'a ia i te pure. Ua faroo oia e rave rahi haapiiraa no ni'a i te pure na mua a'enei i roto i te Paraimere. Nehe-nehe atura ta Benji e huti mârû i te aho. Peneia'e e ere i te ohipa teimaha te rirora ei diakono.

« E mea au roa », te na reira ra o Jay i ni'a ia Benji i muri a'e i te pure-raa. « Na'u e haamaitai i te oro'a, e e nehenehe ta oe e opere ».

Ua ore a'era te maenuenu. « E, e mea au roa », ta'na ia i parau mârû noa. Te opereraa i te oro'a mo'a te ohipa i haape'ape'a rahi roa ia Benji!

I muri a'e i taua pô ra, ua ite atu o Benji ia papa te tai'o noa ra i ni'a i te parahiraa mârû. « Nahea mai te mea

e, e mo'ehia ia'u te hoê taata e aita ratou i farii i te oro'a mo'a? » ta'na ia uiraa. « Nahea mai te mea e, e hape te avae? » Ua ite roa oia i roto i to'na feruriraa, ua marua te faarii i ni'a i te tahua, e ua pee te mau hapaina pape na te mau vahi atoa.

Ua uumi o papa i te taponono o Benji. « Te haamana'o nei au i te taime matamua a opere ai au i te oro'a mo'a. E mea ri'ari'a a'e paha vau ia oe i teie taime ».

Ua ama te mata o Benji i te hitimahuta. « O oe? Aita hoê mea ta oe e ri'ari'a! »

Ua ata o papa. « E rave rahi taime to'u ri'ari'araa. Ua ite anei oe e, eaha te mea i tauturu ia'u ia ore te ri'ari'a? »

Ua feruri rii o Benji maa taime iti. « Te pure? »

Ua ataata o papa. Ua ti'a te reira. Te pure E ua horo'a mai to'u metua tane i te hoê haamaitairaa ia'u. Hinaaro anei oe ia horo'a vau i te hoê haamaitairaa ia oe? »

Ua tairiiri Benji i te upoo. « E! Hinaaro roa vau i te reira ».

Ua putuputu a'era te utuafare i roto i te piha faafaearaa. Ua tuu a'era o papa i to'na na rima i ni'a i te upoo o Benji. A paraparau ai o papa, ua ite a'era o Benji e, te haamata ra te roimata i te tahe mai.

Te tia'iraa i Winter Quarters

Winter
Quarters

TE PURUMU NO IOWA

IOWA

Navu

Na Jennifer Maddy

Hoê oire apî

I muri a'e i te taparahi-pohe-raa-hia te peropheta Iosepha Semita, ua riro mai Navu Illinois ei vahi fifi roa. Ua faaru'e te Feia Mo'a i to ratou mau fare no te imi i te hoê vahi hau a'e no te ora. I te ava'e fepuare 1846, ua haamata te pûpû matamua o te Feia Mo'a i to ratou tere i te pae tooa o te râ, tera râ, ua taere to ratou tere no te ino o te reva e no te ma'i. I te taima a tere ai ratou na Iowa, ua taere roa i taua matahiti ra no te haere na ni'a i te Mou'a no Rocky Mountains hou a tae mai ai te pu'e tau to'eto'e.

No reira, ua ma'iti te feia faatere o te Ekalesia i te hoê vahi i reira te Feia Mo'a e noho ai no te pu'e tau to'eto'e. Ua pii ratou i taua vahi ra, o Winter Quarters.

Te hoho'a i vauvauhia i roto i te pû Mormon Trail Center i Winter Quarters, te faaite ra ia i te hoê puhaparaa i ni'a i te purumu no Iowa i reira to William Clayton papa'iraa i te himene ra « Haere mai, e te Feia Mo'a » (Te mau himene, no. 18).





Te ohipa-amui-raa

Ua hamani te tahi mau taata i to ratou fare i te raau e aore râ, i te aihere. Te tahi pae ua ora noa ratou i roto i te fare ie e te ana. Ua tamata te Feia Mo'a ia oaoa i roto i te pu'e tau to'eto'e roa. Ua tauturu te tahi i te tahi. Ua haere ratou i te mau aru'i himeneraa e ua himene e ua ori. Ua hamani ratou i te hoê hamaniraa faraoa, hoê fare oire, e hoê fare hamaniraa panie.

Te tere-faahou-raa

E taima fifi roa te taima a ora ai te Feia Mo'a i Winter Quarters. E rave rahi taata tei pohe. Tera râ, ua ti'aturi te mau pionie e, e haamaitai te Fatu ia ratou e e tauturu ia ratou ia tapae i Ziona. Ia tae mai ra te pu'e tau faatupuraa raau, ua faaru'e te pūpū pionie matamua i Winter Quarters no te tere atu i te afaa no Roto Miti. I teie mahana, e nehenehe ta

outou e ite i te hiero nehenehe no Winter Quarters Nebraska, e ia mata'ita'i i te pū Mormon Trail Center i Winter Quarters no te haapii mai â no ni'a i te mau pionie. ■



I roto i te pū Mormon Trail Center, e nehenehe ta outou e ite i te mau huru tauihaa ta te Feia Mo'a i ta'ita'i i roto i to ratou tere. Ua parau te feia faatere o te Ekalesia ia ratou ia rave i te faraoa ota, te mau faanoanoa maa, te raiti, te pīpī e te mau puatoro ū.



Ua hamani te tahi Feia Mo'a i te mau fare raau i roto ratou e ora ai a parahi ai ratou i Winter Quarters.

Ua tape'a te feia mo'a i Winter Quarters

Na Arie Van De Graaff

Ua noho te mau pionie i Winter Quarter no te hoê taima no te tia'i ia hope te pu'e tau to'eto'e hou a tere faahou ai i to ratou tere i te pae tooa o te raa. A hi'o e, e nehenehe anei ta outou e ite i te mau tao'a hunahia i roto i teie hoho'a.




 Penitara

 Tapu pai

 Faarii

 Taipu


 Raau parai

 Buka

 Taviri


 Au'a na'ina'i

 Taamu

 Te raau (quille)
no te 'bowling'

 Maa taroti

 Monamona
oteote

 Nira

 Uati

 Pea

ITE TAA Ê




Na Elder D. Todd Christofferson

No te Pūpū no te Tino Ahuru ma Piti Aposetolo

E mau ite taa ê no Iesu Mesia te mau melo no te Pūpū no te Tino Ahuru Ma Piti Aposetolo.

Nahea Iesu Mesia ia paraparau i te peropheta ?



E nehenehe Ta'na e tono mai i te hoê ve'a e aore râ, e fâ mai i roto i To'na iho huru mau.



E nehenehe Ta'na e paraparau mai na roto i To'na iho reo e aore râ, na roto i te reo o te Varua Maitai.



E nehenehe Ta'na e paraparau mai i To'na mau tavini tata'itahi, e aore râ, e nehenehe Ta'na e paraparau amui mai ia ratou a putuputu ai ratou.



No roto mai i « Te haapiiraa tumu a te Mesia », *Liahona*, Me 2012, 86–90.

IA AU ITE OHURAA O TE HORA : TE ORAMA MAIAMAIA, NA JOHN SCOTT © IRI ; TE FARI NEI JOSEPHA SEMITA / TE MAU PAPA PARAU, NA KENNETH RILEY © IRI ; HOHO'A NA DAVID WILLIAM NEWMAN © IRI ; HOHO'A NA BUSATH PHOTOGRAPHY ; TE PURE NEI ENOSA, NA ROBERT T. BARRETT © IRI

Nahea e ti'a
ai ia Emma ia faaite
i te huru maitai, i te
mea e, e mea ino
roa o Violette ?

Tauturu

Na Charlotte Mae Sheppard

No roto mai i te hoê aamu mau

« E aroha'tu oe i to taata tupu mai to aroha ia oe iho na » (Mareko 12:31).

Ua huti haapaari faahou o Emma i ta'na pute tua a tomo ai oia i roto i ta'na piha haapiiraa apî. Te mahana matamua teie o te haapiiraa. Ua oomo oia i te ahua au-roa-hia e a'na, e ua faaineine to'na mama i te hoê maa rii monamona no ta'na tamaaraa—e faraoa monamona.

Ua feruri o Emma e, « E riro teie mahana ei mahana maitai roa ».

« Mai te mea e—»

Ua faaea ihora o Emma e ua hi'o a'era i roto i te piha haapiiraa. Tei ô nei atoa oia. O Violette.

I te matahiti i ma'iri a'enei, ua popore noa o Violette i te mau auri ha'uti faatarere i te mau taime faafaearaa atoa o te haapiiraa. Ua pii oia ia Emma i te tahi i'oa. Ua eiâ atoa oia i te hoa rahi o Emma !

Ua ite atu o Violette ia Emma e ua faatoro i te arero i ni'a ia'na. Ua hi'o mata a'era o Emma e ua tape'a paari faahou i ta'na pute. Aita o Violette i riro ei hoa maitai i roto i te roaraa o te matahiti i ma'iri na, e mai te mea ra e, eita teie matahiti e huru ê atu.

« Manava i te piha haapiiraa apî no teie matahiti ! » Te parau ia a Caldwell vahine i mua mai i te piha. « E faataa tatou i te mau parahiraa ».

Ua faanaho-pitipiti-hia te mau amuraa maa i roto i te piha haapiiraa. Ua faatoro Miss Caldwell i to'na rima i ni'a i te tapura i'oa ; e ua faatoro atura i ni'a i na amuraa maa

i muri. « Emma. E parahi oe i muri ».

Ua parahi o Emma i ni'a i te hoê o na amuraa maa i muri. Ua ti'aturi oia e, e parahi o Liselle i piha'i iho ia'na. E aore râ, o Jaime. e aore râ—

« Violette ».

Ua ti'a ta'ue mai ra te upoo o Emma. Ua faaroo maitai anei oia ?

E. Te faatoro noa ra â o Caldwell vahine i to'na rima i ni'a i amuraa maa i piha'i iho ia'na. « Violette, o oe te parahi i piha'i iho ia Emma », ta'na ia parau.

Ua haere au ore noa'tura o Violette i piha'i iho ia Emma ma te mata tu'a-tu'a. Ua faatopa a'era o Emma i to'na upoo i ni'a i ta'na amuraa maa ma te hi'o noa'tura i te papa'i. E riro teie ei matahiti roa roa.

I te taime no te haapiiraa numera, ua papa'i o Caldwell vahine i te tahi mau uiraa i ni'a i te tapura na te mau pihi e imi. « E rave outou outou ana'e e aore râ, na muri i to outou hoa », ta'na ia parau.

Oioi roa o Emma i te tipapa i ni'a i ta'na api parau, mai te huru e, e mea ohipa roa oia. E mea ohie roa te mau uiraa. Te tamata nei râ oia i te ape ia Violette. Aita oia i hi'o hoê noa a'e taime i ni'a ia'na i taua po'ipo'i taatoa ra.

Ua puta mai ra te hoê mea i ni'a i to'na taponono. Mai te mea ra e,

e penitara. Aita o Emma i haapa'o noa a'e.

Te tahi faahou patia. Te patia mai nei o Violette ia'na ! Ua tamau noa o Emma i te rave i ta'na ohipa ma te ahihi ore.

Te toru o te patia a Violette e mea puai rii a'e ia, e te mauui. Te haamata mai ra o Emma i te ahua i roto ia'na. Mai tera noa ihoa ia te huru i roto i teie matahiti taatoa ? Ua mana'o oia e afa'i i to'na rima i ni'a no te faaite ia Caldwell vahine. E aore râ, e faaite noa paha oia ia Violette i te tahi faahou hoho'a riri.

I taua taime ra, ua faaroo a'era o



ia Violette

Emma i te ta'i o te ihu. E taata anei te ta'i ra? Ua puta faahou mai ra te penitara i ni'a ia'na. Ua fariu mai ra oia i te upoo i ni'a e ua ite atura oia ia Violette te hi'o noa mai ra ia'na. Tei roto ta'na penitara i to'na rima, e e roimata to roto i to'na na mata. Ua î roa ta'na api parau i te tafetafeta no te tumaraa.

Ua ofati o Violette i te penitara i roto i to'na na rima. « E nehenehe

anei ta oe e tauturu mai ia'u? » ua ani mărû noa mai oia.

Ua hi'o atu o Emma i ni'a ia'na tau minuti iti, ma te maere. Te hinaaro nei o Violette ia tauturu atu o'na? I muri a'e i to'na ino rahi? Ua fariu faahou o Emma i ni'a i ta'na api parau. E nehenehe ta Violette e rave o'na ana'e. Aita oia e ti'a ia fana'o i te tauturu a Emma, noa'tu e, o oia... to'na taata tupu?

Ma te paraparau ore, ua hi'o noa o Emma i mua. Ua ti'a ia'na ia faaroo ia Violette ia ta'i mărû noa i piha'i iho ia'na. Ua parau tamau noa te mau papa'iraa mo'a ia here i to'na taata tupu—tera râ, e mea taa ê o Violette! Tei piha'i iho noa oia ia'na i te parahiraa i roto i te piha haapiiraa!

E ua rave faahou Emma i ta'na ohipa. I muri iho, ua faaea oia. Peneia'e aita o Violette i taa ê atu. Peneia'e ia parau ana'e te mau papa'iraa mo'a ia here i to outou taata tupu, te auraa ra, o te mau taata atoa ia. Tae roa'tu i te mau taata tupu ino. Noa'tu e, e mea fifi roa.

Ua puhi a'era Emma i te matai e ua tuu mărû noa'tura i ta'na penitara i raro. Ua fariu atura oia i ni'a ia

Violette e ua tamata rii ia ataata.

« E nehenehe anei ta'u e tauturu? » ta'na ia aniraa.

Ua tairiiri mai ra Violette i te upoo, tamărô a'era i te roimata i to'na rima.

Ua faaao atura Emma i ni'a i te api parau a Violette e ua hamata ihora i te tauturu no te uiraa matamua. Ua tupu a'era te hoê mana'o mahana-hana i roto ia'na. Ua mana'o a'era oia e, e au anei o Violette i te faraoa monamona hoho'a animara. ■



TE PEERAA IA IESU

Te hinaaro nei Iesu ia here tatou i te mau taata atoa. I roto i te mau papa'iraa mo'a, te haapii nei Oia ia tatou ia here i to tatou utuafare e te mau hoa e ia hamani maitai ia ratou. Ua haapii atoa mai Iesu e, « E aroha'tu i to outou mau enemi, e faaora'tu i tei tuhi mai ia outou; e hamani maitai atu i te feia i riri mai ia outou » (Mataio 5:44). Te auraa ra, noa'tu e, e ere te hoê taata i te mea maitai i ni'a ia outou, e ti'a ia outou ia pee ia Iesu na roto i te faaiteraa i te maitai e te tamataraa i te riro ei hoa.



E faaite au i te evanelia i te mau tamarii atoa a te Ātua

AUI : FAHOHO'ARAA NA MARK JARMAN ; ĀTAU, IA AU I TE OHURAA O TE NIRĀ UATI :
FAHOHO'ARAA NA JIM MADSEN, JARED BECKSTRAND, ERIC BARCLAY, E O CELESTE SMITH

TE MAU TARETA E OPERE

E nehenehe ta outou e faaite i te evanelia na roto i te opereraa i te tareta. A tapiri i ni'a i te parau paari, te mau tareta no ni'a mai i te api i muri nei. E a tapu i te mau tareta e a papa'i i ta oe iho poro'i i ni'a i te tahi atu pae.

TE HIMENE E TE PAPA'IRAA MO'A

- « Proclamons la vérité »,
Chants pour les enfants, 92–93
- Mataio 5:16

PARAPARAU ANA'E

E nehenehe ta outou e ani i te melo tata'itahi o te utuafare ia papa'i i te hoê hoho'a no ta'na hotu au roa. E i muri i te hoho'a, e nehenehe ta te taata tata'itahi e papa'i e mea nahea to te evanelia haamaitairaa i ratou oraraa. I muri iho e nehenehe ta outou e paraparau amui no ni'a i te mau rave'a e ti'a ai ia outou ia faaite i te evanelia i te mau hoa e i te mau taata tupu.

Ua amu a'enei outou i te hoê mea au roa e ua hinaaro outou i te faaite atu ? I te hoê taima ua moemoeahia te peropheta Lehi, te amu ra oia i te hoê hotu au roa. No to'na au, ua faa'i te reira « i to'na varua i te oaoa rahi » (1 Nephi 8:12). Ua hinaaro a'era Lehi ia tamata atoa to'na utuafare i taua hotu au ra.

Te hotu i roto i te moemoea a Lehi e au ia i te here o te Metua i te Ao ra. Ua hinaaro Lehi i to'na utuafare ia ite i te here o te Metua i te Ao ra. Ua hinaaro oia e horo'a i te evanelia ia ratou no te mea ua ite oia e, e faaoaoa te reira ia ratou.

Pinepine te mau tamarii ia riro ei mea maitai roa i roto i te faaiteraa i te evanelia ia vetahi ê.

Ua ite o Maria, e va'u matahiti, i te mau misionare i ni'a i te purumu

no Ecuador. Ua ani atura oia ia raua e haapii anei raua ia'na i te evanelia. Ua haere mai ra na misionare i te fare o Maria no te haapii i to'na utuafare. O Maria te matamua i roto i to'na utuafare tei bapetizohia. Ua oaoa roa oia i te tomo-atoa-raa mai to'na utuafare taatoa i te pae hopea i roto i te Ekalesia.

Ua oaoa roa o Eric, e iva matahiti, no ni'a i te faanahoraa a te Paraimere no te pureraa oro'a, no reira, ua ani manihini oia i te mau taata na piha'i iho i to ratou fare ia haere mai. E ua haere mai ratou.

Ua faaite teie na tamarii i te hoê mea tao'a rahi i te taata ta ratou i here. Ia faaite ana'e outou i te evanelia, e tupu to outou iteraa papû i te rahi. Mai ia Lehi, e ite outou i « te oaoa rahi ». ■

« Eiaha e māta‘u tei piha‘i iho-atoa-iho vau ia oe ».

Genese 26:24




« E ao to tei faatupu i te parau hau ra ».

Mataio 5:9



« Ia hamani maitai outou ia outou iho, ma te aau mārū aroha noa, ma te faaore hoi i te hara te tahi e te tahi ».

Ephesia 4:32



« E haamaitai i te Ātua i te mau mea atoa ra ».

1 Tesalonia 5:18



The Statue of Liberty is shown in the background, holding the torch aloft. The image is partially obscured by the text and the portrait of Yailin.

Camille no New York City

E mea rahi roa te mau
hoa o Camille, e iva
matahiti. « Te mea au
roa na'u i roto i to'u mau hoa
maori râ, e mea taa ê ratou
paatoa », ta'na 'ia parau.

« No te mau vahi taa ê
mai ratou, e e mea taa ê
ta ratou huru raveraa i
te ohipa ». E mea au na
Camille ia haapii mai i
te mau mea maitai na
roto mai i to'na mau
hoa, e e mea au na'na
ia faaite i te mau mea e
o ratou. Te ohipa maitai
roa a'e ta'na i faaite i te hoê

hoa o te evanelia 'ia. I muri a'e i
to'na faaiteraa i te hiro'a faaroo
matamua, i to'na hoa ia Yailin,
ua ani manihini o Camille i te
utuafare o to'na hoa ia farerei
i te misionare. Ua haapii atoa
Camille ia Yailin nahea ia pure.
I teie nei, e melo o Yailin e to'na
metua vahine no
te Ekalesia.

*Ta'u mau himene au roa maori
râ, « E tamarii au na te Atua ra »
e « E Ti'a i te Utuafare ia Ora
Tahoê ». Ta'u irava au roa maori râ
Te Parau Haapiiraa e te Mau Parau
Fafau 19:23 : « A haapii mai i te
mau mea no'u nei, e a faaroo mai
na i ta'u mau parau ; a hahaere
hoi i roto i te mārû o to'u nei Va-
rua, e e noaa 'ia ia oe te hau i roto
ia'u nei ». Na teie irava e faaitoito
tamau noa ia'u ia oto ana'e au.*

*Ua bapetizohia to'u hoa o Yailin
i te matahiti 2011. E mea au roa
na'u i te mea e, ua nehenehe ta
maua e haere amui i te pure-
raa. Te tauturu nei au ia'na ia
tamau aau i te mau hiro'a
faaroo. Tei ni'a maua i te
hiro'a faaroo numera iva.*





No te fenua Repupirita Dominicaine to'u mama e to'u papa. No reira paha te raiti e te pipi e te moa i riro ei maa au roa na'u. Na teie e faahaamana'o nei ia'u e, no hea mai to'u utuafare.



E pae taata i roto i to'u utuafare. To'u tuahine o Emily, e bapetizohia oia e e haamauhia i te ava'e titema. To'u taea'e o Victor, ua pihia oia i te i'oa o to'u metua tane. Aitâ ta'u e animara, tera râ, te feruri nei au e rave mai i te hoê honu. E mea au na'u te honu no te mea e mea nehenehe ratou, e e mea taere roa ratou, no reira, eita ia ratou e horo ê.



E mea au roa na'u te aamu o te Tapena Moroni i roto i te Buka a Moromona. E tai'o to'u papa i te reira i roto i te pō utuafare, e ua faaûru te reira ia'u ia hamani i ta'u iho reva. Te faahaamana'o mai nei ta'u reva ia'u e, o vai au, e tei piha'i iho noa te Metua i te Ao ra ia'u.

TA TATOU API



Ua haapii mai to'u na metua ia'u i te evanelia e ua riro ei mau hi'oraa maitai no'u mai to'u na'ina'iraa mai. Ua haapii au i te tai'o i te mau aamu o te papa'iraa mo'a na te mau tamarii, e i teie nei ua here au i te Buka a Moromona. Te tai'o nei au i te reira i te mau mahana atoa, o vau ana'e e i piha'i iho atoa i to'u utuafare. O Amona ta'u taata au roa i roto i te Buka a Moromona. Ua riro oia ei misionare rahi, o ta'u ia e hinaaro ia riro ia paari ana'e au.

Esteban M., 8 matahiti, Colombia




A haere ai to'u utuafare i Panama no te ho'e tau faafaaeearaa, te fenua ai'a o to'u metua vahine, ua rave to'u na metua i to'u tuahine na'ina'i, o Yhoalibeth, e ia'u no te haere e mata'ita'i i te hiero no Panama City. Ua rave to maua metua vahine ia maua no te faatape'a i te papa'i o te hiero. I muri a'e, i to'u parauraa'tu i to'u metua vahine i te oaoa ta'u i farii i te hiero, ua parau mai ra oia ia'u e, ua farii au i te Varua Maitai.

Sergio B. Jr., 7 matahiti, Florida, te mau Hau Amui no Marite



Pasha Z., 9 matahiti, Ukraine



Letícia C., 6 matahiti, a ti'ahia ai to'na matahiti i te 3, ua oti atoa te hiero no Curitiba Brazil i te hamanihia. E mea au roa na'na e haere i te hiero, e ua haere oia pauroa te mahana o te hepetoma hopea o te opani iriti. E te au noa nei â oia ia haere e mata'ita'i i te hiero e ia orihaere na roto i te aua nehenehe. E mea au atoa na Letícia ia papa'i i te hoho'a e ia 'au.



PARAIMERE : PEE IA IESU

E mea au na Maurizio D., 11 matahiti, Italia, te pureraa oro'a, no te mea, te haapii mai nei oia i te parau no te Metua i te Ao ra e no Iesu Mesia. E mea au na'na e haere i te pureraa no te mea, e mea arearea e te anaanatae, e te nehenehe roa atoa. E mea oaoa oia i te fare pureraa e e mea rahi to'na hoa.



A faaineine ai matou no te haere i te oro'a patiaraa repo matamua no te hiero no Tijuana Mexico, ua oaoa roa matou. Ua haere to matou utuafare no te rave i te ohipa. Ua tamâ matou i te aua o te hiero. Ua ite au e haere mai te Fatu i roto i To'na fare ia oti ana'e te reira.

Jesus S., 6 matahiti, Mexico



Bảng Khắc
Bảng Vàng


Na te tai'oraa i te mau papa'iraa mo'a e tauturu nei ia'u ia ma'iti i te maitai.

« Te mau api auro », na P. Tuyêt Hoa, 10 matahiti, Cambodia



Te ma'iti nei au i te maitai ia pee ana'e au i te Metua i te Ao ra e ia Iesu Mesia.

N. Thi LinDa, 8 matahiti, Cambodia



Ta'u tuhaa au roa i roto i te Buka a Moromona o te aamu ia o Nephi e te fanoraa na ni'a i te moana.

Kelly C., 10 matahiti, Philipino

E mea ti'a ia taatihia tatou i roto i te hiero ia ti'a ia tatou ia ora ei utuafare e a muri noa'tu.

Shanna C., 8 matahiti, Philipino



E mea au na'u ia haere i te pureraa e to'u utuafare e ia haapii i te parau no Iesu Mesia. I te fare e mea au na'u ia tai'o e ia haapii mai i te mau aamu no te papa'iraa mo'a, ia himene i te mau himene, e ia ha'uti i roto i te po utuafare. Ua haamaitai te evanelia i to'u utuafare e ua faatupu i te oaoa i roto ia'u. Ua horo'a a'enei au i te hoê Buka a Moromona i na orometua haapii e toru e na to'u hoa rahi roa, o Miguel. Ta'u himene Paraimere au roa maori râ, « Proclamons la vérité » (*Chants pour les enfants*, 92).

Martim P., 6 matahiti, Potutara




Henrique S., 7 matahiti, Beresiria

Te haamaitai nei Iesu i te mau tamarii rii

Na Jan Pinborough

Te mau ve'a a te Ekalesia

E rave rahi te taata tei
haaputupu mai i piha'i iho
ia Iesu. Ua hinaaro ratou e
faaroo Ia'na ia faati'a mai i te
mau aamu. Ua hinaaro ratou
e faaroo Ia'na ia haapii mai i
te parau no te ra'i.





Ia pohehia te taata i te ma'i,
ua faaora Iesu ia ratou. Ua
faaora Oia i te taata eita e
ti'a ia ite. Ua faaora Oia i te
taata eita e ti'a ia faaroo.




I te hoê mahana ua arata'i mai ra te taata i ta ratou mau tamarii rii no te hi'o
ia Iesu. Ua hinaaro ratou ia horo'a Oia i te hoê haamaitairaa i ta ratou mau
tamarii. Ua parau te mau pīpī a Iesu i te taata e, eiaha e haape'ape'a ia Iesu.
Ua feruri ratou e, ua rahi roa Ta'na ohipa.

Aita i rahi roa te ohipa a Iesu. Ua parau oia i te mau pīpī ia vaiiho i te tamarii ia haere mai Ia'na ra. Ua parau oia e, te feia tei hoho'a i te mau tamarii rii, no ratou ho'i te basileia o te ra'i ra.



Ua here Iesu i te mau tamarii paatoa. Aita e hi'oraa e, o vai outou, eaha to outou huru, e aore râ, i hea outou e ora ai. Ua here Iesu ia outou ! ■

No roto mai i te Mareko 10:13–16.



Te haamaitai nei lesu i te mau tamarii rii

« Ua rave atura ia ratou, ua hii ihora, ua tuu atura i ta'na rima i ni'a iho ia ratou, e ua faaora'tura oia ia ratou » (Mareko 10:16).

UA PARAU... VAU

Na R. Val Johnson

Te mau ve'a a te Ekalesia

Ua oto roa vau i to'u hi'oraa i te hoho'a mata o to'u metua vahine. Hiti mahuta. Maere. Inoino. Ua itehia teie mau mea atoa i roto i to'na mata, e tupu mai ai te mana'o—hohia.

Noa'tu ta'na mau haapiiraa ia'u i te roaraa o to'u na matahiti hoê 15 ia faatura i te Metua i te Ao ra na roto i te parau e i te ohipa, tei ô vau, ma te hapa, i te vaiihoraa i te hoê parau teimaha ia mahuti i rapae i to'u vaha.

Aita vau i hinaaro ia parau ino. Na mua'tu i taua matahiti ra, aita vau i faaohipa a'enei i te parau maamaa. Tera râ, i taua pu'e tau mahanahana ra, ua rave au i te ohipa i roto i te tuhaa haapa'o i te ohipa tai'a e te ohipa a'ua'u animara no Utaha, e ua mau roa ia'u taua peu ra na roto mai i te mau tamaroa e rave ra i te ohipa i piha'i iho ia'u.

Ta matou ohipa o te tapuraa ia i te aihere baradane i te pae purumu. Ua faaoti oioi matou e e aihere ino mau te *Arctium minus*. E tupu aere oia i te mau vahi atoa, e maiha mai oia i ni'a a'e i te tahi atu mau raau. Na to'na mauraa e haru i ni'a te mau huru mea atoa e tapiri mai ia'na.

Ma te ope i roto i te rima, e ati ia to matou i te aroraa i teie aihere i te roaraa o te pu'e tau mahanahana ma te rohirohi—e te parau ino. I te haamataraa ua maui rii to'u tari'a i te mau parau ino a to'u mau hoa. I muri iho ua farii au i te reira. E i te pae hopea, ua rave atoa vau i te reira. I te hopea o te pu'e tau mahanahana, e au te parau ino i roto i ta'u mau parau mai te aihere baradane te mau i ni'a i te huruhuru uri.

To'u iteraa i te au ore o to'u metua vahine i ta'u mau parau tano ore, ua ite a'era vau e, e ti'a ia'u ia tau i te reira.

E ere i te mea ohie. E ere te parau ino i te ohipa ma'iti-noa-raa i te ta'o. E huru feruriraa



E au te parau ino i roto i ta'u mau parau mai te aihere baradane te mau i ni'a i te huruhuru uri.

atoa râ. Te mau aparauraa ta tatou e faati'a nei i roto i to tatou oraraa, te mau ta'o ta tatou e tai'o nei, e te mau hoho'a ta tatou i mata'ita'i nei, na te reira e faanaho i to tatou mau mana'o. Aita i maoro ua haapii mai au e, titaugia ia'u ia tau i te mea ta'u i titau manihini i roto i to'u varua mai te mea e, ua hinaaro vau e tau i te mau ta'o ta'u e faaohipa.

Aua'e râ, e mea itoitoe vau i te haere i te pureraa e i te haapiiraa evanelia. Ua maiha mai te mau parau ino i ni'a te mau mana'o teitei, aua'e râ, tei roto noa vau i te vahi e ti'a ai i taua mau mana'o teitei ra ia tupu faahou te mau aa. Ua haapapû vau i te ohipa tai'oraa i te mau papa'iraa mo'a i te mau mahana atoa e i te pure. Ua faaatea mai au ia'u i te mau hoho'a teata e te mau faanahoraa afata teata o te faaô faahou mai i te mau mana'o poiri.

Ua ite mârû noa vau i ta'u huru paraparau i te haereraa i te maitai. I te hopea o te matahiti, ua ti'amâ vau i ta'u peu parau ino.

Mai taua ohipa i tupu ra, ua haapii mai au e rave rahi mau mea no ni'a i te mana o te mau parau. E nehenehe i te parau e faatupu e aore râ, e haamou. E nehenehe e haapepe, e aore râ, e faaora. E nehenehe e ta'iri i te taata raro, e aore râ, e nehenehe e tanu i te huero o te ti'aturiraa e te here.

E mea au ia ite e, te Faaora Iho, te Hamani o te ra'i e te fenua, ua parauhia Oia e, te Parau (te Logo) (a hi'o Ioane 1:1–4 ; PH&PF 93:6–11).

Ua haapii mai au e, e auraa maitai e te ino to te parau. E parau tapu tatou no te faaite i te parau mau i roto i te fare haavâraa. E fafau tatou ma te hanahana, e aore râ, e parau tapu tatou, ia haapa'o i te mau faaueraa a te Atua i te taime a bapetizohia ai tatou. E rave atoa tatou i te mau euheraa mo'a no te haapa'o i ta tatou mau fafauraa no te hiero no te farii i te mau haamaitairaa rarahi roa a'e a te Metua i te Ao ra.

Ei puohuraa : E rahi atu to tatou riroraa mai te Parau ra te huru mai te mea e, e faatura ta tatou mau parau Ia'na e e riro mai ei hi'oraa no To'na hanahana. ■



DAVID O. MCKAY

Ua paari o **David O. McKay** i roto i to'na **utuafare faaapu** i Huntsville, Utah. E mea au na'na te mau animara e ua haapa'o i te **puaahorofenua** i roto i to'na oraraa taatoa. A rave ai oia i te hoê misioni i te fenua Peretane, ua itehia ia'na te hoê **faahitiraa parau** tei riro mai ei parau tamau na'na : « Noa'tu eaha to oe huru, a rave maitai i ta oe tuhaa ». Ua ho'i oia i te fenua Peretane e rave rahi taima e ua haamo'a i te **hieru no Lonedona i Peretane** i te matahiti 1958.



« **T**atou te mau metua, titauhia ia
tatou ia tauturu i te feia apî eiaha
i te faaineine-noa-raa no te ohipa
misionare rave tamau o te hope i roto i te tahi
tau ava'e noa, e faaineine atoa râ no te rave
e no te haapa'o i te mau fafau-raa o te hiero
o te vai e a tau a hiti noa'tu. E nehenehe i
te taahiraa matamua e haamata i te tama-
riiriiraa ». A hi'o « Te feia apî e te mau fafau-
raa o te hiero », api 18. E nehenehe i tete mau
papa'iraa e te tahi atu mau papa'iraa i roto,
e tauturu i te mau melo, te feia apî e te feia
paari, ia faaineine maitai a'e ia ratou no te
faaite e no te ora i te evanelia.

TE EKALĒSIA A
IESU MESIA
I TE FEIA MO'A
I TE MAU MAHANA
HOPEA NEI

4



9

TAHITIAN

0210790895

10790 Oct 13